


**PALAESTRA
PIETATIS,
CONTINENS
DOCUMENTA
SANCTÈ...**

Johannes Morawski





Ex Bibliotheca
majori Coll. Rom.
Societ. Jesu

~~515~~ 5 5
d d
14 34




PALÆSTRA

PIETATIS,

Continens

Documenta sanctè vi-
vendi & moriendi.



ATHLETIS MA-
RIANIS,

In Sodalitate Immaculatè
conceptræ

VIRGINIS DEIPARÆ,

Ad Collegium Posnaniense Soc: IESV,
APERTA.


Operâ

JOANNIS MORAWSKI,
ex eadem Societate Sacerdotis.


EDITIO TERTIA

ANNO DEI HOMINIS 1678. +
Superiorum permissu.

P O S N A N I Æ
Typis COLLEGII Societatis JESU.



NOs verò ad maiorem vocati vitam, ad excellentius fastigium ascendimus, & in maioribus exercemur.



PALÆSTRIS.

S. CHRYSOSTOM.


Tom. 5.

Approbatio

IMPRIMATUR.

Posnaniæ &c. 20. Septemb. 1676.

ALBERTUS DOBRZELEWSKI,
Officialis Posnaniensis
Generalis.



PERILLVSTRI SODALITATI

Sine labe Conceptæ

VIRGINIS MATRIS,

Ad Collegium Poseniense Soc. JESU
E R E C T Æ.

*Perillustribus, Magnificis, Generosis
Adolescentibus,*

PRÆFECTO eiusdem Sodalitatis
**ALEXANDRO SKRZE-
T U S K I;**

Affluentibus,
IOANNI OPALENSKI,
Capitano Sremensi,

FRANCISCO de ROSEN;
Secretariis,

**LVDOVICO THOLI-
B O W S K I,**
Castellanidæ Camenensi,

**V L A D I S L A O K O-
Ł A C Z K O W S K I,**

*Cæterisq; omnibus Sodalibus Marianis,
Author, Divinæ Matris gratiam, fauoresque
amplissimos.*




IN Palæstram ego iterum vos manu duco, Athletæ Mariani. Quò enim aliò generosum ætatis ac indolis Vestræ genium? Eant voluptuarij Alcinoi ad sua pomaria Hesperiorum æmula hortorum; draconem tamen ibidem inventuri, vel ipsi futuri Tantalii. Ruant effuso impetu ad Minoia viridaria Thesei; præstò his suus erit Labyrinthus ac Minotaurus. In Palæstram ego vos potius, ac in Palæstram pietatis.


Habet nimirum & Pietas propriam gymnadem & Athleticen suam, cui & Macedonum stadia, & Corinthi Isthmi, & philosophantium porticus, & omnes demum arenæ palmam porrigant.

Cæte-

Cæterum Palæstram hanc
 Mariano inclusam circo volui, ut
 vel intra sphæræ istius limites,
 quæ olim suo ambitu immensum
 complexa erant D E U M, ve-
 stra exerceretis ac exereretis stu-
 dia, vel ut supra Montem adeò
 sublimem, ipsoque celsiorem
 Olympo, sacra hæc decurreretis
 Olympia, in quo ipse quoque
 Vnigena Patris, giganteo passu
 mortalitatis ingressus fuerat stadi-
 um, novus ex Comprehensore
 Viator. Dabit effuso Vestro cur-
 sui prodromum exemplum, per
 Montana Iudææ festinatum ipsi-
 us Virginis iter, ac Virginei Nu-
 minis transilientis colles æterni-
 tatis, dum in nostram lacryma-
 rum Vallem descenderet. Quin
 & ipsa gentilitia Vestra insignia,




orbi Sarmatico, irrequieto ad sum-
mos Famæ Fortunæque apices
cursu suorum Magni Nominis
heredum notissima, isti Nazare-
thano agoni præbunt, seu Gen-
tilitæ SKRZETUSCIORUM
SOLEÆ, ipsa Cruce insignes,
quæ in omni Solo illustrium fa-
cinorum posuere fastigium: Seu
OPALINIÆ NAVES, quæ li-
quido etiam & infido undarum
elemento solida Virtutis suæ &
gloriæ tam in Toga quàm in Sa-
go, æternum impressere monu-
menta: Seu ROSSENORUM
ROSÆ, quarum familiaris dos
est, vel hostes aculeis configere,
vel Victores coronare: Seu THO-
LIBOWSCIORUM FASCIÆ,
novus nimirum cœli Poloni Ecli-
pticæ baltheus, quo præcincti,
æmu-



æmulo Cœlorum motu, agonem
hunc decurratis: Seu KOŁA-
CZKOWSCIORUM ABDANCI,
geminato Vitæ Symbolo in om-
nem immortalitatis perennaturi
memoriam. Ergo jam apertam
vobis Marianam hanc Palæstram
fortunato pede ingredimini. Per-
gite immortalis adoreæ, digni il-
lâ, competitores. Aliud braui-
um promittere præmittereque
non potui, quàm Sanctè Viven-
di Moriendique documenta.
Nempe non est mortale quod
opto, & quò iterata, manu-
dutione vos provoco.

Quanquam non iterari dun-
taxat, sed perennare etiam hæc
debe-



deberet, cum non aliam mon-
stret viam, quàm ad Palæstram
pietatis.

Vestra Pietati

Addictissimus

JOANNES MORAWSKI,

Soc: Jesu.

CAPVT



C A P V T I.

Proponuntur quædam Principia sanctè viuendi.

I.

*Semel Factum, Dictum, Cogi-
tatum, æternum est.*



Xplico. Athleta Ma-
riane, fecisti aliquem amore
DEI actum heroicum? Vidit
illum DEUS, qui omnia videt;
& quia immutabilis est, scrip-
psit illum in memoria sua

immutabili, *Nunquam deinceps delendum*: Er-
go tu quoque in cœlo DEUM videndo, leges
istum actum tuum heroicum totâ æternitate in
memoria DEI descriptum, atque de ipso cum
DEO Tuo, & Sanctis omnibus tota æternitate
gaudebis. Peccasti? Vidit DEUS, hoc infelix
tuum peccatum in tali momento, in tali loco

commisſum, illudque ſcripſit indelebiliter, vt ait Auguſtinus, *in Legibus æternis, & in mentibus Angelorum*, ac de illo tota æternitate diſplacitiam habebit. Ergo Tu quoque, in cœlo quamvis beatus, hoc tuum peccatum, tota æternitate leges, ſcriptum in legibus æternis, atque illud tota æternitate deteſtaberis: & ſicut fieri non poteſt tota æternitate, vt quod ſemel fuit, non fuerit: ita tota æternitate fieri non poteſt, vt quod ſemel cogitaſti, dixiſti, feciſti, à te cogitatum, dictum, factum non fuerit. Adhucne igitur nullius momenti putabis momentum tuæ actionis ſiue bonæ ſiue malæ, quod immenſo æternitatis pondere appretiandum eſt? Adhuc in verbis tuis, cogitationibus, & operibus, non vereberis cenſuram legum æternarum? Non contendes totus, per tuas omnes & ſingulas cogitationes, verba & facta, vt in memoria æterna ſis iuſtus.

I I.

Præſtat millies mori, quam ſemel peccare.

ITa veriſſimè ſenſit noſter Polonus Angelus, Sanctus Caſimirus. Vis enim ſcire, quid ſit peccatum mortale? Eſt imprimis cum recta ratione diſformitas tam deformis, vt pro nullo bono conſequendo, etiam pro mille mundis lucrandis, prudenter eligi poſſit: tam probroſa Creaturæ rationali, vt merito dixerit Sanctus Anſel-

Anselmus, malle se ire ad infernum cum innocentia quam ad cœlum cum peccato mortali. Est illa infelix conuersio, qua homo, ex amico DEI, fit inimicus; ex filio DEI, filius Diaboli; ex herede Regni Cœlorum, inferni mancipium. Est Rebello creaturæ contra supremum Principem, & cum hoste ipsius Diabolo coniuratio. Est contemptus voluntatis Diuinæ, infinito honore & amore dignissimæ, propter bonum nostrum, prohibentis aliquid, & istum contemptum suum videntis. Est, vt ait Apostolus, Conculcatio filij DEI, obstruentis nobis suâ gratiâ viam ad peccatum. Est prælatio non Barabbæ, sed Diaboli, eiusq; voluntatis, supra Christum eiusque præceptum. Est sanguinis Christi adinstar rei immundæ reputatio, quæ peccans proijcit animam tinctam Sanguine Christi in cœnum peccati. Est in voto DEICIDIUM, quo, vt ait Sanctus Bernardus, homo peccando vult interimere aut sapientiam DEI; volendo ne suum peccatum videat; aut Iustitiam, volendo ne puniat; aut Omnipotentiam, volendo ne possit punire, adeoq; vult interimere DEUM, qui sine Sapientia, Iustitia, Omnipotentia, viuere non potest. O scelus horrendum! Præterea peccatum mortale est illa fœditas, cuius vna guttula, id est vna cogitatio superba, nobilissimam & pulcherrimam creaturam Angelicam, tam turpem, tamq; detestabilem fecit; qualis est Diabolus. Est illa animæ macula, quæ per viam satisfactionis, nullo la-

crymarum oceano tota æternitate, ex oculis poenitentibus profluentium, nullo sanguine Martyrum, quamuis numero infinitorum, deleri potest, nisi Sanguine filij DEI. Est tam inuisa Diuinis oculis turpitudine, vt illa infinita bonitas nihil eorum odio habens, quæ fecit, tamen ad iniquitatem cum maiori horrore respiciat, quàm ad Canem fœtidum, & vermibus scatentem; vsque adeo, vt (quod considerat Blosius) si in purissima Matre Filij DEI, quam supra omnem aliam puram creaturam diligit, vel vnâ peccati mortalis deprehenderet labem, illicò illam cœlo deturbaret, ac in præcipitium inferni detruderet. Denique est illa animæ labes, quam æternæ inferorum flammæ (Ah quam atroces!) nunquam tot millionibus annorum excoquere poterunt; quæ tantam DEO displicentiam mouet, vt nullam in suis suauissimis visceribus compassionem habeat, videndo creaturam suam perpetuis incendijs sine fine torqueri, cum nos vnum canem in igne ardentem, ne quidem per vnum quadrantem sine sensu doloris aspicere possimus. Tanta est malitia peccati Mortalis, vt, si ita loqui fas est, omnem quodammodo tollat compassionem ex dulcissimo DEI corde. Quæ cum ita sint, quomodo tantum malum, vel per vnum diem in anima tua sustines? Cum peius sit, vnum peccatum mortale habere in anima, quàm omnes inferni Dæmones in corpore, vt docet Chrysost. hom. 30. ad popul. & Basilus hom.

13. ad Baptif. & ideo Peccans à DEO Patre cor-
ram S. Catharina Senenfi appellatur, Dæmon
incarnatus. Qua audaciâ hac nocte in peccato
mortali quiescere præsumis, quâ fortè dæmo-
nes repetent a te animam tuam? Cur tam faci-
le? Tam frequenter peccas? & quidem non in
absentia, sed in facie DEI, omnia videntis; DEI,
qui tibi nihil mali fecit, sed potius te tot bonis
cumulauit; DEI, in quo sunt infinita motiua
amoris, qui te dum peccas, in eodem instanti
præcipitare in infernum potest. Et peccas abu-
tendo eius concursu, alijsq; eius beneficijs con-
tra ipsum; peccas non vt placeas alteri DEO,
sed vt placeas Diabolo; peccas non vt acqui-
ras aliquod Regnum temporale, sed vt amittas
æternum. Si bellua, si Ethnicus, si Diabolus es-
ses, fortè aliquam excusationem posses præten-
dere, nunc verò cum credas filium DEI pro te
mortuum esse, ne illum offendas, cum te Deus
tot minis à peccato deterreat, tot beneficijs ad
se alliciat, ah quid ei iudicanti respondebis?
Heu misere animæ tuæ? Quid enim in te
peccauit anima tua? Egestatem fugis, quæ te
diuitijs priuat, & non fugis peccatum, quod te
priuat grâtiâ DEI, Virtutibus infusis, omnibus
meritis per tot annos congregatis; ita, vt si infi-
nitos gradus gratiæ haberes, si merita numero
infinita, omnibus te in vno instanti priuaret?
Horres mortem, quæ te priuat vitâ temporali
ærumnosâ, & non horres peccatum, quod te
priuat iure ad vitam felicem interminabilem?

Denum

Demum febriculæ ardores, vno die pati non potes; nec digitum igni admotum per aliquot momenta sustines; & toties peccando resoluis te ad habitandum in ardoribus sempiternis, in igne deuorante? Et quid si hoc peccatum quod committere vis, erit vltimum complementum mensuræ, quam tuis peccatis designauit Divina prouidentia? Quid si post hoc peccatum te proijcet in æternum à facie sua D E U S, nec tibi gratiam efficacem ad poenitentiam largietur?

I I I.

Nihil est certius morte, nihil incertius horâ mortis.

Immobile statutum est, omnibus hominibus semel mori. Quotquot fuerunt ante te homines, & quotquot te sequentur, aut mortui sunt, aut morientur: tu quoq; migrabis hinc omnino, nec semper, nec diu manebis hic, nec vsquam, supra terram; sed vel infra terram, vel in cœlo, breui manendum tibi est, & semper manendum. Quid curas vnius diei hospitium? quid amicos non nisi hodiernos? nec ultra crastinos? hodie sunt, cras tecum non erunt. Nec tibi per longum iter æternitatis comites erunt. Breui te deseret ista formæ venustas, deserent diuitiæ, voluptates, honores, deseret mundus. Sola te virtus sequetur: *Solus I E S U S omnibus recedentibus non recedet.* Cætera omnia

omnia fucum nobis faciunt, dum viuimus, uiuentibus pretiosa, vilia morientibus. Heu quantam illorum vanitatem Cereus lustralis ad uesperam mortis deteget! Sed serum erit tunc aperire oculos, cum in morte claudentur. Quod tunc te egisse optabis, nunc age. Punctum quod uiuis, forte ultimum est, & ut ait Tertullianus, *Christiano Crastinum non est*. Vis mortem Sanctorum pretiosam? uiue vitam Sanctorum pretiosam: times mortem peccatorum pessimam? fuge vitam peccatorum. *Et quia nescis ubi & quando te mors expectet, tu illam semper & ubiq; expecta.*

I V.

*Momentaneum quod delectat,
æternum quod cruciat. S. Greg.*

O Voces horrendas, *Æternum, Nunquam, Semper*. Ah semper, quod finietur nunquam. Ah nunquam, quod durabit semper. Ah æternum, quod nunquam finietur, quod semper durabit. Vis nosse quid sit *Æternitas*? Est Circulus, cuius initium semper est, medium & finis nunquam. Est rota, quæ semper uoluitur, quiescit nunquam. Est orbis, qui tibi desinit, incipit, & incipiendo nunquam desinit. Deme æternitati mille annos, deme mille millia annorum, deme tot seculorum milliones, quot stellas numerat cælum, quot atomos aer, quot guttas oceanus, nec vnicum momentum æternitati.

tati detraxisti; tam enim manebit infinita, quam ante fuit, manebitq; tam diu, quam diu D E U S perseverabit esse DEUS. Hæc ergo æternitas infelix, tam animi quam corporis cruciatibus plena, vnius momentaneæ delectationis pœna est. O DEUS, ergo ne vnius diei febricula molesta nobis est? si tibi eodem in molli lecto, inter morsum pulicum per vnâ noctem decumbere, durum est; digitum ardenti candelæ admotum vnicâ horâ tenere, intolerabile: Ah quid, semper, & æternum à visione DEI exulare, igne atrocissimo vri, die noctuque mediam inter caliginem, fumum ac sulfur versari, excruciaci modis omnibus, sine vlllo solatij leuamento, inter eiulatus lamentabiles, ac rugitus damnatorum, in contubernio Dæmonum viuere, desperatione rumpi & rabie nunquam lenienda, sicque viuere æternum moriendo, & mori æternum viuendo? ô semper! ô nunquam! ô æternitas! Utinam frequentius menti nostræ occurreres, quam nobis amaras redderes mundi omnes voluptates.

V.

Quid prodest homini, si vniuersum mundum lucretur, animæ verò suæ detrimentum patiatur? Matth: 16.

TAnti æstimat animam nostram, omnia ponderans in mensura & pondere æquissimo

mo

P R I M V M.

mo DEI Sapiencia Incarnata, vt ipsius iudicio totum lucrum, quod ex orbe vniuerso colligi potest, nullius momenti præ anima nostra sit, & prorsus nihil sit. Iniquus emptor Diabolus est, qui pro anima, Regna omnia mundi offerens dicit: *Hæc omnia tibi dabo, si cadens adora- ueris me.* Maiori illam pretio emit Sapien- tissimus negotiator Christus, quia infinito Thesau- ro sui sanguinis ac meritorum redemit, vsq; ad extremam paupertatem, vsq; sui exinanitionem, amore animæ nostræ redactus. Egone igitur tam stultus mercator sim, qui animam meam non pro Regnis omnibus mundi, sed pro momentanea voluptate, pro evanido ho- noris fumo, Diabolo æternum vendam! Heu quantum damnum animæ unicæ, animæ æter- næ detrimentum! Si una manu priuatus fuero, alterâ uti potero; si uno pede mutilatus fuero, al- ter manebit residuus; si aurem dextram amiserò, su- pererit sinistra; si unus oculus deficiet, alter erit solatio: At animam habeo duntaxat unicam & æternam, quam si semel amiserò, iam nulla est reli- qua. Una est, quæ pro centenis mihi esse debet & millenis, hanc si perdo, perdidi æternum; si lucrò, pariter æternum lucratus sum; hanc ubi saluam fe- cero, iam quod metuum non habeo æternum: ubi semel perdidi, neq; quod sperem super est æternum, quia anima unica est, æterna est.

VI.

*Bonum Gratiæ vnus, est maius,
bono totius naturæ vniuersi. S. Tho: 1.
2. q. 113. art. 9. ad 2.*

AVrum tibi placet, gemmas quæris, & colligis o homo? quid si hoc momento mundum aureum & gemmeum, quid si mille & plus quàm mille mundos aureos & gemmeos tibi statuam facile comparandos? En vnicus Sanctificantis Gratiæ gradus, Bonum totius naturæ vniuersi, adeoq; mille mundos aureos & gemmeos pretio superat. Et quidni superet? qui infinito pretio meritorum Christi emptus est; quo; Regnum Cœlorum & immensa æternitatis beatæ gloriæ condignè emitur. Quæris iam, quo pretio hanc gemmam sic pretiosam emas? Sacramentorum pœnitentiæ, & Eucharistiæ frequens ac dignus vsus, charitatis opera, vnica sancta cogitatio, vnicus bonæ voluntatis actus, pretia sunt, quibus gemma hæc inæstimabilis comparatur. O quot Thesauros plusquam aureos, plusquam gemmeos colligeres vel per vnum diem; si talibus actibus, cogitationibus, operibus totum diem impenderes? Quot tibi pereunt tam pretiosa lucra, cum sine bonis actibus pereunt dies? Ergo hic te decet maximè avarum esse, vnicam æstima & cura DEI gratiam, & non vnicam: vnicam, quia præ omnib⁹ alijs bonis creatis quærendam; non vnicam, quia

quia per plurimos gradus continuo augendam,
 vt dicere possis ignito S. IGNATII corde: *Amo-*
rem tuum Domine cum Gratia tua mihi dones, &
Dines sum satis, nec ultra quidquam posce.

V I I.

Servire D E O, regnare est.

Non est tam abiecta servitus D E I, quam ex-
 terius apparet. Omnes serui D E I Reges
 sunt, quia sibi suisque passionibus dominantur.
 Reges sunt, quia intra illos est Regnum D E I,
 illa scilicet pax conscientiae, illud gaudium Spi-
 ritus Sancti ineffabile. Reges sunt, quia iuxta
 Christi promissionem ipsorum est Regnum
 celorum. Reges sunt, quia simul amici & filij
 legis Regum. O beatam servitutem cunctis
 Regum solijs altiore! Sensere hoc magni
 Imperatores, Reges & Principes, qui vt Deo
 perfectius seruirent, sceptras, purpuras, & dia-
 demata cum vita Religiosa commutarunt. Ta-
 les fuerunt, vt refert Hieronymus Platus de
 bono status Relig. lib. 2. c. 26. Imperatores in
 oriente, Anastasius, Theodosius, Michael vter-
 que; In occidente Lotharius & Hugo: tales e-
 regibus in Italia Rachisius & Pipinus; in Hi-
 spania Veremundus, Ramirus; in Anglia Sige-
 rtus, Elteredus, Henredus; in Germania Ca-
 lomannus & alij. Regum ac Imperatorum
 os, Duces ac Principes inferiores, quis nu-
 ret? Sufficiat referre dictum B. Aloysij, qui
 spre-

spreto Castillionis Marchionatu Societatem JE-
 su è consilio DEI Matris ingressus, tanti fecit
 abiectum esse in domo DEI, vt Generali Mutio
 Vitellesco, (quod ipse postea in publica ex-
 hortatione retulit,) palam dixerit: *Si per vnum
 tantum momentum in Societate JESU esse debu-
 issem, & per inferni penas id me peruenire oportu-
 isset, elegissem illas, Pater, vt in Societate essem.*
 At enim seruitus DEI suis non caret laboribus
 ac molestijs? Ita est. Sed quænam mundi ser-
 uitus illis caret? Quæ rosa sine spinis, quæ sine
 conchis gemma? Quot incommodis, quot la-
 boribus fatigantur serui mundi, vt famam, vt
 honorem, vt gratiam Principis lucrentur? Et
 hoc ipsum quàm fragile bonum est, quàm in-
 certum? Ergo pro amicitia DEI, tam certa,
 pro honoribus, pro diuitijs tota æternitate
 mansuris, longe minora pati graue erit? Et ve-
 rò quàm parum est, quod à nobis in obsequijs
 suis exigit Deus. Parum omnino comparatio-
 ne tanti præmij, quantum est æternæ gloriæ
 pondus. Parum ratione breuis temporis, quo
 laborandum & patiendum est. Parum compa-
 ratione eorum, quæ Sancti pro DEO tolera-
 bant. Parum comparatione eorum, quæ pro
 nobis Deus Filius fecit & passus est. Parum ra-
 tione dignitatis DEI infinitæ. Parum compa-
 ratione suppliciorum, quæ promeruimus. Pa-
 rum deniq; quia omnes in obsequio molestias
 & labores, dulces facit suis solatijs, suo Amore
 DEUS, vt ipse sit exaltans iugum supra ceruices
 nostras,

nostras, dicatq; meritó : *Iugum meum suave est,*
Onus leve.

VIII.

Sine causa Christianus sum, si
Christum non sequor. S. Bernardus.

Nihil aliud est vita Christiani, quàm imitatio
 vitæ Christi. Aut Baptismi Character eradendus est, & fides in Christum eiuranda; aut iuxta vitæ Christi Ideam viuendum est Christiano. Quantus pudor est credere Christo dicenti, Beatos esse pauperes, Beatos qui lugent, & tamen diuitias sectari, quærere voluptates! Quàm probrosa contradictio, Adorare Christum pauperem, contemptum, Crucifixum; & paupertatem Christi fugere, detestari contemptum, Crucem horrere! Quanta indignitas, Dominum esse Pauperem, servum diuitem; Dominum omnia incommoda pati, servum delicijs abundare? Itané vestis attactu Christi consecrata ac dignificata est; & paupertas nostra, dolor, ignominia, quæ Christus pariter assumpsit, ipsa Christi assumptione Christiano significata non erunt? At pudeat Servum esse maiorem Domino suo: pudeat sub spinoso capite eumbrum esse delicatum. Elige quod vis Christiane: vel Christum errasse puta, qui sponte paupertatem, ignominiam, dolores assumpsit: vel errare fatearis, qui opposita omnia ambis. Christum DEI sapientiam, errare impossibile

bile est; tu igitur infelix erras, si diuitias, si voluptates, si honores, cum salutis dispendio quæris.

I X.

Aut pati aut mori.

Effatum est Sanctæ Teresiæ verissimum, & Diuinæ Sapientiæ arcanum. Ita est, quamdiu viuimus, tamdiu restat pati. Multa bona agere, & multa mala pati, Christianorum est, ait Bernardus. Sepiuit Deus omnes semitas nostras spinis & crucibus: Si quis ab vna declinare velit, incidit in aliam, quia ob ipsam fugam Crucis, nouæ noxæ debitam. Quid frustra Crucem fugis, quam vitare non potes? In Cœlo nihil nisi bonum est: in inferno nihil nisi malum: terra, quæ media est, vtrumq; extremum participat. Quid Crucem fugis, quam Christus suo contactu dignificauit? Crux latronibus sit infame patibulum, tibi Christiane est Scala ad cœlum. Hac itur ad Astra: hac Christus, hac omnes cœlites intrarunt in gloriam suam. Quàm pulchrum Cœlo spectaculum est, Christianum Christo confixum esse Cruci! Quantum gaudium, Christum socium habere dolorum! Quid dulcius calice Passionis, quem cor diuinum suis implet placitis, velut placidissimis liquoribus, quem manus pijsimi patris porrigit, quem os Christi prægustauit. Bibe igitur tam præclarum calicem sitibundus, vt
gene-

generosos ac Filio D E I dignos imbibas spiritus, & bibendo ingemina cum S. Tereſſia: *Aus pati aut mori.* Quin potius dic cum S. Magdalena de Pazzis: *Pati non mori:* Aut exclama cum Indiarum Apostolo XAUERIO: *Amplius Domine, amplius cruciari.* Nempe pati est *Omne gaudium*, vt ait Iacobus Apostolus. Stare ad crucem Christi cum M A R I A, est illud *unum Neceſſarium*: *Maria optimam partem elegit*, vt aiebat P. Vincentius Carafa VII. Generalis Soc. I E S U. *Pati amando, & amare patiando, est compendium perfectionis*, vt dicebat idem. *Ire ad cælum patiando, est ire per Poſtam*, vt dicebat P. Balth. Aluarez Soc. I E S U. *Dolores pro amore Christi tolerati, sunt mensura itineris sursum, quam oportet esse confertam & coagitatam*, vt dicebat P. Franc. Piccolomineus VIII. Generalis Soc. I E S U.

X.

Omnis ponderatio non est digna continentis animæ. Eccl. 26.

Q Uam pretioſa est caſtitas, Virtus Angelica! *Hæc incorruptio nos mortales facit proximos non modo Angelis, sed ipsi etiam DEO.* Hanc tanti fecit Chriſtus, vt Matrem non niſi Virginem elegerit, ipſe Virgo: & Ioannem Apostolum propter Virginitatem, in ſuo pectore tanquam gemmam pretioſam repoſuerit, eumque moriens loco ſui in terris, Filium MARIÆ relique-

liquerit. Hanc ita amavit Virgo Mater, prima
huius virtutis in terris fundatrix, vt Angelo
maternitatem DEI offerenti palam testata sit.
Quomodo fiet istud, quoniam virum non cognosco?
Præmium porro Virginitatis quàm sublime!
Supra montem Sion, id est in sublimi gloria
perennare, sequi agnum quocunque ierit, can-
tico ab alijs inimitabili, cor DEI, cor B. Vir-
ginis, tota æternitate exhilarare, speciali laure
ola in cœlo ornari, Virginitatis stipendium est.
Quanti igitur hanc virtutem æstimare, quan-
tum pro eius integritate dimicare debes, si
Christo, si eius Matri placere desideras, Athle-
ta Mariane? Linguam sibi præcidit, & cruen-
tam in os Foeminæ impudicæ exspuit Martyr
Nicetas, vt castitatem defenderet: tu saltem
linguam cohibe, ne quæ toties Sanguine Chri-
sti in sacra communione consecratur, verbo
aliquo impuro polluat. Nobiles Christianæ
Amazones, aliæ oculos sibi eruerunt, aliæ se
ipsas præcipitarunt è montibus, ne Virginita-
tem læderent: tu saltem oculos auerte, ne vi-
deant vanitatem. Benedictus pro conseruanda
castitate, se nudum in vepribus cruentauit:
Franciscus in nivibus volutatus est: Xauerus
ad sanguinis è naribus profluvium, vni somnio
impuro restitit. Tu nondum durius carnem
rebellem tractasti, *nondum ad sanguinem restiti-
sti.* Ergo nunc statue, omni diligentia thesau-
rum tam pretiosum seruare, quem si semel ami-
seris, nunquam tota æternitate recuperabis.

X I.

*Quam sordet mihi terra, dum
cælum aspicio!*

VOX erat S. P. NOSTRI IGNATII ad Cœlum aspirantis. Et quid ni sordeat terra, tot plena peccatorum fœtoribus? Quid ni sordeat, quæ stabulum est pecorum? Patria nostra est cœlum. Ibi Patrem DEUM habemus: ibi nos magnus charorum numerus expectat. Bona terrena, quibus hic pascimur, siliquæ sunt porcorum, quæ appetitum nostrum infiniti boni capacem non explent, sed contaminant. Ad maiora, ad altiora Bona creati sumus: Ergo ad illa properemus. *Ad Cælum, Ad Cælum.* Ibi nostra fixa sint corda, ubi vera sunt gaudia, quia pura æterna. Amemus vitam, sed amemus æteram: Quæramus diuitias, sed semper mansuas: optemus voluptates, sed sine felle, sine osinthio perennes: Ambiamus honores, sed non DEUM, nunquam perituros. O nos Vefatos, si stabulum amamus præ palatio, exilium præ patria, lutum præ auro. *Quanta phrenesis, cogitare parum de magno, & cogitare multum paruo: breui tempore curam longissimam, & longissimæ æternitati breuem curam impendere! tanta insania! nolle perdere parum ut multum veris: nolle dare mortem pro vita, terram pro cœlo, tempus pro æternitate; nihil pro bonorum omnium aggregatione.*

DEVS mihi sufficit solus.

Quid appeto? Quid appetendo quæro, & satari in appetendo nequeo? Bonum est quod appeto, bonum quæro, sed nullum bonum creatum, quo facies, inuenio. Vbi es ô bonum meum sufficiens? quæro te intra diuitias sæculi, sed non inuenio: quid enim sunt illæ, nisi mera deliria, figura transiens & somnium? *quo cum dormierint viri diuitiarum, nihil inuenient in manibus suis.* Imò spinæ sunt, quæ sua solitudine pungunt animam & cruentant. At neque inter carnis delicias bonum sufficiens reperio: quantum enim *gaudium peccatoris!* *ad instar puncti est,* gutta mellis in Oceano fellis & absinthij. Quid frustra & inter mundi honores, & inter fauores mortalium exquiro bonum? quantæ indigentia latent sub larua honoris? quantæ fallaciæ fauores Principum? Valere bona non bona, boni indiga, non sine malo bona, quia defectuosa & defectibilia. Solus bonum meum est, qui purum bonum est, qui omne bonum est, qui fons omnium bonorum est indefectibilis, & origo, *DEUS meus & omnia.* *Nimium auarus est, cui DEUS non sufficit.* Quod enim bonum est, quod in DEO cum infinito excessu non contineatur? aut quod bonum est, cum quo DEUS melior sit, quàm sine illo, qui infinitum bonum est? Igitur si amore careo & laude apud homi-

homines, sufficit mihi DEO placere, sufficit laudem apud DEUM habere. Si careo diuitijs, nimis diues sum, cum ius ad DEUM possidendum habeo. *Quidquid mihi dare vult Dominus meus præter se ipsum, dulce mihi non est; auferat totum, & se mihi det.* Ipse solus mihi sufficit, D E U S meus & Omnia.

C A P V T I I.

Remedia

Ad fugienda & extirpanda vitia.

Actis breuiter, in virtutis Palæstra, sanctioris vitæ fundamentis, armandus est Athleta MARIANUS remedijs vitiorum, tum generalibus, tum particularibus, quibus instructus prælia homini, contra hostes animæ feliciter gerat.

Remedia

Contra quodvis peccatum.

1. Remedium est. Oratio, ad quam subito currendum est insurgente aliqua tentatione, tequam cor occupet, inuocando opem DEI, Virginis, & Sancti Patroni, qui in opposita tute floruit. Huiusmodi Orationes sunt. *E U S in adiutorium meum intende. Domine saluum me fac, pereō. Domine vim patior responde*

pro me. MARIA sis mihi propitia. MARIA opitulare. Mater misericordiæ monstra te esse Matrem.

2. Remedium est. Habere frequenter memoriam præsentia DEI, & Angeli Custodis, atque occurrente praua suggestione, seipsum arguere dicendo: *Egone in oculis DEI Iudicis omnia videntis, & Angeli mei custodis, hæc cogitabo? hæc faciam? O Domine malo mori quam fœdari.*

3. Remedium est. Præmente aliqua tentatione recordari Christi patientis, eiusque amore se ipsum vincere dicendo: *Amor meus crucifixus est, & ego voluptati operam dabo! Ab non licet sub spinoso capite membrum esse delicatum. O bone IESU intra vulnera tua absconde me. Ita suadet Apostolus, vt cogitatione Christi passi armemur. 1. Petri 4.*

4. Remedium est. Tempore tentationis devote aspicere imaginem Beatæ Virginis, vel eam sibi in memoriam reuocare, atq; eius amore protestari, se nolle assentiri tentationi. *Propter te, amore tui, o pretiosissima Parens, Domina mea, non cogitabo, non dicam, non faciam.*

5. Remedium est. Meditatio Nouissimorum, nempe Mortis, Iudicij extremi, Inferni, iuxta illud: *Memorare Nouissima tua, & in æternum non peccabis. Eccles. 7.*

6. Remedium est. Fuga otij, quod est puluinar diaboli, & origo omnium vitiorum.

7. Remedium est. Fuga sociorum, locorum aliarumq; occasionum peccati. Nam qui amat periculum, in illo peribit. Ecclesiastici 3.

8. Reme-

8. Remedium est. Vfus frequens Sacramenti Pœnitentiæ & Eucharistiæ. Ex hoc enim diuino epulo robur sumitur ad vincendum hostem animæ: Et de hoc Sacramento dicit Psaltes: *Parasti in conspectu meo mensam aduersus eos, qui tribulant me.* Psal: 22.

9. Remedium est. Dum aliqua tentatio infestat, elicere actum amoris DEI super omnia; talis enim Actus stare non potest cum peccato; ac proinde illud impedit.

10. Remedium est. Examen particulare instituire: ita vt manè proposito facto vitandi tale vel tale peccatum, circa meridiem & vesperti te reflectas, quoties in hoc peccatum lapsus sis, moxq; pœnitentiam ipse tibi imponas, & propositum renoues, tam diu in eo persistendo, quamdiu vitium non extirpaueris.

Hæc sunt remedia generalia contra peccata: Veniamus ad specialia.

Remedia

Contra tentationes Fidei oppositas.

1. Caue ne vnquam cum talibus cogitationibus disputes, ne fallacijs dæmonis in re fidei tam obscura, capiare: sed potius captiuando intellectum in obsequium DEI, illico dices: *Credo omnia, quæ credit Ecclesia Catholica. Credo Domine, adiuua incredulitatem meam.*

2. Reuoca tibi in mentem illa suauissima vincula, quæ in fide Catholica tenebant Augusti-

num, ita de se loquentem, lib. contra Epist. fundam. *Tenet me in hac fide consensus populorum, atq; gentium, tenet auctoritas miraculis inchoata, spe nutrita, charitate aucta, vetustate firmata. Tenet ab ipsa sede Petri Apostoli, usque ad præsentem Episcopatum successio.* Addi potest: Tenet me in hac fide tanta doctorum Sapientia, tanta tot Religiosorum Sanctitas, tanta tot millionum hominum pro hac fide tolerata Martyria. Quæ omnia motiua credibilitatis in nulla secta reperiuntur, nisi in sola Romana Ecclesia, vt vel inde certissimum signum sit, DEUM in ea sola, & per eam loqui.

3. Frequenta ritus Ecclesiæ, præsertim vsum Sanctissimi Sacramenti, vt sic tibi gustanti quàm suauis sit Dominus, sapiant ea, quæ ipse in Ecclesia reuelauit.

4. Vitandæ lectiones librorum vetitorum, conciones item & familiaritates Hæreticorum, vt monet Apostolus *ad Titum* 3.

Remedia

Contra consuetudinem iurandi.

1. Considera, quantus sit DEI contemptus cum nomen eius sanctum & terribile assumitur ad confirmandum dictum falsum; hoc enim nihil aliud est, quàm DEUM, qui est summa veritas, facere testem mendacij, adeoq; facere DEUM mendacem, quæ est ingens DEI contumelia.

2. Considera, consuetudine iurandi amitti
auctori-

auctoritatem in dicendo : nam frequenter & facile iuranti minus creditur, etiam si serio iuret, vt docet *S. Chrysost.* hom. 7. ad pop. *Antioch.*

3. Loco consuetæ formulæ iurandi asuesce alteri modo testandi, qui non contineat iuramentum, dicendo v. g. ita pro certo affirmo, &c.

4. *S. Chrysostomus* hom. 5. ad populum, ad deponendam hanc consuetudinem suadet, vt qui est ei obnoxius, ipse sibi pœnam imponat, quoties in hoc peccatum labitur, v. g. vt impransus cubet; vt toties det Eleemosynam, &c.

Contra superbiam & vanam gloriam.

1. Frequenter sibi imperfectiones, & peccata ob oculos ponere, ob quæ digni sumus omni contemptu.

2. Proponere sibi ante oculos perfectiones Sanctorum, & cum illis se ipsum comparando, confundi.

3. Meditari de humilitate Christi conculcati, consputi, latroni postpositi, atq; nobis dicentis : *Discite à me, quia mitis sum & humilis corde.*

4. De se suisq; factis nihil ad laudem vel vituperium dicere, & oblatam laudem statim Deo offerre.

5. Libenter occupari in functionibus abiectionibus, & cum humilibus conuersari.

6. Laudem & honorem apud solum Deum querere, apud quem solum est laus vera, æterna, inamissibilis, imò est infinita, cum sit ipse

DEUS, iuxta illud Regij Vatis: *Apud te laus mea*
DEUS. Et *Laus mea tu es.*

7. Sæpe cogitare, quod superbus sit contemp-
tibilis hominibus, & DEO odibilis, qui super-
bis resistit, eosq; punit infamia, & peccatis tur-
pibus, vt sibi vilescant.

Contra Iram & Impatientiam.

1. Cum te irâ commoueri sentis, ab omni
verbo abtine, aliò te conferendo, ne aliquod
verbum contra rationem excidat.

2. Aspice Christum Crucifixum, ideam om-
nis patientiæ & mansuetudinis, qui vt dicitur

1. Pet. 2. *Cum pateretur non comminabatur;* atq;
intra eius vulnera tuas molestias depone, vt ibi
dulcescant amore sui Redemptoris.

3. In omni tua aduersitate, oculos mentis
conuerte ad DEI voluntatem sapientissimam,
iustissimam, beneuolentissimam, à qua omnia
aduersa ad nos veniunt, dicendo: *Ita Pater,*
quia sic placitum est ante te.

4. Vide tuos defectus maiores, quos in te to-
lerat DEUS, & alij, & quibus longe maiorem
pœnam mereris, ac proinde in satisfactionem
pro ipsis, accepta aduersitatem.

5. Considera damna, quæ ex ira & impatien-
tia proueniunt. Nam ira non minuit dolorem
sed auget: & præterea vulnus conscientia in-
fligit, priuatq; coronâ. Deinde hominem facit
furentem bestiam. Deniq; præscribit modum,
quo DEUS agere debeat cum iracundo orante:
Dimitte nobis sicut & nos dimittimus. Con-

Contra tentationes impuras.

1. Fugiendæ occasiones, conuersationes, amicitia nociuæ, otium.

2. Custodiendi diligenter sensus, præsertim oculi, aures, lingua, manus, sunt enim fenestræ, per quas mors intrat.

3. Subtrahendum fomentum libidinis, nimis cibus & potus.

4. Adhibenda mortificatio corporis, ieiunia, flagellationes, vigiliæ.

5. Utendum frequenti Communione, vt purissimo corpore Christi corpora nostra sanctificentur.

6. Iuuat plurimum deuotio ad Matrem purissimam, a qua virtus continentia sæpe petenda est, & coram eadem mane & vesperi protestatio facienda, quod quidquid contra Angelicam puritatem acciderit, id præter & contra nostram voluntatem futurum sit, idque amore ipsius.

7. Occurrente tentatione mentem illicò aliò auertere, vel conferendo se ad aliquid seriò agendum, vel recurrendo ad Christum Crucifixum, vel ad Angelum Custodem, vel ad B. Virginem, his verbis: *Virgo purissima per immaculatam conceptionem tuam, munda cor meum ab omni impuritate, in nomine Patris & Filij & Spiritus sancti.*

B 5

Con-

Contra inuidiam & odium.

1. Honorem, laudem, cæteraque bona temporalia non magni facere, sed potius bona altioris ordinis æterna desiderare.

2. Ea frequenter considerare, quæ ad fratrum amorem excitare possunt, qualia sunt, quod omnes simus DEI imagine insigniti, omnes Christi sanguine tincti, omnes ad eandem hæreditatem vocati, omnes eiusdem Diuinæ mensæ participes. &c.

3. Expendere damna inuidiæ, quæ inuidum tristitia inani consumit, omnibus grauem facit, diabolo similem reddit.

Contra Gulam

1. Remedium præscribit Spiritus S. Prou.

23. *Noli esse in conuiujs potatorum nec in commensationibus eorum.*

2. Expendere turpitudinem huius vitij, quod hominem belluam facit, imò deteriorem belluis, quæ naturam ultra satietatem non grauant.

3. Considerare incommoda, quæ ex hoc vitio proueniunt, qualia sunt paupertas, multæ infirmitates, acceleratio mortis, rixæ, homicidia, luxuria, & alia.

4. Pænam sibi statuere pro hoc defectu commisso, die aliquo visitandi pane & aqua, cibumque qui sumendus fuisset pauperibus erogandi.

Con-

Contra tepiditatem.

1. Considera amorem D E I erga nos, & tot beneficia, quibus nos obstringit continuo ad hoc, vt ei feruenter seruiamus.

2. Considerare immensum gloriæ pondus, quod tam facile per opera feruentia promereri possumus, & quod promerendi post mortem tempus non erit amplius.

3. Considerare exempla tot Sanctorum, tum in hac vita, tum in cælo, Deum feruenter laudantium.

4. Considerare finem creationis nostræ, qui non est alius, nisi laudare Deum ei; seruire.

5. Considerare malitiam tepiditatis, quæ ipsa bona opera reddit mala, & nauseam tantam DEO mouet, vt dicat in Apoc. *Vtinam calidus, vel frigidus esses, sed quia tepidus es, incipiam te euomere ex ore.*

C A P V T I I I.**Praxis Exercitij Matutini.**

Adoratio, Fides, Spes, Charitas.

SUMMA ac infinita maiestas, Pater, Fili & Spiritus S. Ego vilissima creatura tua, in centrum nihili mei prostratus, Te Deum verum, vnum in natura, trinum in Personis, supple-

B 6

ado-

adoro, laudo & glorifico cultu latriæ, affectu omnium Sanctorum. In te & tibi omnibus quæcunq; reuelasti, firmissime credo, propter tuam veracitatem infallibilem. In te spem omnem meam de omnibus bonis meis tam temporalibus quam æternis repono, propterea quia scis, vis & potes ea conferre. Te æstimo & amplector super omnes diuitias, honores, voluptates, & super omnia bona creata, propter te, & infinitam dignitatem & bonitatem tuam. Atque in his affectibus hodie & quotidie viuere, operari, pati ac tandem mori volo.

Gratiarum Actio.

Benedicta sit in æternum amabilissima tua. Deus; bonitas infinita, quæ me ex nihilo creasti, ex peccati seruitute redemisti, ad fidem veram vocasti, tot gratijs ingratum hætenus ornasti, præuenisti, adiuuisti, à tot malis animæ & corporis etiam hac nocte præseruasti. Pro istis ac omnibus alijs beneficijs, quibus non solum me, sed omnes & singulas creaturas hucusque cumulasti, confiteantur tibi Domine omnia opera tua, & Sancti tui benedicant tibi.

Intentio.

ECce Domine, hodie, & per totam vitam meam, & æternitatem, me tibi ex integro in holocaustum trado ac offero, corpus & animam meam, memoriam, intellectum, voluntatem, sensus ac omnes potentiās, omnia facta, dicta, cogitata, omnes aduersitates meas, omnes
motus

motus cordis ac respirationes, omnes Syllabas & literas legendas, scribendas, audiendas. Omnia ista vnita meritis vitæ & Passionis Domini nostri I E S U Christi, sanguine eius aspersa, in corde deposita, manibus benedicta, dono, offero, consecro diuinæ Maiestati tuæ.

I. Ex amore tui, ad gustum tibi dandum, & ad maiorem gloriam tuam.

II. In protestationem supremi tui dominij & nostræ subiectionis.

III. In gratiarum actionem pro beneficiis omnibus præsertim N.

IV. In satisfactionem pro omnibus peccatis præsertim N.

V. Ad exhilarandum cor B. Virginis, & SS. præsertim N.

VI. Ad præparandum cor meum in ordine ad communionem.

VII. Ad confundendos dæmones hostes animæ meæ.

VIII. Ad impetrandam mihi virtutem & gratiam N.

Protestatio.

PROtestor verò coram te Domine DEUS meus, & Curia tua cœlesti vniuersa, quod hodie & totâ vitâ meâ, volo viuere, vt decet mancipium IESU & MARIE. Protestor quod mori millies malo, quam peccato præsertim N. te offendere. Protestor quod quidquid hodie acciderit, quod tibi DEO meo displicet, id contra
meam

meam voluntatem erit. Protestor deniq; quod
 toties te hodie amare & laudare volo, quoties
 respirabo, quot fluent momenta in tempore,
 quot literas scribam, &c.

Petitio Auxilij.

A Tua bonitate per Iesu Christi sanguinem
 suppliciter peto benedictionem. Da mihi
 gratiam hodie efficacem, ad vincendas suggesti-
 ones inimici, ad vitanda omnia peccata, præ-
 fertim N. ad promerendam veniam, gratiam,
 & gloriam æternam. Amen.

Ter *Pater* & *Aue*. Et renouetur Formula
 Congregationis: Sancta MARIA Mater
 DEI, &c.

C A P V T IV.

Examen Vespertinum.

Gratiarum actio.

Benedicta sis in æternum, ab omnibus, in
 omnibus, & super omnia, Sancta & indiuisa
 Trinitas, Pater, Fili, & Spiritus Sancte, pro
 omnibus & singulis beneficijs, quæ mihi omni-
 busq; creaturis siue in Cœlo, siue in terra, siue
 etiam in inferno hodie & toto vitæ meæ tem-
 pore, contulisti. Benedico, laudo, & glorifico
 te, pro beneficio creationis, & conservationis
 mei

mei ac omnium creaturarum, pro cooperatione ad omnes actus meos, pro incarnatione, vita, passione & morte Domini nostri Iesu Christi, pro doctrina eius, meritis, exemplis, Sacramentis, pro gratijs omnibus habitualibus & actualibus, in me ac omnes creaturas rationales tam liberaliter effusis, ac demum pro externa protectione, ac præseruatione à pluribus malis animæ & corporis. Benedictio & claritas & gratiarum actio, honor, & gloria tibi DEO nostro in æternum.

Petitio Luminis.

AT quàm ingratus ego hodie beneficijs vixi! illumina quæso Domine oculos mentis meæ, ne obdormiam in morte. Emitte lucem tuam & veritatem tuam, vt cognoscam ac desistem peccata mea, quibus te hodie offendi.

Discussio conscientie.

Hic reuoca tibi in mentem defectus actionum tuarum, reflectendo te supra singulas eo ordine, quo per diem factæ sunt, & obseruando, quid mali in qualibet actione diei cogitasti, dixisti, fecisti, quid etiam boni omisisti, quod facere potuisti, Item considera causas defectuum, & remedia.

Dolor.

OPurum, summum ac infinitum bonum Deus meus, ex amore quo te amplector, & æstimo super omnes creaturas, detestor omnia & sin-

& singula peccata mea, super omnia alia mala, etiam supra ipsam mortem, & doleo quia Te aliquando peccatis meis offendi. Doleo autem pure propter te tuamq; bonitatem infinitam, omni amore dignissimam, quam infelix offendi, & cui materiam displicentiæ dedi. O utinam nunquam peccassem, utinam tibi perfectius seruiuissem.

Proposium.

ECce nunc Domine cum tua gratia firmissime statuo ac propono emendationem. Volo deinceps perfectius tibi seruire, volo occasiones peccandi præsertim N. deuitare. Malo nori & omnia aduersa pati, quam te DEUM meum peccato vnquam offendere. Confirma hoc DEUS per gratiam, quod operatus es in me. Adiutor meus esto, ne derelinquas me, neque despicias me DEUS salutaris meus. Ter *Pater* & *Aue*, & Psalmus *De profundis*, pro defunctis sodalibus.

*****:*****

C A P V T V.

Obseruanda circa quamcunq;
actionem, vt perfectè fiat.

I.

ANte quamcunq; actionem, præsertim longiorem, V. G. ante studia, inuoca breuiter opem

opem diuinam, dicendo: *DEUS in adiutorium meum intende, vel Adiuvā me Domine Deus meus.*

2. Renoua intentionem dicendo: *In gloriam tuam Deus & vitam æternam. Propter te Domine. Renovo intentionem.*

3. In decursu actionis recordare interdum DEI in te, circa te, ac in ipso actionis tuæ obiecto, præsentis atque spectantis, ac tecum & cum tuo obiecto concurrentis. Vnde dices: *Adoro te Domine, hic præsentem, me videntem, mecum concurrentem, me cum hoc obiecto pascentem, illuminantem, calefacientem, &c.*

4. Intuere Christum Dominum, B. Virginem, vel S. Patronum, quā perfectione similem actionem illi exequabantur. illos proinde imitando in vnione actionis ipsorum operare. E. G. In comedendo, recordare Christi in nuptijs, in cœna vltima. Decumbens in lecto, recordare Christi in præsepio, in Cruce, in sepulchro quiescentis. Vestiendo te, Christi ligati, vestibus ignominiosis induti. Lavando faciem, Christi in sanguine suo demersi. Ambulando, Christi per plateas ad iudices tracti, Palæstinam obeuntis. Studendo, Christi docentis, &c.

5. Forma tibi aliquod documentum spirituale ex actione tua eiusq; obiecto, cum aliquo affectu proportionato. E. G. Lauas faciem; cogita quod sanguis Christi emundat nos ab omni peccato, vtinam te emundet! Induis te; cogita exuendum veterem hominem, & induendum

D. IE-

D. Iesum, hocq; pete à Deo. Comedis; cogita aliquas esse istas porcorum, melioribus in Patria Sanctos abundare panibus, illuc proinde feratur desiderium. Decumbis; cogita fore ut sub te sternatur tinea, & operimentum tuum sint vermes.

6. Mortifica te in omni actione, v.g. incommodius sedendo, non carpendo fructum aut florem in horto, subtrahendo gustui ad mensam bolum aliquem, B. Virginis gustui transmittendum.

7. Post actionem, age DEO gratias pro co-operatione, pro tuis defectibus dole, & quidquid boni actum est, offer DEO.

C A P V T VI.

Orationes eiaculatoriæ per diem vsurpandæ *Fidei.*

IN fide viuo Filij DEI, qui dilexit me, tradidit semetipsum pro me.

Credo Domine, adiuua incredulitatem meam.

Spei.

DEus meus misericordia mea. Ps. 58.

In te Domine spero, non confundar in æternum. Psal. 30.

— Domi-

Dominus firmamentum meum, & refugium meum, & liberator meus. *Psal.* 17.

Dominus mihi adiutor, & ego despiciam inimicos meos. *Psal.* 117.

Spes mea ab vberibus matris meæ, DEUS meus es tu. *Psal.* 21.

Charitatis.

DEUS meus & omnia.

Quid volo præter te, DEUS cordis mei, & pars mea DEUS in æternum.

Sero te amaui pulchritudo infinita, sero te amaui. Væ tempori, quo non amaui te. *S. August.*

O summum bonum meum, quando te perfecte amabo?

Quam suavis est Domine Spiritus tuus.

Dulcis & rectus Dominus.

Diligam te Domine virtus mea, firmamentum meum & liberator meus. *Psal.* 17.

Ego autem in Domino gaudebo, & exultabo in DEO IESU meo. *Abac.* 3.

Contritionis.

PECCAUI Domine, miserere mei.

Pater, peccaui in Cœlum & coram te, non sum dignus vocari filius tuus.

Amplius laua me Domine ab iniquitate mea, & à peccato meo munda me. *Psal.* 50.

Malo mori quam fœdari.

Dési-

num, ita de se loquentem, lib. contra Epist. fundam. *Tenet me in hac fide consensus populorum, atq; gentium, tenet auctoritas miraculis inchoata, spe nutrita, charitate aucta, vetustate firmata. Tenet ab ipsa sede Petri Apostoli, usque ad præsentem Episcopatum successio.* Addi potest: Tenet me in hac fide tanta doctorum Sapientia, tanta tot Religiosorum Sanctitas, tanta tot millionum hominum pro hac fide tolerata Martyria. Quæ omnia motiua credibilitatis in nulla secta reperiuntur, nisi in sola Romana Ecclesia, vt vel inde certissimum signum sit, DEUM in ea sola, & per eam loqui.

3. Frequenta ritus Ecclesiæ, præsertim vsum Sanctissimi Sacramenti, vt sic tibi gustanti quàm suavis sit Dominus, sapiant ea, quæ ipse in Ecclesia reuelauit.

4. Vitandæ lectiones librorum vetitorum, conciones item & familiaritates Hæreticorum, vt monet Apostolus *ad Titum* 3.

Remedia

Contra consuetudinem iurandi.

1. Considera, quantus sit DEI contemptus cum nomen eius sanctum & terribile assumitur ad confirmandum dictum falsum; hoc enim nihil aliud est, quàm DEUM, qui est summa veritas, facere testem mendacij, adeoq; facere DEUM mendacem, quæ est ingens DEI contumelia.

2. Considera, consuetudine iurandi amitti auctori-

auctoritatem in dicendo: nam frequenter & facile iuranti minus creditur, etiam si serio iuret, vt docet *S. Chrysost: hom. 7. ad pop. Antioch.*

3. Loco consuetæ formulæ iurandi asuesce alteri modo testandi, qui non contineat iuramentum, dicendo v. g. ita pro certo affirmo, &c.

4. *S. Chrysostomus hom. 5. ad populum*, ad deponendam hanc consuetudinem suadet, vt qui est ei obnoxius, ipse sibi pœnam imponat, quoties in hoc peccatum labitur, v.g. vt impransus cubet; vt toties det Eleemosynam, &c.

Contra superbiam & vanam gloriam.

1. Frequenter sibi imperfectiones, & peccata ob oculos ponere, ob quæ digni sumus omni contemptu.

2. Proponere sibi ante oculos perfectiones Sanctorum, & cum illis se ipsum comparando, confundi.

3. Meditari de humilitate Christi conculcati, consputi, latroni postpositi, atq; nobis dicentis: *Discite à me, quia mitis sum & humilis corde.*

4. De se suisq; factis nihil ad laudem vel vituperium dicere, & oblatam laudem statim DEO offerre.

5. Libenter occupari in functionibus abiectionioribus, & cum humilibus conuersari.

6. Laudem & honorem apud solum DEUM querere, apud quem solum est laus vera, æterna, inamissibilis, imò est infinita, cum sit ipse

DEUS, iuxta illud Regij Vatis: *Apud te laus mea*
DEUS. Et *Laus mea tu es.*

7. Sæpe cogitare, quod superbus sit contemptibilis hominibus, & DEO odibilis, qui superbis resistit, eosq; punit infamia, & peccatis turpibus, vt sibi vilescant.

Contra Iram & Impatientiam.

1. Cum te irâ commoueri sentis, ab omni verbo abtine, aliò te conferendo, ne aliquod verbum contra rationem excidat.

2. Aspice Christum Crucifixum; ideam omnis patientiæ & mansuetudinis, qui vt dicitur.

1. Pet. 2. *Cum pateretur non comminabatur;* atq; intra eius vulnera tuas molestias deponere, vt ibi dulcescant amore sui Redemptoris.

3. In omni tua aduersitate, oculos mentis conuertere ad DEI voluntatem sapientissimam, iustissimam, beneuolentissimam, à qua omnia aduersa ad nos veniunt, dicendo: *Ita Pater, quia sic placitum est ante te.*

4. Vide tuos defectus maiores, quos in te tolerat DEUS, & alij, & quibus longe maiorem pœnam mereris, ac proinde in satisfactionem pro ipsis, accepta aduersitatem.

5. Considera damna, quæ ex ira & impatientia proueniunt. Nam ira non minuit dolorem sed auget: & præterea vulnus conscientiae infligit, priuatq; coronâ. Deinde hominem facit furem bestiam. Deniq; præscribit modum, quo DEUS agere debeat cum iracundo orante: *Dimitte nobis sicut & nos dimittimus.* Cen-

Contra tentationes impuras.

1. Fugiendæ occasiones, conuersationes, amicitia nocuæ, otium.

2. Custodiendi diligenter sensus, præsertim oculi, aures, lingua, manus, sunt enim fenestræ, per quas mors intrat.

3. Subtrahendum fomentum libidinis, nimis cibus & potus.

4. Adhibenda mortificatio corporis, ieiunia, flagellationes, vigiliæ.

5. Utendum frequenti Communione, ut purissimo corpore Christi corpora nostra sanctificentur.

6. Iuuat plurimum deuotio ad Matrem purissimam, à qua virtus continentia sæpe petenda est, & coram eadem mane & vesperi protestatio facienda, quod quidquid contra Angelicam puritatem acciderit, id præter & contra nostram voluntatem futurum sit, idque amore ipsius.

7. Occurrente tentatione mentem illicò aliò auertere, vel conferendo se ad aliquid seriò agendum, vel recurrendo ad Christum Crucifixum, vel ad Angelum Custodem, vel ad B. Virginem, his verbis: *Virgo purissima per immaculatam conceptionem tuam, munda cor meum ab omni impuritate, in nomine Patris & Filij & Spiritus sancti.*

B 5

Con-

Contra inuidiam & odium.

1. Honorem, laudem, cæteraque bona temporalia non magni facere, sed potius bona altioris ordinis æterna desiderare.

2. Ea frequenter considerare, quæ ad fraternum amorem excitare possunt, qualia sunt, quod omnes simus DEI imagine insigniti, omnes Christi sanguine tincti, omnes ad eandem hæreditatem vocati, omnes eiusdem Diuinæ mensæ participes. &c.

3. Expendere damna inuidiæ, quæ inuidum tristitia inani consumit, omnibus grauem facit, diabolo similem reddit.

Contra Gulum

1. Remedium præscribit Spiritus S. Prou.

23. *Noli esse in conuiujs potatorum nec in commensationibus eorum.*

2. Expendere turpitudinem huius vitij, quod hominem belluam facit, imò deteriorem belluis, quæ naturam ultra satietatem non grauant.

3. Considerare incommoda, quæ ex hoc vitio proueniunt, qualia sunt paupertas, multæ infirmitates, acceleratio mortis, rixæ, homicidia, luxuria, & alia.

4. Pænam sibi statuere pro hoc defectu commisso, die aliquo visitandi pane & aqua, cibumque qui sumendus fuisset pauperibus erogandi.

Con-

Contra tepiditatem.

1. Considera amorem DEI erga nos, & tot beneficia, quibus nos obstringit continuo ad hoc, ut ei feruenter seruiamus.

2. Considerare immensum gloriæ pondus, quod tam facile per opera feruentia promereri possumus, & quod promerendi post mortem tempus non erit amplius.

3. Considerare exempla tot Sanctorum, tum in hac vita, tum in cælo, Deum feruenter laudantium.

4. Considerare finem creationis nostræ, qui non est alius, nisi laudare Deum eiq; seruire.

5. Considerare malitiam tepiditatis, quæ ipsa bona opera reddit mala, & nauseam tantam DEO mouet, ut dicat in Apoc. *Vtinam calidus, vel frigidus esses, sed quia tepidus es, incipiam te exomere ex ore.*

C A P V T I I I.

Praxis Exercitij Matutini.

Adoratio, Fides, Spes, Charitas.

SUMMA ac infinita maiestas, Pater, Fili & Spiritus S. Ego vilissima creatura tua, in centrum nihili mei prostratus, Te Deum verum, vnum in natura, trinum in Personis, supple-

B 6

ado-

adoro, laudo & glorifico cultu latriæ, affectu omnium Sanctorum. In te & tibi omnibus quæcunq; reuelasti, firmissime credo, propter tuam veracitatem infallibilem. In te spem omnem meam de omnibus bonis meis tam temporalibus quam æternis repono, propterea quia scis, vis & potes ea conferre. Te æstimo & amplector super omnes diuitias, honores, voluptates, & super omnia bona creata, propter te, & infinitam dignitatem & bonitatem tuam. Atque in his affectibus hodie & quotidie viuere, operari, pati ac tandem mori volo.

Gratiarum Actio.

Benedicta sit in æternum amabilissima tua, Deus; bonitas infinita, quæ me ex nihilo creasti, ex peccati seruitute redemisti, ad fidem veram vocasti, tot gratijs ingratum hæcenus ornasti, præuenisti, adiuvisti, à tot malis animæ & corporis etiam hac nocte præseruasti. Pro istis ac omnibus alijs beneficijs, quibus non solum me, sed omnes & singulas creaturas hucusque cumulaisti, confiteantur tibi Domine omnia opera tua, & Sancti tui benedicant tibi.

Intentio.

ECce Domine, hodie, & per totam vitam meam, & æternitatem, me tibi ex integro in holocaustum trado ac offero, corpus & animam meam, memoriam, intellectum, voluntatem, sensus ac omnes potentias, omnia facta, dicta, cogitata, omnes aduersitates meas, omnes
motus

motus cordis ac respirationes, omnes Syllabas & literas legendas, scribendas, audiendas. Omnia ista vnita meritis vitæ & Passionis Domini nostri I E S U Christi, sanguine eius aspersa, in corde deposita, manibus benedicta, dono, offero, consecro diuinæ Maiestati tuæ.

I. Ex amore tui, ad gustum tibi dandum, & ad maiorem gloriam tuam.

II. In protestationem supremi tui dominij & nostræ subiectionis.

III. In gratiarum actionem pro beneficiis omnibus præsertim N.

IV. In satisfactionem pro omnibus peccatis præsertim N.

V. Ad exhilarandum cor B. Virginis, & SS. præsertim N.

VI. Ad præparandum cor meum in ordine ad communionem.

VII. Ad confundendos dæmones hostes animæ meæ.

VIII. Ad impetrandam mihi virtutem & gratiam N.

Protestatio.

PROtestor verò coram te Domine DEUS meus, & Curia tua cœlesti vniuersa, quod hodie & totâ vitâ meâ, volo viuere, vt decet mancipium IESU & MARIE. Protestor quod mori millies malo, quam peccato præsertim N. te offendere. Protestor quod quidquid hodie acciderit, quod tibi DEO meo displicet, id contra
meam

CAPVT

meam voluntatem erit. Protestor deniq; quod toties te hodie amare & laudare volo, quoties respirabo, quot fluent momenta in tempore, quot literas scribam, &c.

Petitio Auxilij.

A Tua bonitate per Iesu Christi sanguinem suppliciter peto benedictionem. Da mihi gratiam hodie efficacem, ad vincendas suggestiones inimici, ad vitanda omnia peccata, præsertim N. ad promerendam veniam, gratiam, & gloriam æternam. Amen.

Ter *Pater* & *Aue*. Et renouetur Formula
Congregationis: *Sancta MARIA Mater*
DEI, &c.

CAPVT IV.

Examen Vespertinum.

Gratiarum actio.

Benedicta sis in æternum, ab omnibus, in omnibus, & super omnia, Sancta & indiuisa Trinitas, Pater, Fili, & Spiritus Sancte, pro omnibus & singulis beneficijs, quæ mihi omnibusq; creaturis siue in Cœlo, siue in terra, siue etiam in inferno hodie & toto vitæ meæ tempore, contulisti. Benedico, laudo, & glorifico te, pro beneficio creationis, & conservationis
mei

mei ac omnium creaturarum, pro cooperatione ad omnes actus meos, pro incarnatione, vita, passione & morte Domini nostri Iesu Christi, pro doctrina eius, meritis, exemplis, Sacramentis, pro gratijs omnibus habitualibus & actualibus, in me ac omnes creaturas rationales tam liberaliter effusis, ac demum pro externa protectione, ac præseruatione à pluribus malis animæ & corporis. Benedictio & claritas & gratiarum actio, honor, & gloria tibi DEO nostro in æternum.

Petitio Luminis.

AT quàm ingratus ego hodie beneficijs vixi! illumina quæso Domine oculos mentis meæ, ne obdormiam in morte. Emitte lucem tuam & veritatem tuam, vt cognoscam ac defleam peccata mea, quibus te hodie offendi.

Discussio conscientie.

Hic reuoca tibi in mentem defectus actionum tuarum, reflectendo te supra singulas eo ordine, quo per diem factæ sunt, & obseruando, quid mali in qualibet actione diei cogitasti, dixisti, fecisti, quid etiam boni omisitisti, quod facere potuisti, Item considera causas defectuum, & remedia.

Dolor.

OPurum, summum ac infinitum bonum Deus meus, ex amore quo te amplector, & æstimo super omnes creaturas, detestor omnia & fin-

& singula peccata mea, super omnia alia mala, etiam supra ipsam mortem, & doleo quia Te aliquando peccatis meis offendi. Doleo autem pure propter te tuamq; bonitatem infinitam, omni amore dignissimam, quam infelix offendi, & cui materiam displicentiæ dedi. O utinam nunquam peccassem, utinam tibi perfectius seruiuissem.

Propositum.

Ecce nunc Domine cum tua gratia firmissime statuo ac propono emendationem. Volo deinceps perfectius tibi seruire, volo occasiones peccandi præsertim N. deuitare. Malo noni & omnia aduersa pati, quam te DEUM meum peccato vnquam offendere. Confirma hoc DEUS per gratiam, quod operatus es in me. Adiutor meus esto, ne derelinquas me, neque despicias me DEUS salutaris meus. Ter *Pater* & *Aue*, & Psalmus *De profundis*, pro defunctis sodalibus.

*****:*****

C A P V T V.

Obseruanda circa quamcunq;
actionem, vt perfectè fiat.

I.

Ante quamcunq; actionem, præsertim longiorem, V. G. ante studia, inuoca breuiter opem

opem diuinam, dicendo: *DEUS in adiutorium meum intende, vel Adiuvā me Domine Deus meus.*

2. Renoua intentionem dicendo: *In gloriam tuam Deus & vitam aeternam. Propter te Domine. Renovo intentionem.*

3. In decursu actionis recordare interdum DEI in te, circa te, ac in ipso actionis tuæ obiecto, præsentis atque spectantis, ac tecum & cum tuo obiecto concurrentis. Vnde dices: *Adoro te Domine, hic præsentem, me videntem, mecum concurrentem, me cum hoc obiecto pascentem, illuminantem, calefacientem, &c.*

4. Intuere Christum Dominum, B. Virginem, vel S. Patronum, quā perfectione similem actionem illi exequiebantur: illos proinde imitando in vnione actionis ipsorum operare. E. G. In comedendo, recordare Christi in nuptijs, in cœna vltima. Decumbens in lecto, recordare Christi in præsepio, in Cruce, in sepulchro quiescentis. Vestiendo te, Christi ligati, vestibus ignominiosis induti. Lavando faciem, Christi in sanguine suo demersi. Ambulando, Christi per plateas ad iudices tracti, Palæstinam obeuntis. Studendo, Christi docentis, &c.

5. Forma tibi aliquod documentum spirituale ex actione tua eiusq; obiecto, cum aliquo affectu proportionato. E. G. Lauas faciem; cogita quod sanguis Christi emundat nos ab omni peccato, vtinam te emundet! Induis te; cogita exuendum veterem hominem, & induendum

D. IE-

Dominus firmamentum meum, & refugium meum, & liberator meus. *Psal.* 17.

Dominus mihi adiutor, & ego despiciam inimicos meos. *Psal.* 117.

Spes mea ab vberibus matris meæ, DEUS meus es tu. *Psal.* 21.

Charitatis.

DEUS meus & omnia.

Quid volo præter te, DEUS cordis mei, & pars mea DEUS in æternum.

Sero te amavi pulchritudo infinita, sero te amavi. Væ tempori, quo non amavi te, *S. August.*

O summum bonum meum, quando te perfecte amabo?

Quam suavis est Domine Spiritus tuus.

Dulcis & rectus Dominus.

Diligam te Domine virtus mea, firmamentum meum & liberator meus. *Psal.* 17.

Ego autem in Domino gaudebo, & exultabo in DEO IESU meo. *Abac.* 3.

Contritionis.

PECCAUI Domine, miserere mei.

Pater, peccaui in Cœlum & coram te, non sum dignus vocari filius tuus.

Amplius laua me Domine ab iniquitate mea, & à peccato meo munda me. *Psal.* 50.

Malo mori quam foedari.

Dési-

Desiderij ad gloriam Cœlestem.

O Quam sordet terra, dum Cœlum aspicio,
S. Ignat.

Satiabor cum apparuerit gloria tua Domine. *Psal. 16.*

Quam dilecta tabernacula tua Domine virtutum, concupiscit & deficit anima mea in atria Domini. *Psal. 83.*

Quando veniam & apparebo ante faciem
 DEI? *Psal. 41.*

Adimplebis me Domine lætitia cum vultu tuo, delectationes in dextera tua vsq; in finem. *Psal. 15.*

Te exquirat facies mea, faciem tuam Domine requiram. *Psal. 26.*

Vnam petij à Domino, hanc requiram, vt inhabitem in dōmo domini omnibus diebus vitæ meæ.

Gratiarum actionis & laudis.

Benedic anima mea Domino, & omnia quæ intra me sunt nomini sancto eius. *Psal. 102.*

Misericordias Domini in æternum cantabo. *Psal. 88.*

Exaltabo Te DEUS meus Rex, & benedicam nomini tuo in sæcula. *Psal. 144.*

Benedictio, & claritas, & gratiarum actio, honor DEO nostro, in sæcula sæculorum. *Apoc. 7.*

Sedenti in throno DEO & Agno honor & gloria.

Viuat IESUS meus & exaltetur DEUS salutaris mœx,
 Bene.

Benedictus DEUS & Pater Domini nostri IESU Christi, qui consolatur nos in omni tribulatione nostra. 2. Cor. 1..

O SS. Patroni mei magnificate Dominum, mecum, & exaltemus nomen eius in idipsum.

Magnus Dominus, & magnitudinis eius non est finis. *Psal.* 144.

Oblationis.

Domine, quid me vis facere?

O Domine, ego servus tuus & filius ancillæ tuæ. *Psal.* 115.

Tuus sum ego Domine, saluum me fac. *Psal.* 118.

Paratum cor meum DEUS, paratum cor meum. *Psal.* 107.

In tentatione vel aliquo periculo.

Domine vim patior, responde pro me. *Isaie* 38.

Domine salua nos, perimus. *Matth.* 14.

Pater saluifica me ex hac hora. *Ioan.* 12.

Esto mihi in DEUM protectorem & in locum refugij, vt saluum me facias. *Psal.* 30.

Exurge Domine, saluum me fac DEUS meus. *Psal.* 3.

Sub vmbra alarum tuarum protege me. *Psal.* 16.

Adiutor meus esto, ne derelinquas me, neque despicias me DEUS salutaris meus.

Cor mundum crea in me DEUS, & Spiritum rectum innoua in visceribus meis. *Psal.* 50.

In affli-

In afflictione.

ITa Pater, quia sic placitum fuit ante te.
DEO subiecta esto anima mea, quoniam ab ipso patientia mea. *Psal. 61.*

Benedicam Dominum in omni tempore,
semper laus eius in ore meo.

Sicut Domino placuit, ita factum est, sit nomen Domini benedictum. *Iob. 1.*

In ditione tua Domine omnia sunt posita,
& non est qui possit resistere voluntati tuæ. *Esther. 13.*

Domine, hic vire, hic sece, ut in æternum parcas. *Augustinus.*

DEUS meus & omnia. Nunquid tu mihi non sufficis, ut aliquo extra te bono privari doleam? *Lessius.*

Nolo Domine sine vulnere, dum te video vulneratum. *S. Bernardus.*

Domine auge dolorem, sed auge patientiam. *Pius V.*

Plura Domine & maiora mala merui, tu pro me quoq; graviora passus es.

IESU mi Crucifixe, serua mihi aliquem angulum in cruce tua: Ecce me ad patiendum pro te, amplius & amplius, etiam per æternitatem, si ita vis. *P. Franc. Piccolomini S.I. Generalis VIII.*

In prospero successu.

Non nobis Domine, sed nomini tuo da gloriam. *Psal. 113.*

Magnificat anima mea Dominum, & exultavit

uit Spiritus meus in DEO salutari meo. *Luca 2.*

Dextera Domini fecit virtutem, dextra Domini exaltauit me. *Psal. 117.*

Domine quid est homo, quod magnificas eum, aut quid apponis erga eum cor tuum? *Huc spectant affectus gratiarum actionis supra positi.*

Dum Comedis.

Satiabor cum apparuerit gloria tua Domine. *Psal. 16.*

Replebimur in bonis domus tuæ. *Psal. 64.*

Dominus meus IESUS in Cruce sitit, & ego comedam & bibam?

Quam magna multitudo dulcedinis tuæ Domine, quam abscondisti timentibus te!

Quanti mercenarij abundant in domo Patris mei panibus, & ego hic fame pereor! surgam & ibo ad Patrem meum. *Luca 15.*

Cum decumbis.

Qvando requiescam in illa pulchritudine pacis, in requie opulenta?

In pace in idipsum dormiam & requiescam, quoniam tu Domine singulariter in spe constituisti me, *Psal. 4.*

Indica mihi, quem diligit anima mea, vbi cubes in illo meridie æterno. *Cant. 1.*

Dum ambulas.

Dirige Domine DEUS meus in conspectu tuo viam meam. *Psal. 1.*

Vias tuas Domine demonstra mihi, & semitas tuas edoce me. *Psal. 24.*

Erra-

Erraui sicut ouis quæ periit, quære seruum tuum Domine. *Psal. 118.*

Surgam & circuibō ciuitatem, quæram quem diligit anima mea. *in Cant.*

Trahe me Domine post te, curram in odorem vnguentorum tuorum. *in Cant.*

Quando veniam & apparebo ante faciem DEI? *Psal. 41.*

Cum aliquod obiectum sensu percipis.

Delectasti me Domine in factura tua, & in operibus manuum tuarum exultabo.

Benedicite Domino omnia opera eius in omni loco dominationis eius.

O quàm suauior, quàm dulcior, quàm pulchrior es, Deus meus, nunquid enim tibi plus non reseruasti?

CAPVT VII.

Praxis visitandi Sanctissimum Sacramentum.

I. P R A X I S.

Induere affectus Sanctorum adorantium Christum.

Domine Iesu Christe Deus & homo, in hoc SS. Sacramento præsens ego puluis tuus & cinis, adoro te illo affectu, quo te in cunis adorant

rarunt Pastores & Magi. Adoro te illo affectu, quo te adorabat viuens hic in terris, & nunc in Cœlo adorat pretiosissima Parens tua. Adoro te illo affectu, quo te adorauit Centurio, & omnes viatores deuote communicantes, quicumq; tibi placuerunt. Adoro te, deniq; illis affectibus laudis & adorationis, quibus te adorant, adorant, & tota æternitate adorabunt omnes Beati cœlites. Horum voce & affectu tibi Deo meo hic præsentis canto: Sanctus, Sanctus, Dominus Deus Sabbaoth. Dignus es Domine accipere honorem & gloriam & benedictionem. Tibi hic vere præsentis Deo & Agnoscat honor & gloria ab omnibus, in omnibus, super omnia. O si omnium electorum tuorum corda amore tui inflammatis, si ora in laudem tuam eloquentissima, nunc haberem, omnibus illorum cordibus te amarem, omnibus illorum vocibus te laudarem. Sed quia id præstare non possum, ecce nunc illorum omnes laudis, adorationis, amoris, affectus erga te siue elicitos, siue per totam æternitatem eliciendos approbo, & tibi nunc præsentis, ac offero in supplementum meæ tepiditatis. Vos verò omnes Sancti Angeli, vos Sancti Patroni mei, præsertim Tu B. Aloyssi, adiuuate meam impotentiam. Magnificate mecum & pro me istum Dominum meum hic præsentem, & exaltemus nomen eius nunc & in æternum. Amen.

C

I I.

II. PRAXIS.

Adorare omnia Christi constitutiva.

Adoro te, ô Sapiencia Diuina, in hoc SS. Sacramento præsens, quæ omnia possibilia & existentia vides, ipsumque Deum comprehendis, & quæ hoc mirabile Sacramentum innenisti. Adoro te hic præsentem, Omnipotentia Diuina, apud quam non est impossibile omne verbum, quæ omnia in omnibus operaris, & quæ in hoc Sacramento, tot stupenda miracula efficis. Adoro te hic præsentem, ô immensa Bonitas & Liberalitas Diuina, quæ te in hoc Sacramento hominibus tam liberaliter communicas. Adoro te Immensitas Diuina, quæ cum Coelum & terram impleas, hic tamen in exigua hostia tota lates. Adoro etiam te, ô pretiosissima Anima Saluatoris mei, in hoc Sacramento verè ac realiter præsens, cum omnibus potentijs, habitibus, & actibus tuis. Benedictus sit tuus Intellectus hic præsens, scientia infusa rerum omnium, ac visione Dei clarissima illustratus. Benedicta sit Memoria tua, hic præsens, quæ omnium hominum, ac mei etiam indignissimi nunquam obliuiscitur. Benedicta sit Voluntas tua, tot habitibus virtutum supernaturalium ornata. Benedictæ sint omnes Potentiæ tuæ vitales, quæ suis actibus veniam, gratiam & gloriam nobis promeruerunt. Adoro præterea te, & complector toto cordis mei affectu sanctissimum corpus Domini nostri Iesu Christi, hic.

hic realiter præsens, ex purissimo sanguine Virginis Matris, opera Spiritus Sancti formatum, pro salute mea olim crucifixum, nunc verò dotibus gloriosis ornatum. Amplector Pedes tuos cum Magdalena, pro me in Cruce transfixos. Amplector Manus vulneratas, in quibus omnia bona nostra Pater posuit. Amplector Caput spinis coronatum. Amplector Cor ad me summa charitate conuersum. Amplector omnia & singula Vulnera tua, omnes guttas Sanguinis, pretium Redemptionis nostræ. O Domine da vt te sub his speciebus Eucharisticis latentem, digne adorem & laudem, olim verò reuelata facie videam in Cœlo, A.

I I I. P R A X I S.

Salutare Christum in suis officijs.

A Ve Domine Iesu Christe, in hoc Sacramento DEUS abscondite & Saluator. Tu es Rex meus & Dominus meus, ego seruus ille tuus debitor, procido coram te, agnosco plurima debita mea, quæ peccando contraxi, patientiam habe in me, & dimitte vniuersa delicta mea.

A Ve Pater Misericordissime. En ego ad te venio prodigus filius, dissipauì substantiam tuam, recessi à te in regionem longinquam dissimilitudinis, peccaui in cœlum & coram te, amplectere me ad te redeuntem, qui filium prodigum recepisti.

A Ve Magister Sapientissime. En ego coram

te negligens discipulus, doce me facere voluntatem tuam, quia DEUS meus es.

A Ve Pastor Vigilantissime. En ego coram te ouis errabunda. Erravi sicut ouis, quæ perit, quære seruum tuum.

A Ve Medice Prouidentissime, quem Spiritus Domini misit, ut medereris contritis corde. Agnosco infirmitates meas, præsertim N. sana Domine animam meam, quia peccaui tibi.

A Ve Dux peregrinationis nostræ. En ego Viator à Patria aberrans, deduc me in semitam mandatorum tuorum: deduc me per vias rectas, & ostende mihi Regnum DEI.

A Ve omnium donorum & gratiarum Dispensator. En sto ante te pauper, nudus, miser & miserabilis; omnia tibi dedit Pater in manus. Diues es in omnes, qui inuocant nomen tuum: das omnibus affluenter; da mihi Domine virtutem N. Da vsum salutarem huius Ss. Sacramenti, & tandem perseverantiam finalem, in gratia tua.

*****:*****

C A P V T VIII.

Modus Audiendi Sacrum.

DUm prodit ad altare Sacerdos, imaginare Filium DEI de arcano Patris sinu, carne nostra amicum prodire ad Sacrificium pro salute nostra

nostra DEO Patri offerendum, simul etiam vide pondus peccatorum nostrorum eiusdem humeris impositum, quod inclinatio Sacerdotis sub *Confiteor* significat, ubi confessione spirituali peccatorum DEO facta, petes contritus indulgentiam & absolutionem.

In Gloria in excelsis.

Recordare Natiuitatis Christi, eumque natum, ac SSS. Trinitatem pro natiuitate Verbi incarnati cum Angelis lauda, glorifica verbis & affectu huius hymni.

In Collectis.

Recole vitam Christi priuatam, in qua toties ipse pro nobis orauit. & in vnione harum orationum offer DEO orationes Sacerdotis.

In Epistola & Euangelio.

Expende quomodo Christus obeundo Palaestinam praedicauerit Euangelij doctrinam, pro qua age gratias, utq; eam exequaris, gratiam pete.

In Offertorio.

Repraesentatur vltima Coena, in qua Christus se ipsum sub specie panis & vini obtulit, & hoc Sacramentum instituit: pro quo age gratias.

Deinde usq; ad Consecrationem.

Breiter percurre Passionem Christi Domini nempe Comprehensionem, Flagellationem, Coronationem, Contumelias: eundemq;

Regem dolorum, ad compensandas ipsi contumelias, cum sanctis Angelis lauda in Præfatione, cantando ipsi Sanctus, &c. Simul etiam pete vt Christum passum imiteris in patientia.

Elevatio Hostiæ & Calicis.

Representat Crucifixionem Domini, quem cum passione & sanguine ipsius effuso, per manus Sacerdotis offeras DEO in protestationem supremi dominij, in gratiarum actionem pro omnibus beneficijs, in satisfactionem pro omnibus peccatis, & ad impetranda varia dona DEI, & gratias, tam tibi quam viuis & defunctis, pro quibus singillatim orabis, sub *Memento.*

Fractio Hostiæ.

Significabit tibi separationem animæ Christi à corpore, & descensum ad limbum, vbi pete felicem mortem.

Deinceps usq; ad Communionem.

Imaginare Christum, de Cruce depositum in vlnis B. Virginis, cuius affectu amplecteris vulnera Saluatoris tui. Deinde per communionem spiritualem, semper ardens ipsius desiderium inuitabis Christum, deponesque in cor tuum, ceu in sepulchrum, eo tempore, quo Sacerdos communicat; petendo à Christo, vt in te per gratiam suam semper maneat.

Orationes post Communionem.

Denotant Christi apparitiones post resurrectionem; vbi petes gratiam resurgendi à pecca-

peccatis, & felicem resurrectionem post mortem tuam.

Dum Sacerdos benedicit.

Recordare Christi in Cœlum ascendentis dum eleuatis manibus benedicebat. Apostolis. Pete & supplex recipe ab eodem benedictionem.

C A P V T I X.

Praxis recitandi Coronam B. Virginis.

Oratio præuia.

Pater æterne, da mihi gratiam laudandi Filiam tuam. Fili Dei vnigenite, da mihi gratiam laudandi Matrem tuam. Spiritus Sancte Deus, da mihi gratiam laudandi Sponsam tuam. Tu quoq; ô dignissima Virgo & Mater Dei, dignare me laudare te. Ego hanc Coronam tibi offero per manus Angeli Gabrielis, corde ac ore ipsius, ac totius militantis & triumphantis Ecclesiæ, ad gustum Tuum, & gloriam accidentalem; in gratiarum actionem pro omnibus beneficijs Tuis, ad compensandas omnes negligentias meas, in cultu & amore Tui; pro N. N. &c.

C4

PRI-

PRIMA DECAS.

In honorem Conceptæ & Natæ B. Virginis.

Pater noster, &c.

1. **A** *Ve* Maria ab æterno, in primo genitam purarum creaturarum electa, *Gratia plena Dominus tecum, &c.*
 2. Promissa & expectata in lege naturæ & scripta,
 3. Impetrata precibus sterilium parentum,
 4. Præseruata à peccato originali,
 5. *Ave* In instanti Conceptionis Tuæ reddita moraliter impeccabilis,
 6. *M* In instanti Tuæ Conceptionis libera à fomite concupiscentiæ,
 7. *A* In instanti Tuæ Conceptionis, gratiâ & omnibus virtutibus super omnes alias creaturas ornata,
 8. In instanti Conceptionis Tuæ, scientijs infusis & vsu rationis perfecto prædita,
 9. Nata ad orbis decus & solatium,
 10. *Ave Maria* insignita nomine **MARIÆ** die
 14. à Tuo natali, *Gratia plena, &c.*
- I E S V** Tibi sit gloria, &c.
M A R I A Mater gratiæ, &c.

Gratia plena Dominus tecum

DE.

DECAS SECUNDA.

*In honorem pueritiæ & Maternitatis
Marianæ.*

Pater noster, &c.

1. **T**rimula in templo præsentata,
 2. Trimula votum Virginitatis prima
 emittens,
 3. In templo contemplationi vacans, ad
 14. annum ætatis,
 4. Castissimo Ioseph desponsata,
 5. Ab Angelo Gabriele salutata,
 6. Filium Dei obumbrante Spiritu Sancto
 concipiens,
 7. Elisabetham visitans & Ioannem san-
 ctificans,
 8. Ob angorem Sponsi Iosephi sollicita,
 9. Spatio nouem mensium Filium Dei in
 vtero portans,
 10. Expectans horam virginei partûs.
 IESV Tibi sit gloria, &c.
 MARIA Mater gratiæ, &c.

Gratia plena Dominus tecum, &c.

DECAS TERTIA.

In honorem partûs Mariani.

Pater noster, &c.

1. **A**ve Maria Bethleem profecta, ibiq; locum
 non habens in diuersorio, *Gratia ple-
 na Dominus tecum, &c.*

2. In spelunca Deum hominem sine corruptione & dolore parturiens,
3. Natum ex te Deum hominem adorans, & amplectens,
4. Deum hominem pannis inuoluens, & reclinans in præsepio,
5. Deum Infantem lactans ubere de Cœlo pleno,
6. Natum Messiam Pastoribus exhibens,
7. & Circumciso Deo Filio condolens,
8. Nomen Iesu Filio imponens,
9. Tribus Regibus Filium adorandum proponens,
10. In templo primogenitum tuum Deo offerens,

IESV Tibi sit gloria, &c.

MARIA Mater Gratia, &c.

DECAS QVARTA.

In honorem Dei paraseruientis Christo usq; ad passionem ipsius.

Pater noster, &c.

1. **A**ve Maria Fugiens cum Filio in Ægyptum Gratia plena, &c.
2. Per septennium cum Filio in Ægypto exulans,
3. Deum hominem in ciuitate Nazareth educans,
4. Suauissimo contubernio Dei hominis, pluribus annis fruens,
5. In

5. In templo amissum duodennem Fili-
um quærens,
6. Post triduum invento filio gaudens,
7. Deum hominem Tibi subditum habens
8. Primum miraculum in Canæ nuptijs à
filio impetrans,
9. Verba Filij concionantis in corde tuo
conseruans,
10. A Muliere, de tûrba vocem extollente
publicè collaudata,
IESV Tibi sit gloria, &c.
MARIA Mater gratiæ, &c.

Aue
M
A
R
I
A.

Gratia plena, &c.

DECAS QUINTA.

In honorem planctus DEI paræ.

Pater noster, &c.

1. A *Ve Maria*, Filio ad mortem abeunti va-
ledicens, *Gratia plena, &c.*
2. Compassa filio capto, flagellato, spinis
coronato,
3. Occurrens filio crucem baiulanti,
4. Stans iuxta Crucem Filij Crucifixi,
5. Ioanni à Filio è cruce commendata,
6. Ioannem pro Filio acceptans,
7. Cernens cum dolore filium morien-
tem,
8. Cernens filio mortuo latus aperiri,
9. Depositem de Cruce filium sinu ex-
cipiens,

Aue
M
A
R
I
A.

Gratia plena, &c.

10. Filium mortuum sepulchro inferens,
I E S V Tibi sit Gloria, &c.
M A R I A Mater gratiæ, &c.

DECAS SEXTA.

*In honorem DEI præ gaudiorum
 & gloriæ.*

Pater noster, &c.

1. **A** *Ve Maria*, Rediuiui filij prima conspectu
 & amplexu gaudens,
2. Filium in Cœlos ascendentem intuens,
3. Spiritu Sancto die Pentecostes cum Apo-
 stolis repleta,
4. Cum fidelibus in fractione panis Eucha-
 ristici perseverans,
5. *Aue MARIA* Apostolos in conuersione ad fidem po-
 pulorum iuvans,
6. Præ amoris Diuini vehementia in com-
 plexu Filij, & in corona Apostolorum
 suauissimè expirans,
7. Apostolorum humeris ad tumulum
 elata,
8. Cum anima & corpore ad Cœlos as-
 sumpta,
9. Ad Filij dexteram supra omnes Angelos
 exaltata.
10. Cœli terræque Regina declarata,
I E S V Tibi sit gloria. &c.
M A R I A Mater gratiæ, &c.

Gratia plena, &c.

Ter.

*Ternio ultimus.**Pater noster, &c.**Aue Maria Laureola Martyrum coronata.**Aue Maria Laureola Doctorum coronata,**Aue Maria Laureolâ Virginum coronata.**Credo. Magnificat, &c.**Praxis recitandi Corollam 12. stellarum seu virtutum DEIPARÆ.**V. Dignare me, laudare te, Virgo sacrata.**R. Da mihi virtutem contra hostes tuos.**Pater noster &c.**In honorem DEI Patris amantis B.V.M. ut filiam.**1. Aue Maria charitate DEI ardentissima, gratia plena, &c.**2. Aue Maria religione erga DEUM ornatissima.**3. Aue Maria pientissima.**4. Aue Maria obedientissima.**Pater noster.**In honorem Filij amantis B. V. ut Matrem.**5. Aue Maria misericordissima.**6. Aue Maria liberalissima.**7. Aue Maria mansuetissima.**8. Aue Maria patientissima.**Pater noster &c.**In ho-*

*In honorem Spiritus S. amantis B. Virg.
ut Sponsam.*

9. Ave Maria castissima.
10. Ave Maria pauperrima,
11. Ave Maria prudentissima.
12. Ave Maria veracissima.

In fine Salve Regina.

*****.*****

CAPVT X.

Variae Coronæ per hebdomadam dicendæ.

D*ie Dominico in honorem SSS. Trinitatis recitetur in Maioribus globulis : Sanctus, Sanctus, Sanctus Dominus DEVS Sabaoth, plena est omnis terra gloria eius . In Minoribus verò globulis : Gloria Patri, &c.*

Feria Secunda. In honorem Angeli Custodis, in Maioribus globulis dicatur : SS. Angeli Custodes nostri, defendite nos in prælio, ut non pereamus in tremendo iudicio . In Minoribus autem dicatur : Angele DEI, qui custos es mei, me tibi commissum pietate superna custodi, rege & governa.

Feria Tertia. In honorem Beati Stanislai, dicatur in Maioribus globulis : Gloria Patri. In Minoribus : Ave Beate Kostule, Cælestis hortus floscule, meis da IESVM fletibus, da Dominum gemitibus.

Feria

Feria Quarta. Recitetur in Maioribus globulis: *Pater noster.* In Minoribus verò: *DEUS meus & omnia, amo te super omnia.* Vel: *DEUS meus sis benedictus in aeternum.* Vel: *DEUS propitius esto mihi peccatori.*

Feria Quinta. In honorem SS. Sacramenti. In Maioribus globulis: *O salutaris hostia,* In Minoribus: *Laudetur SS. Sacramentum,*

Feria Sexta. In honorem Passionis Domini. In Maioribus globulis: *Adoramus te Christe & benedicimus tibi, quia per S. Crucem tuam redemisti mundum,* In Minoribus verò: *Qui passus es pro nobis, IESU Christe miserere nobis.*

Sabbatho. In honorem Beatæ Virginis. In Maioribus globulis recitetur: *Aue filia DEI Patris, Aue Mater DEI Filij, Aue Sponsa Spiritus Sancti.* In Minoribus autem repetatur suprema vox morientis S. Francisci Xauerij illa: *Mater DEI memento mei.* Vel B. Stanislai: *O Maria sis mihi propitia.*

C A P V T X I.

Obseruanda circa confessionem Sacramentalem.

Ante Confessionem Actus.

1. Confundere ac erubescere cum Publicano nolente oculos ad Cælum leuare.

DEVS

DEVS infinitæ Maiestatis, confundor & erubesco ante te, quod tanta foeditate peccatorum, animam meam sanguine Filij DEI emundatam, contaminauerim. Quod contra te Patrem, ego ingratus filius; contra te supremum Principem, ego rebellis servus; contra te Deum meum, ego vilissimus terræ vermiculus insurrexerim. Quod deniq; me tam exosum oculis tuis ac B. Virginis totiusq; curiæ Cœlestis reddiderim. Ah quam inops sum, quam nudus, gratiâ tuâ spoliatus, quam dignus sum ab omnibus creaturis contemni & odio haberi, propter peccata mea.

2. Admiraberis DEI erga te longanimitatem.

ET quomodo, o Iudex iustissime omnem contra me non armasti creaturam? Quomodo me viuum terra non absorbit? Cur in me fulmina de Cœlo non ruerunt? Tua hoc clementia effecit, o Pater misericordiarum, qui me tunc etiam, cum te peccando oppugnabam, ad ybera tua gestabas, qui me ad hanc insuper poenitentiam non solum expectasti, sed etiam vocasti, & nunc amplexum & oscula mihi paras filio prodigo.

3. Deprecaberis DEUM offensum.

FRetus ergo misericordiâ tuâ, quâ peccatores recipis, ad te venio è regione longinqua dissimilitudinis prodigus filius, procido coram te cum seruo debitore, prouoluor ad pedes tuos

OS

os cum Magdalena, & affectu omnium poenitentium, qui tibi aliquando placuerunt, misericordiam supplex imploro. Peccaui Domine, miserere mei: patientiam habe in me: propitius esto mihi peccatori.

4. Retractatio & Dolor.

DAmno DOMINE, reuoco, & detestor omnia peccata mea, ideo quia tibi displicent, simulq; super omnia doleo ex motiuis omnium virtutum, quia te aliquando DEUM meum offendi. Doleo ex motiuo Charitatis, quia tibi summum bonum omni amore dignissimum materiam displicentiæ præbui. Doleo ex motiuo Spei, quia me à te ô Beatitudo mea auerti, & finem vltimum in creatura constitui. Doleo ex motiuo Religionis, quia tibi excellentissimæ Maiestati, cultum debitum peccando subtraxi. Doleo ex motiuo Obedientiæ, quia tibi supremo Legislatori inobedientem me præbui. Doleo ex motiuo Gratitude, quia tibi maximo Benefactori, pro tot beneficijs tot offensas ingratus exhibui. Doleo ex motiuo Iustitiæ quia Iuri tuo supremo, quod habes in me, contraueni. O vtinam exitus aquarum deducant oculi mei, qui non custodierunt legem tuam! O vtinam nunc omnium poenitentium, lachrymas, contritiones, & amaritudines habeam, quibus desileam peccata mea.

5. Propositum:

AH quando tandem finis turpitudinis meæ!
auxi-

dixi nunc cœpi, statuo firmiter Domine cum auxilio gratiæ tuæ, omnia peccata præsertim NN. omnesque peccatorum occasiones diligenter vitare. Protestor coram te & curia tua cœlesti vniuersa, quod malim mori, & omnia aduersa pati, quam te peccato mortali offendere. Demergo igitur animam meam in sanguinem tuum pretiosissimum, tempore Passionis tuæ in ablutionem peccatorum effusum, & per eandem passionem ac mortem tuam, te rogo, vt deleas iniquitatem meam. Amplius laua me Domine ab iniquitate mea, & à peccato meo munda me.

In ipsa Confessione.

Petita à Sacerdote benedictione, recita imprimis Confiteor. Deinde humiliter, distincte, integre, cum circumstantiis necessariis, ac numero peccatorum grauiorum, non secus ac reus coram Iudice DEO, enumera peccata tua, hoc ordine, vt primo dicas peccata quæ respiciunt DEVM; deinde illa, quæ proximum concernunt, ac demum quæ se ipsum huc, vel simili modo:

Peccata contra DEVM.

Accuso me de omni tepiditate in cultu & amore DEI, Beatissimæ Virginis & Sanctorum Patronorum.

Coronas, examina conscientiæ, aliâq; consue- ta exercitia pietatis, quandoq; negligenter non cum debita attentione & reuerentia, ac deuotione absolui: aut omisi ex negligentia.

Missæ.

Missæ sacrum die profesto ex negligentia omisi, aut etiam die festo.

Confabulatus sum in templo contra reuerentiam SS. Sacramenti.

Iuravi temerè vel falsò toties.

Inspirationibus Diuinis sæpe non obediui.

Omisi ex negligentia Indulgentias, aliasque occasiones meritum.

Mentem ad DEUM rarò eleuabam, nec memoriam præsentia Diuinæ habere studui.

Pro beneficijs à DEO acceptis gratias debitas ipsi non agebam.

Angelo Custodi debitam non exhibebam reuerentiam.

Non excitabam in me desiderium videndi DEUM in cœlo, &c.

Intentionem rectam in meis actionibus non habui.

Contra proximum.

MOtibus iracundiæ inhæsi contra proximum.

Locutus sum verba aspera, mordacia, contumeliosa.

Imprecatus sum malum eidem seriò, deliberatè, vel non, Signa impatientia alteri ostendi.

Detraxi famæ alterius grauiter vel leuiter.

Detrahentes non impediui.

Dehonorauit personam alicuius authoritatis.

Seminaui discordias inter aliquos.

Inuidebam alijs laudem vel honorem.

Iniu-

Iniuste accusavi alterum cum damno ipsius graui vel leui.

Damnum alteri feci in bonis fortunæ.

Percussi alterum grauiter vel leuiter.

Contra seipsum.

COgitationibus superbis vanæ gloriæ, vel nimie de me præsumptionis inhæsi.

Ambiui vanam laudem apud homines.

Aliqua dixi ad laudem mei pertinentia.

Imaginationibus impuris negligenter restiti, vel ijs inhæsi, & delectatus sum deliberate, vel non.

Dedi iisdem occasionem & qualem.

Colloquia obscœna cum scandalo institui, vel audiui cum delectatione, vel non impediui toties.

Negligens fui in custodiendo aspectu alijsque sensibus.

Curiosus fui in videndo, in audiendo, loquendo.

Temperantiam debitam in cibo & potu non seruaui.

Tempus otiose consumpsi.

In fine.

DE his atq; de omnibus totius vitæ meæ peccatis præsertim de omnibus impatientijs & verbis otiosis accuso me, doleo super omnia, ex amore DEI summi Boni, propono cum DEI gratia emendationem, peto pœnitentiam & absolutionem.

Post

Post Confessionem.

Conferes te illic ad agendas DEO gratias pro Beneficio absolutionis, confirmando propositum, & petendo perseverantiam in gratia DEI, quam in hoc Sacramento obtinuisti, quod fieri potest hoc vel simili modo :

BENIGNISSIME IESU, reuertor ad te cum leproso mundato, & cadens in faciem meam ante pedes tuos, gratias ago, quia me à lepra peccatorum sanguine tuo emundasti. Benedicta sit in æternum Bonitas tua, quæ me respexit longe errantem, & non proiecit à facie sua me canem foetidum, sed omnia peccata mea post tergum suum proiecit. Quis sum ego Domine, quia dignatus es me rebellem tibi, me tuum contemptorem, me vilissimum terræ vermiculum, me fugitivum, tam benignè trahere ad te, tam misericorditer osculo pacis donare. Tua hoc bonitas fecit ô Pater misericordiarum, qui me prodigum filium ad te reducem susceperisti, stola gratiæ induisti, paterno amplexu dignatus es. Misericordias igitur tuas in æternum cantabo, & benedicam te in omni tempore, qui propitiaris iniquitatibus meis, qui sanas omnes infirmitates meas, qui redimis de interitu vitam meam, qui coronas me in misericordia & miserationibus tuis.

Quis verò iam amplius me separabit à te ô bone Iesu? an tribulatio? an voluptas? an mors? Nihil horum cum gratia tua mi DEUS. Statuo firmi-

firmiter custodire Iudicia iustitiæ tuæ. Malo mori quam foedari, quia mihi bonum est adhærere tibi, quia tu omni amore dignus es.

Confirma Domine hoc propositum, quod in me operatus es. Adiuua me ô Iesu, virtus mea, firmamentum meum, refugium meum, & liberator meus. Adesto mihi Diuina Mater, peccatorum refugium. Adeste Beati Cœlites, Patroni mei.

Quia verò adhuc tibi Domine ita debitor sum, vt non habeam vnde de meo satisfaciam; idcirco quidquid mihi deest, suppleo ex meritis tuis infinitis, quæ tibi vna cum meritis Pretiosissimæ Matris tuæ, & omnium tuorum Electorum, offero in satisfactionem poenæ debitæ pro peccatis meis. Offero simul etiam cum illis meam hanc exilem satisfactionem Sacramentalem, quam nunc amore tui facio, ipse vindex scelerum meorum: tu eam suscipe & salua me.

Hic absolue pœnitentiam, cum sit pars integralis huius Sacramenti, ne protracta ad statum peccati mortalis tibi parum aut nihil proffit.

C A P V T XII.

Praxis sacræ Communionis.

Ante Communionem.

PRæmittenda est duplex præparatio, Remota & Proxima. Remota consistit l. in puritate cor-

te cor-

te cordis, non solum à sordibus peccati, sed etiam ab affectu inordinato ad aliquam creaturam. Nam vt ait Spiritus Sanctus, anima saturata bonis terrenis, calcatur hunc Coelestem fayum Eucharistiæ.

II. Consistit in aliqua mortificatione pridiæ Communionis faciendæ: quæ mortificatio potissimum afficere debet linguam, & gustum, quibus immediate percipimus sacram Eucharistiæ, vt sic Agnus iste Immaculatus sumatur cum lactucis acerbis & agrestibus.

III. Consistit in excitatione feruentis desiderij ad imminensem breui Communionem. Proxima verò præparatio complectitur hos affectus.

Actus Fidei.

CRedo firma fide, Domine Iesu Christe propter tuam reuelationem, te sub accidentibus Eucharisticis esse verè & realiter præsentem, vnâ cum Diuinitate, anima, corpore, & sanguine tuo pretioso, & quidem per conuersionem totius substantiæ panis in corpus tuum, & totius substantiæ vini in sanguinem. Illum inquam DEUM te præsentem credo, & confiteor in hoc Sacramento, qui ex Patre genitus es, ante omnia secula, eidem consubstantialis: qui pro salute nostra incarnari, nasci, pati, & mori voluisti, qui deniq; à mortuis rediuiuus nunc ad dexteram DEI sedes, Iudex viuorum & mortuorum. Tu es ipse Rex meus, & DEUS meus. Tu Rex gloriæ.

gloriæ Christe. Tu Patris sempiternus es filius. Tu ad liberandum, suscepturus hominem, non horruisti Virginis uterum. Tu ad dexteram Dei sedes in gloria Patris, &c.

Actus Gaudij.

GAUDE & exulta anima mea, ecce Rex tuus venit tibi. En ipse stat post parietem & velamen istorum accidentium Panis. En pulsat ad cor tuum, ut ipsi aperias. O quanta mea felicitas! Regem cœli & terræ meo suscipiam hospitio, illum complectar, quem castis suis visceribus, quem inuicis suis Virgo Mater gestauit, cuius visione omnes Beati in cœlo fatiuntur, &c.

Actus Humilitatis.

SED vnde hoc mihi, ut Dominus meus veniat ad me? Quis enim ego sum Domine? & quis tu? Tu candor lucis æternæ, infinita puritas; ego putredo, ego summa fœditas. Tu immensa Maiestas, ego vermis & cinis. Ergo ne parum est tibi semel in stabulo pro me natum esse, quia iterum hodie ad hoc sterquilinum cordis mei intrare desideras? O Domine exi a me quia homo peccator sum: non est bonum hunc panem filiorum mihi cani putrido dare: non expedit hanc Redemptionis nostræ gemmam pretiosissimam ante porcum proijcere.

Actus Spei.

AT scio Domine, quia etiam catelli edunt de-

men-

mensis Dominorum suorum; scio quia debiles & claudos ad coenam tuam inuitasti, quia cum peccatoribus manducaſti, quia filium prodigum ad te reducem vitulo ſaginato tractaſti. Audio etiam ex hoc Sacramento illam ſuauiſſimam vocem tuam: Venite ad me omnes qui laboratis & onerati eſtis, & ego reficiam vos. Accedo ergo ad te fretus bonitate tua & clementia infinita, cum publicanis & peccatoribus: venio cum filio prodigo: Pater benigniſſime, fac me hodie, ſicut vnum de mercenarijs tuis, qui in domo tua abundant panibus, ego enim fame pereor. Ecce infirmus ſum; ad te ergo Medicum venio. Immundus ſum ac ſitiens; ergo ad te curro, fontem omnis puritatis. Frigidus ac tepidus ſum; ergo ad te propero o ignis, qui ſemper ardes, & nunquam extingueris, vt amore tuo accendar, & conſumar. Tenebroſus ſum; ergo ad te feſtino, vt illuminer a te o lux mundi, o Sol Iuſtitiae. Viator ſum, errans in via ad patriam: ergo ad te confugio, qui es dux, via, veritas & vita.

Inuocatio Sanctorum.

PRetioſiſſima Mater Dei, voſq; omnes Beati Coelites, inuitate quaero hunc Regem veſtrum ad tuguriolum cordis mei, praeparate illud tanto hoſpiti, emundate, exornate veſtris meritis, virtutibus, affectibus. Ornare illud veſtra caſtitate, o SS. Virgines; veſtra humilitate, Confeſſores; veſtra patientia, Martyres; veſtra

charitate, Apostoli; vestra fide, Patriarchæ & Prophetæ; vestra deuotione, Angeli & Archangeli. Tu verò Mater Misericordiæ depone ex vlnis tuis virgineis hunc filium tuum, in sinum cordis mei, sicut illum in duro præsepio reclinasti, simulque concede mihi illos affectus amoris, quibus solebas eum amplecti, stringere, osculari.

Desiderium & Inuocatio Christi.

Q Vis mihi det te ô dulcissime Iesu sugentem vbera Matris meæ, vt amplectar te. & deosculer? Pater æterne, qui sic dilexisti mundum, vt ei vnigenitum filium tuum dares, da mihi nunc eundem. Fili vnigenite Dei, qui de sinu Patris ad terram descendisti, descende Domine ad cor meum. Spiritus Sancte, qui Beata Virginem Mariam dignum habitaculum Filio Dei fecisti, effice in me quoq; hospitium Filio Dei. Desidero te millies mi Iesu, quando venies, me laetum quando facies? Quid mihi est in cœlo, & præter te quid volo in terra? Deus cordis mei, & pars mea Deus in æternum. Quemadmodum desiderat cervus ad fontes aquarum, ita desiderat anima mea ad te Deus. Paratum cor meum, paratum cor meum. Veni Domine & noli tardare, veni dulcedo mea, veni requies mea, salus animæ meæ, vita mea, Deus meus & omnia.

Post

Post Communionem.

Salutatio Christi & Adoratio.

Desideratissime hospes animæ meæ, procumbo ad pedes tuos cum Magdalena, teq; supplex saluto in corde meo, &c. *Vide quæ supra dicta sunt cap. 6.*

Affectus Amoris.

IESV dulcis hospes animæ meæ, te super omnes diuitias, honores, voluptates & super omnia bona creata æstimo, & amo pure propter te, & bonitatem tuam infinitam. Æstimo autem & amo te, quantum est ex me summè intensiue, summè appetitiue, Seraphice, Marianè, Theandrice, modis possibilibus mihi, gratissimis tibi, tibi debitis, te dignis. Amplector pedes tuos, pro salute mea clavis transfixos; exosculor manus vulneratas; exosculor latus sacratissimum lancea perforatum. Amplector & exosculor caput spinis coronatum, & omnia ac singula vulnera, quæ pro nostra redemptione pati voluisti. Amplector autem te affectu Beatissimæ Virginis Matris, affectu S. Iosephi, B. Aloysij, &c. & omnium Electorum tuorum, siue comprehensorum. O quis mihi det illorum corda & affectus, ad te mihi Iesu diligendum? Gaudeo quod ab illis amaris perfectè, eorumq; affectus siue iam elicitos, siue tota æternitate eliciendos, tibi nunc offero, vna cum illo affectu, quo te SS. Trinitas amat. Sancti Patroni mei amate in corde meo, laudate & magnifica-

tē mecum hunc Dominum meum, & exaltemus
nomen eius in idipsum.

Gratiarum Actio.

Liberalissime Domine, quomodo tam copiose super me indignissimum effundis beneficia tua? Quid tibi in me placuit, quod ab æterno de me cogitasti, meq; charitate perpetua dilexisti, & ut spero ad gloriam æternam prædestinasti: Quid promerui, quod me in tempore ex nihilo creasti, relictis in abyſſo nihili infinitis creaturis melioribus? Quod me tibi semper rebellem huc vsq; conseruas, & in sinu tuo portas? Quid dignum in conspectu tuo egi, quod pro me seruo tuo redimendo incarnari, nasci, laborare, pati, ac mori voluisti? quod mihi reliquisti infinita merita tua, doctrinam, exempla, sacramenta? Quod me toties, non lacte vt mater filium, sed corpore & sanguine tuo reficis, & nunc etiam refecisti? Quod deniq; me tot gratijs habitualibus ornasti, tot gratijs actualibus præuenisti & adiuuisti? Agnosco & amplector viscera pietatis tuæ, quibus me diligis, agnosco misericordes oculos, quibus respexisti super canem mortuum, similem mihi: atq; pro hac tua liberalitate, ac pro omnibus & singulis beneficijs, præsertim pro isto ad me hominiano descensu, tibi gratias ago in vnione omnium affectuum, quibus te laudant Sancti tui in coelo. Benedic anima mea Domino, & omnia quæ intra me sunt nomini sancto eius. Benedicam

cam

cam Dominum in omni tempore, semper laus eius in ore meo.

Oblatio Sui.

Sed quid retribuam Domino pro omnibus quæ retribuit mihi? Nihil habeo Domine, nisi ista duo æra minuta, corpus & animam, nisi me ipsum, & quidem iam tot titulis tibi debitum. Meipsum ergo tibi in Sacrificium trado, & offero. Suscipe Domine Intellectum meum, & Memoriam, ut de te, propter te cogitem. Suscipe Voluntatem, ut id velim quod tu vis, id nolim quod tu non vis. Suscipe Cor meum, ut te solum amet. Suscipe denique omnes animæ meæ & corporis Potentias ac vires, ut in omnibus suis operationibus, ad solam nominis tui gloriam tendant.

Petitio.

Domine non dimittam te, donec benedixeris mihi. Benedic quæso sicut vis, scis, & potes cordi meo, ut te diligat. Benedic omnibus animæ meæ facultatibus, ne te vnquam offendant. Da mihi veniam peccatorum meorum, da profectum in virtute præsertim N. Da vsum salutarem huius sacramenti, ut in fortitudine cibi huius, coram te ambulem perfecte, donec perueniam ad te ô Deus meus, vnicum ac summum bonum meum.

Ad B. Virginem.

Ad te etiam supplex accedo Virgo & Mater
 D 3 Dei

Dei ac Domina mea. . Ago tibi gratias, quod hunc Filium Dei Dominum meum, quem ego nunc in sacramento suscepi, in vterum tuum suscepisti, quod ei sanguinem tuum purissimum ad formandum hoc corpus suppeditasti, quod illum pro hoc usu meo nutruisti & educaisti. Beata viscera tua, quæ portauerunt hunc æterni Patris filium, & beata vbera, quæ lactauerunt Christum Dominum. Tu in me illum amplectere. Tu illi tanta in corde meo illud tuum Magnificat, quo SS. Trinitatem delectasti: Tu mihi concede illos tuos affectus amoris, quibus eundem siue in vtero, siue in vlnis tuis prosecuta es: ac demum impetra quæso mihi ab illo vel micam donorum & gratiarum, quas ipse tibi pro hospitio rependit.

*****:*****

C A P V T XIII.

Actus Virtutum Theologicarum & Moralium.

Habentur in Corde Sancto Theophili Mariani, à nobis edito, quò Lectorem remittimus.

CA-

CAPVT XIV.

Praxis Laudandi DEUM.

IN qualibet creatura, quam sensu percipis, adora, lauda & ama aliquam perfectionem Dei, in tali creatura relucentem. V. g. in cœlo magnitudinem, in sole claritatem, in flore pulchritudinem: *O quam pulchrior, quam clarior Domine, &c.*

2. DEO age gratias pro creatione, conseruatione, cooperatione, gubernatione, omnium & singularum creaturarum. O Domine sis benedictus in æternum, qui me cum hoc Sole illuminas, cum hoc igne calefacis, cum hoc flore recreas, &c. Quot stellæ in cœlo, quot guttæ in mari, quot atomi in terra, quot creaturæ in hoc vniuerso sunt, fuerunt & erunt, toties te pro omnibus & singulis momentis creationis ipsarum, & conseruationis, nec non concursus tui cum ipsis, laudo & glorifico.

3. Omnia bona opera omnium hominum & Angelorum, quæ tibi Domine vnquam placuerunt, vel adhuc placebunt, approbo, & tibi offero ad gustum tuum: & contra quot peccata in hoc vniuerso fuerunt, sunt & erunt, toties illa detestor, & retracto, teq; amo super omnia, in recompensationem aliquam pro illis.

4. Facio tale pactum ô DEUS tecum. Quoties

D 4

per

per hunc diem respirabo, toties in me volo trahere corda, & affectus electorum tuorum, atq; illis toties te amare, & laudare, & quidem in proportionem geometrica dupla; ita vt sequens affectus sit duplo intensior, quam fuerit præcedens.

5. Conuersus ad quatuor Orbis partes, quater genu flecte, adorando DEUM nomine omnium hominum in mundo viuentium, præsertim fidelium & peccatorum, dicendo cum Seraphinis: *Sanctus, Sanctus, Sanctus Dominus DEUS. Vel: Regi seculorum immortalis soli DEO honor & gloria.*

C A P V T X V.

De modo colendi Christum Dominum, & Festa ipsius per Annum celebrandi.

Vniuersaliter ad cultum Christi Domini hæc conducent.

I.

FRequenter illum adorare, siue in Eucharistia, siue in Coelo, vbi illum contemplaberis vt Gubernatorem, vt summum Pontificem, vt omnium gratiarum Dispensatorem, dicetq; dum coelum aspicias: *Sedenti in throno DEI, & Agno honor & gloria.*

2. De-

2. Desiderare & procurare, vt gloria & amor Christi promoueatur vbiq; & semper.

3. Procurare vt actiones tuæ sint similes actionibus ipsius.

4. De illius officijs, excellentijs ac meritis, loqui, legere, meditari.

5. Honorare illum in proximis tanquam Caput in membris.

6. Offerre sæpius ipsius merita, SS. Trinitati, offerre etiam Patri æterno illud Sacrificium, quod Christus Dominus perpetuo offert in Cœlo: *Pater respice in faciem Christi tui.*

7. Elicere 33. affectus erga Christum, in honorem 33. annorum ipsius vitæ. Sunt autem hi, vel similes.

Affectus erga D. IESVM.

Qui etiam disponi possunt per decades Coronæ.

I. Adoratio.

Iesu Excellentissime, te adoro cultu latriæ verum DEUM ac supremum Dominum meum.

2. *Fides.* IESV Veracissime, in te credo, & omnia quæcunque reuelasti, firmissime amplector propter te.

3. *Spes.* IESV Benignissime, in te spero & per merita tua, veniam, gratiam & gloriam.

4. *Amor.* IESV Amabilissime, te super omnia bona creata æstimo, ac diligo toto cordis mei affectu.

D 5

5. Gra-

5. *Gratulatio.* IESV Perfectissime, cum tota Ecclesia gratulor tibi, & gaudeo de tua Diuinitate, de omnibus excellentijs tuis.

6. *Gratitudo.* IESV Beneficentissime, pro tua incarnatione, doctrina, meritis, sacramentis & pro gratijs omnibus, sis benedictus in æternum.

7. *Zelus gloriæ Christi.* IESV Honorabilissime, desidero vt ab omnibus creaturis rationalibus super omnia lauderis & ameris in æternum.

8. *Dolor.* IESV Dignissime, doleo super omnia mala, de omnibus peccatis, negligentijs, ac irreuerentijs, quibus aliquando à me, & ab omnibus peccantibus offensus es.

9. *Oblatio sui.* IESV Liberalissime, totus sum tuus, eroq; in æternum, sicut tu totus meus esse voluisti.

10. *Petitio.* IESV Misericordissime, per vulnera tua esto mihi IESVS & Saluator nunc & in morte mea.

Hi affectus cum semper usurpari possint, sunt tamen alij, qui magis sunt accommodati singulis festis Saluatoris, de quibus aliquid dicendum.

In Aduentu Exercitia.

I.

Visitabis sæpius in vtero Beatissimæ Virginis Christum, tanquam in carcere pro liberatione tui existentem, & in honorem nouem mensium, quibus ibi mansit, elicies nouem actus, quales sunt, Fides de Incarnatione Verbi Diui-

ni, Adoratio eiusdem Verbi Incarnati, Amor eiusdem, in vnione amoris, quo illum in vtero suo amabit Beatissima Virgo, Gratiarum actio pro beneficio Incarnationis, & similes.

2. Quoniam DEVS per incarnationem specialiter manifestauit sua attributa, benedices omnia & singula, hoc modo: Domine sis benedicta ab omnibus super omnia tua Potentia, quam ostendisti vnice ndo tam mirabiliter Verbum humaniati. Sit benedicta Sapientia tua, qua inuenisti modum tam proportionatum saluandi genus humanum. Sit benedicta Liberalitas tua, qua nobis filium tuum, & omnia cum illo donasti. Sit benedicta Misericordia tua, qua nostras misérias suscepisti. Sit benedicta Iustitia, cui vt satisfaceres ad æqualitatem pro nostris peccatis, carnem passibilem suscipere voluisti, &c.

3. Imitando VERBUM Incarnatum, in honorem ipsius muti & humiliati, hoc tempore exercebis te potissimum in refrenandis vitijs linguæ, & in actibus humilitatis. Item ad imitandam vnionem hypostaticam, exercebis te in vnione morali cum DEO, quæ consistit in destructione amoris proprii, qui est velut substantia hominis veteris & terreni, & in amore DEI, per quem homo vnus cum DEO spiritus efficitur.

4. *Petitiones* hoc tempore istæ possunt esse? VERBUM Incarnatum, de celo in terram descendens, da vt ego hinc in cælum tendam, & perueniam.

am. Fili DEI, qui factus es filius hominis, da ut ego fiam Filius DEI.

O Sapientia Incarnata, quæ ad me docendum venisti, da ut obseruem doctrinam tuam.

Tessera hoc tempore frequenter repetenda, sit hæc: Veni Domine & noli tardare.

In Natiuitate Domini.

I.

ALiquoties de die, nunc cum Pastoribus, nunc cum Angelis cantantibus Gloria in excelsis, nunc cum Magis, salutabis & adorabis in stabulo Christum natum, hoc modo: VERBUM Incarnatum, adoro in hoc paruo tuo corpusculo, immensitatem tuam, quæ cælum & terram implet. Adoro in hac paupertate diuitias gloriæ tuæ. Adoro in hac tenella ætate, tuam æternitatem. Adoro in hac muta infantia tuam sapientiam infinitam. Adoro in hac carne mortali tuam immortalitatem. Salue Rex Regum, Rex pacifice, Princeps pacis, veni & impera nobis. Salue ò lux mundi illuminans pastores: illumina quæso tenebras meas. Salue pastor, quærens in hoc stabulo ouem perditam: quære me, quia ouis sum perdita. Salue Magister veritatis, docens ex hac Cathedra præsepj: doce me facere voluntatem tuam.

2. Toto die per imaginationem versaberis in sacro stabulo, in quo natus est Christus. Itaque decumbes prope bouem & asinum, qui Christo præstabat obsequium. Dum te indues, recorda-

daberis fasciarum Christi Infantis. Dum comes, recordaberis lactis virginici, quo Christum Virgo Mater nutriebat. Audiendo cantum, recordaberis cantus Angelici in stabulo. Dum examen facies, putabis te cum S. Iosepho verre stabulum, iuxta illud Davidis: *Scopebam Spiritum meum.*

3. Communio sacra sic fieri potest. Cor tuum est stabulum, in quo Christus nasci debet per gratiam, quam immundum & bestialibus affectibus plenum! *Primo* ergo te humiliabis coram D E O. *Secundo*, Emundabis cor tuum per contritionem. *Tertio*, Videndo quod non sit locus Christo nato in diuersorio, inuitabis eum ad cor tuum, petesque a Beatissima Virgine, ut filium suum in corde tuo tanquam in duro praesagio deponat. *Quarto*, Sic introducto Christo per Communionem ad stabulum cordis tui, varia illi obsequia praestabis: itaque adorabis eum cum Pastoribus ac Magis, offeresque aliquam spontaneam incommoditatem, quam suscipies in honorem Christi, aliquid simile in sua Natiuitate patientis. Complecteris ipsum affectu Sancti Iosephi & Beatissimae Virginis, ac velut Bos & Asinus, comparatus scilicet iumentis insipientibus, eundem amore tuo feruenti calefacies. Ligabis fascijs non tam illum, quam tuam rebellem voluntatem, faciendo aliqua sancta proposita. Parabis balneum illi ex lacrymis contritionis, & compassionis erga Salvatorem tuum iam in sua Infantia pro te pati incipientem.

entem. *Quinto.* Obturabis foramina sensuum tuorum, interdiu custodiendo oculos, linguam, aures, ne ventus frigidus tepiditatis incommodum offerat Christo, quem in cor tuum suscepisti.

Tessera huius diei, ad singulas horas pronuntianda hæc erit: VERBUM CAROFACTVM EST, & habitauit in nobis, Vel; IESV tibi sit gloria, qui natus es de Virgine.

In Nouo Anno.

I.

Reuocabis in mentem beneficia, quæ hoc anno à DEO recepisti, & in gratiarum actionem offeres IESVM in circumcisione cruentatum.

2. Cum dolore commemorabis tibi peccata quibus DEVM anno elapso offendisti, & in Sanguine Christi in circumcisione effuso, abluēs animam tuam, statuesque firmiter pro anno sequenti melius DEO seruire, & vitare peccata, præsertim aliquot grauiora in particulari.

3. Pro strena offeres SS. Trinitati IESVM natum & circumcissum, per quem pro strena vicissim petes benedictionem & gratiam sancte viuendi in anno sequenti.

Tempore Passionis.

I.

Nillum diem omittes, quo aliquid de Passione Domini non mediteris, vel legas, ea quæ inferius habentur.

2. Mortificationes hoc tempore crebrius usurpan-

surpandæ, quales sunt disciplinæ, catenulæ, formus in lecto duriores, &c. &c. In honorem flagellationis, vinculorum, & crucifixionis Dmi.

3. In Actionibus ordinarijs retinebis memoriam Domini patientis, iuxta ea, quæ circa hoc dicta sunt cap. 3.

4. Videndo Imaginem Christi patientis, vel audiendo aliquod mysterium passionis, excita- bis in te affectum gratitudinis, & offeres Christum patientem pro tuis peccatis, quatenus Christo patienti oppositis. E. g. Sudorem Christi pro tua tepiditate in obsequio Diuino, flagella- tionem pro sensualitate, spineam coronam pro ambitione, contemptum Domini pro superbia, crucifixionem pro impatientia, &c.

5. Curabis pro tua parte compensare ea, quæ Dominus pro te patitur. Itaque adorabis Ma- iestatem eius contemptam, amabis Bonitatem infinitam odio habitam, laudabis & glorificabis Sapientiam derisam, Innocentiam contumelis affectam, Sanctitatem inter sceleratos reputa- tam, dicendo: *Domine quot contemptus, quot con- tumelias, quot odia pertulisti, tot tibi affero affe- ctus laudis, honoris, amoris.*

6. Affectu compassionis omnia & singula vul- nera Saluatoris salutabis hoc modo: Aue sedes Sapientiæ Caput Saluatoris mei, pro mea super- bia coronâ spineâ redimitum: heu me, ego te meis cogitationibus superbis, inhonestis, &c. ceu spinis laceravi. Aue Frons sole serenior spinis cruentata, in lapsu percussa. ignosce quæ-

so inuerecundiæ meæ. Auete Oculi, cæli sydera, pro me velati, contusi, livore pleni: adoro vos, & damno meam curiositatem, meam vanitatem, &c. Auete Aures, portæ cordis, semper ad orationem nostram apertæ, & in Passione contumelijs sauciata: vtinam aures meæ sint apertæ inspirationibus djuinis. Ave Vultus, Angelis desiderabilis, per alapam tuam, per spūta; non te auertas à me. Ave dulce Os, pro me felle & siti cruciatum. Ave Collum funibus constrictum, felle imbutum, propter meam intemperantiam. Auete Humeri crucem sustinentes, & flagellis coësi. Auete Manus, vnde bona omnia procedunt, ligatæ & clauis transfixæ, pro nostris rapinis, vindictis alijsque manuum peccatis. Auete Pedes perforati. Ave Latus apertum, porta Domini, per quam Iusti intrant, fenestra humanitatis; intrem & ego per Te ad vitam æternam. Ave deniq; Cor Domini mei dulcissimum, Regia charitatis, refugium miserorum, meis voluptatibus afflictum, cruciatum, ac tanto erga nos amore accensum, per hoc ipsum Cor tuum. Te rogo bone IESV, ne permittas, vt sanguis tuus pretiosus sit pro me frustra effusus.

Tesseræ huius temporis. Qui passus es pro nobis, IESV Christe miserere nobis.

In Resurrectione Domini.

I.

Salutabis Christum Dominum Rediuium,
cum

cum Beata Virgine, cum sanctis mulieribus, cum Apostolis &c.

2. Crederes firma fide, eum resurrexisse verè.

3. Sperabis per mortem eius felicem resurrectionem.

4. Gaudebis de eius resurrectione, & de dotibus gloriosi corporis.

5. Petes à vitij resurrectionem spiritualem.

Tessera huius temporis, hæc erit: Vivat Iesus redivivus. Credo quod Redemptor meus vivit.

In Ascensione.

I.

PROstratus ad pedes Christi Domini ascendentis, cum Beata Virgine, & Apostolis, valedices ipsi, & gratias ages pro laboribus spatio 33. annorum toleratis, ac pro consummato opere nostræ redemptionis.

2. Offeres illi abeunti pro viatico cor tuum, ut illud secum accipiat, & à terra attollat, cœloque affigat. Offeres & aliquas tuas resolutiones ac proposita transmittenda per Christum SS. Trinitati, v. g. Quod DEum nullo peccato mortali offendere velis; quod gloriam eius maiorem propagare cupias &c.

3. Petes humillimè ut eleuatis manibus benedicat tibi, illà benedictione, quam dedit SS. Apostolis.

4. Gaudebis de gloriosa eius ascensione & exaltatione nominis ipsius, ac de illo amplexu, quo

quo SS. Trinitas Christum suscepit in cœlo.

5. Gratias ages SS. Trinitati pro ista exaltatione triumphali Christi Domini. Gratias item ages Angelis & SS. Patriarchis, quod Christum triumphantem ad cœlum deduxerint, ibique Regem suum adorauerint.

6. Adorabis in cœlo Christum, vt Regem, vt supremum Pontificem, vt Aduccatum, & Thesaurarium.

7. Desiderabis cum illo esse, & viuere in æternum.

Tessera huius diei sit hæc: IESV tibi sit gloria, qui victor in cælum redis. Sedenti in Throno DEO, & Agno honor & gloria.

Die Pentecostes.

**Tale exercitium proponit P.
M.P. Gaspar Druzbecki Societ:
IESU in MSS.**

I.

Concipiatur æstimatio dignitatis, bonitatis, potentia, quam habet Spiritus Sanctus.

2. Desiderium eius presentia.

3. Investigatio eorum, quæ me impediunt, quo minus Spiritum Sanctum plenè capiam, cupientem se mihi per sua dona copiosà communicare.

4. Mei abiectio, humiliatio, annihilatio, in eius conspectu.

5. Ad-

5. Addi potest gratiarum actio, pro descensu in Apostolos, & pro omnibus illustrationibus ac inspirationibus, mihi à Spiritu Sancto datis.

6. Addi potest dolor de defectibus, quibus restiti Spiritui Sancto, eumq; in me contristavi.

7. Inuocatio eiusdem ad animam, tanquam ad templum suum; veniat ignis ad frigus, aurum ad lutum. Spiritus ad carnem. Vbi adhiberi potest intercessio Beatæ Virginis & Apostolorum recipientium Spiritum Sanctum.

8. *Peritio* eorum donorum à Spiritu Sancto, quibus hodie repleuit Beatam Virginem & Apostolos.

Tessera huius diei: Veni Sancte Spiritus, & emitte caltus lucis tue radium. Vel: Cor mundum crea in me DEVS, & spiritum rectum innoua in visceribus meis. Ne proijcias me à facie tua, & Spiritum Sanctum tuum ne auferas à me. Psal. 50.

In Festo Corporis Christi.

Præter ea quæ dicta sunt de visitatione SS. Sacramenti, quam in hoc festo sæpius repetere par est, ad deuotionem sequentes iuuabunt:

Affectus erga SS. Sacramentum.

1.

Credo firmâ fide, & confiteor Domine IESV Christe, te in hoc Sacramento esse verum DEVM & hominem, & quidquid sancta Mater Ecclesia credendum proponit, firmissimè amplector.

2. *Ad-*

2. *Adoro* te, hic præsertim, cultu latriæ, affectu totius Ecclesiæ militantis & triumphantis.

3. *Gaudeo* de omni honore & gloria, quam habes ab Angelis, & fidelibus per totum mundum, in hoc Sacramento.

4. *Doleo* de omnibus hæresibus, blasphemijs, sacrilegijs, irreuerentijs, quibus ab hæreticis & malis Catholicis in hoc Sacramento offenderis.

5. *Ago tibi gratias* cum tota Ecclesia tua, pro instructione, administratione, & vñu huius Sacramenti, tam mihi, quàm alijs, concessio.

6. *Desidero*, vt ab omnibus creaturis rationalibus adoreris, & glorificeris in hoc Sacramento, & digne suscipiaris &c.

7. Domine totus sum tuus, eroque in æternum, sicut totus meus esse voluisti in hoc Sacramento.

8. SS. Trinitas respice in faciem Christi tui hic vere præsentis, quem tibi nunc offero, in sacrificium Latreuticum, Eucharisticum, Propitiatorium, Impetratorium.

9. Da mihi quæso gratiam, vt te in hoc Sacramento, prout oportet, colam, & suscipiam, ac demum in cœlesti conuiuio da, vt te fruatur in æternum.

Tessera huius diei ad singulas horas repetenda: *Landetur* SS. SACRAMENTVM.

CA-

CAPVT XVI.

Breues Meditationes de Passione Domini.

Christus Valedicit SS. Matri.

I.

CONsidera anima mea, quàm obediens fuerit Christus voluntati Patris æterni, cui vt obediret, voluit etiam Matri suæ Sanctissimæ, quam adeò amabat, valedicere, ipsamq; relinquere ac affligere, properando ad crucem, & dolores, ac cruciatus acerbissimos. Tu verò quoties ad DEI inspirationes obsurdescis! quam nimis es affixus rebus creatis, quæ te in amore DEI impediunt! Erubescere coram DEO, & nunc tandem dic vale omnibus salutis impedimentis, quamvis tibi charissimis, idq; amore Christi, & studio imitandi ipsum.

2. Considera, quo dolore, quibus lacrymis excepit hanc valedictionem. Filij sui SS. Mater, quæ tantoperè Christum, non vt hominem tantum, sed etiam vt DEVM diligebat: ex altera parte, vide quàm patienter, hoc triste nuntium tulit; non conquerendo, non signa vlla impatientiæ ostendendo, sed potius conformando se diuinæ voluntati. Tu verò dum prius aliquo solatio, dum tibi DEVS aliquam
 attli-

Christus tristatur & sanguine sudat.

I.

Vide & imaginare Christum pallentem, tristem, tœdio afflictum, quales solent esse agonizantes, & considera quod hæc tristitia fuerit tantâ, ut sufficeret ad mortem, prout ipse Dominus dixit: *Tristis est anima mea usque ad mortem.* Tum quære ex Christo: IESU, voluptas cordium, quis te adeo afflixit! Respondebit ipse proculdubio, te fuisse causam tristitiæ, illa tua voluptate, illis tuis peccatis, quæ tunc Christus in horto videbat, & quæ tantopere nunc horrebat, ac detestabatur. Quibus expensis, excita in te summum odium, ac detestationem peccati, præsertim illius in quod sæpius laboris. Pete a Christo moerente contritionem de peccatis. Statue aliquod solatium Christo moerenti afferre. Commenda Christo agonizantes tuamque agoniam, & illa tua tœdia extrema, pauorem ac tristitias, coniunge Christi tædijs, pauciori ac tristitijs.

2. Vide Christum, sanguine sudantem, vide defluentes guttas sanguinis primò in vestem, deinde in terram. Hæc admiratus, quære causam huius prodigiosi sudoris; quæ non est alia, nisi quod Christus pro salute tua, tantum laborauerit usq; ad sudorem sanguineum. Tu vero quim parum laboras pro salute tua, quid hætenus pro illa ardui superasti? Cui tentationi usque ad sanguinem restitisti? quid heroicum gene-

generose fecisti? Confundere. Collige istas guttas sanguinis tanquam gemmas pretiosas; & repone in corde tuo. Suppone terram cordis tui isti pluviæ sanguineæ, & pete à Christo, ut hoc rore pretioso cor tuum aspergat, reddatq; fertile ad producendos flores & fructus virtutum. Denique statue, usq; ad sudorem, usq; ad Sanguinem, pro DEO, pro coelo, pro anima tua generose operari.

Christus Comprehenditur.

I.

Considera ex vna parte furorem satellitum, quo in Christum velut in agnum lupi irruerunt, eumq; funibus & catenis ligarunt ad instar prædonis. Ex altera parte vide mansuetudinem Christi, non repugnantis, sed sponte manus offerentis ad vincula. O Samson inuictissime, quis te his compedibus ligauit? Nemo aliis ò anima nisi amor tui, aut potius peccata tua; ita enim dicit per Prophetam: *Funes peccatorum circumplexi sunt me gratis.* Ergo tam duro eris corde, ut videns amore tui ligatum DEVM hominem, non permittas te ab eo ligari, non catena ferrea, sed aurea amoris? Non ut amittas libertatem, & vitam, sed ut maiorem acquiras libertatem & vitam æternam. Instat tam diu ad portam cordis tui pulsans DEVS, ut te liget sibi in victimam, sibi que adstringat. Dona te aliquando ipsi, qui se tibi ad tam dira tormenta donauit. O Domine liga cor meum amo-

amore tuo; liga memoriam, ut tui solius recorderetur, oculos, ne videant vanitatem; liga manus, ne operentur iniquitatem; liga linguam, ne quod tibi displicet loquatur; liga pedes, ne ambulent in via peccatorum; liga me totum vinculis charitatis, ut vivam totus tuus in æternum.

2. Christus tam crudeliter ligatus, ad terram à nefarijs satellitibus prostermitur, eorumq; pedibus conculcatur. Vide anima mea, Dominum gloriæ, Regem maiestatis, cui curiatur omne genu, qui sedet super Cherubim, cuius cœlum sedes est, sub pedibus vilissimorum hominum iacentem. O quantum se demisit, pro te tanta maiestas! & tu pulvis & cinis, terræ vermiculus, tam studiosè alta petis, omnibus cupis eminare, nulli vis subijci. Erubescere & desine tuam superbiam, discere à Christo conculcato humilitatem, discere alijs subijci. Offer DEO istam Christi humilitatem, pro tua superbia, & pete hanc virtutem à Christo pro amore tui conculcato.

Christus ad Annam alapâ cœditur.

I.

CONSIDERA, quomodo Christus ab Anna Pontifice interrogatus de sua doctrina, cum modestè respondisset, suam doctrinam esse publicam, ob hoc molestum responsum, ab vno ministrorum alapam accepit. Expende quàm fuerit hæc alapa Christo tantæ dignitatis Personæ, in tot spectantium præsentia, non solum grauitè contumeliosa, sed etiam crudelis, cum

E

fuerit

fuerit inflicta manu armatâ, ita vt Christus in terram prolapsus sit. Contemplare ergo faciem Christi liuidam, vide signa illius sacrilegæ manus, faciei Christi impressa, & obstupesce tantum scelus, Christoq; patienti compatere, sed simul vide tuam impietatem. O quoties & tu faciem Christi percussisti! non volendo audire eius vocem, quâ tibi ad cor loquitur, contemnendo ipsius vocationem ad statum meliorem, non æstimando Christi Consilia. Igitur cum dolore pectus tuum percutere, & osculâre Crucifixi imaginem, petendo veniam, & emendationem proponendo.

2. Considera patientiam & mansuetudinem Christi: pro tam crudeli & ignominiosa alapâ, non euocat è cœlo fulmina, non malum imprecatur, non signum ullum impatientiæ ostendit, non prorumpit in verba mordacia, sed mansuetissime respondet: *Si malè locutus sum, testimonium perhibe de malo; si autem benè, quid me cedis?* Admirare hanc patientiam & mansuetudinem, simul te reflecte supra tuam impatientiam, dum vno verbo, vnâ leui confusione prouocatus, tam facile excandescis, nihil nisi minas & vindictam spiras, in tot verba aspera & maledicta prorumpis. Confundere, disce a Christo mansuetudinem & patientiam, eamque propone, ac pete à Christo mansuetissimo.

Chri-

Christus apud Caiphā.

I.

Vide Christum ligatum stare cum omni modestia ante Caiphā; Considera quā iniuste ipsa Innocentia & virtus DEI in illo concilio accusatur! quomodo ille qui est Sanctus Sanctorum, & author vitæ, pronuntiatur blasphemus, & Reus mortis iudicatur. Hinc agnosce, quā sint erronea Iudicia humana, quæ Christum condemnarunt, ac proinde quā parui sint æstimanda. Tu verò quā studiosè ea quæris! quantum affligeris, cum iniuste accusaris aut condemnaris. Erubescere, & discere exemplo Christi pati accusationes, calumnias, & Iudicia hominum, atq; ad hæc toleranda offerre, amore Christi iniuste accusati & condemnati, à DEO auxilium petendo.

2. Considera alias iniurias, quas hac nocte passus est Christus in domo Caiphæ. Nam alligatus ad columnam fuit expositus tanquam meta opprobriorum furori satellitum, quorum aliqui velarunt faciem eius, alij pugnis & alapis eum cædebant, alij in faciem eius spuebant, alij capillos euellebant. Admirare hoc spectaculum, & compatere ex corde Christo, tanta pro amore tui patienti, simul etiam dole, quod tu quoq; velare soleas oculos Christi, quando ita libere peccas, ac si te peccantem DEVS non videret. Dole, quod in faciem Christi spuas, dum in præsentia illius effutis verba inhonesta,

E 2

spu-

spuris omnibus turpiora. Dole, quod Christo alapam infligis, cum alios confundis, & ex amore Domini tui abhinc serio corrige corrigenda.

Christus apud Pilatum.

I.
COnsidera calumnias Christo impositas à Iudæis apud Pilatum, tam enormes. Nam appellatus est malefactor, seditiosus, ambitiosus, læsæ maiestatis reus: & tamen fuit innocens, segregatus à peccatoribus, Sanctus Sanctorum. Ex altera parte considera silentium Christi, cum nec per se nec per alium voluerit refutare calumnias, licet facile potuerit, & licet fauentem sibi Iudicem habuerit. Hinc verò reflexione supra te facta, vide an tu quoq; in aliquo innocente Christum non es calumniatus, an non infamaueris, & detestare hoc vitium, ac pete à Deo charitatem proximi. Deinde vide quo silentio toleras columnias, iniquas accusationes, detractiones, & ad illas tolerandas te resoluere amore Christi, petendo patientiam.

2. Expende illa verba Christi, cum interrogatus à Pilato: *Ergo Rex es tu?* Respondit: *Regnum meum non est de hoc mundo.* Quibus verbis docet Christus, nos, qui Christum adoramus, non debere inhiare mundanis diuitiis, honoribus, voluptatibus, quæ omnia transeunt, sicut fumus & umbra, sed potius studere congregandis meritis, & diuitijs æternis, spectando in omnibus nostris actionibus Regnum cœlorum, & glo-

gloriam æternam, ad quam creati sumus. Tu verò ô quantum affixus es mundo eiusq; fallacijs, quam raro ad bona æterna & cœlestia aspiras: & tamen te Christi sequacem esse dicis. Erubescere mendacium istud, & pete à DEO gratiam, vt tibi vilescant omnia transitoria, & chara sint bona æterna.

Christus apud Herodem.

I.

CONSIDERA quomodo Christus per plateas vr-
bis publicas, spectante populi multitudine,
cinctus funibus & catenis, ab vno tribunali ad
aliud, tanquam Latro ducitur, aut potius trahi-
tur; quomodo a satellitibus nefarijs nunc pu-
gnis, nunc calcibus tunditur, quomodo ab in-
solentissima plebe, cui tot beneficia præstitit,
illuditur, luto & lapidibus impetitur, iam la-
tro, iam falsus Propheta, ac deceptor homi-
num proclamatur. Ex altera parte eleua men-
tem, & considera in Christo illam adorandam
Maiestatem, cui seruiunt Angeli, quæ rebus
omnibus dominatur; illam potentiam, cui ne-
mo resistere potest; & hæc obstupescens incla-
ma: Pro me, pro me, vilissimo vermiculo,
taliam DEVS patitur, pro me conculcatur, pro
me DEVS ligatus, irrisus, &c. Et hoc sæpius
repete, donec cor tuum accendatur; tunc enim
prorumpes in affectum compassionis erga Chri-
stum, taliam patientem, & in affectum doloris de
tuis peccatis, quæ fuerunt causa Christo harum

afflictionum. Deinde amore Christi facies propositum vitandi hoc vel illud peccatum, item vincendi hunc vel illum respectum humanum, & repugnantiam in obsequio Diuino.

2. Considera Christum, qui est Sapiencia DEI infinita, ab Herode eiusq; aulicis contemptum & pro stulto habitum, irrisum, atque veste alba indutum, vt ab omnibus pro fatuo haberetur, & ita per plateas reductum ad Pilatum. O quæ tunc probra, quas irrisiones audiuit cum summa patientia, ab illa sæce hominum, Innocentissimus Saluator! & tu ab omnibus vis honorari, laudari, adorari, cum id nec ob sapientiam, nec ob patientiam merearis. Confundere de hac tua ambitione, disce à Christo, contemptus, irrisiones, ac probra, eius amore pati, hæc enim sunt insignia seruorum Christi, quibus, ipse indutus fuit apud Herodem. Pete etiam à Christo vestem albam puritatis, quam ipse nobis hac irrisoria veste comparauit.

Christus redit ad Pilatum.

I.

EXpende Christi ignominiosam cum latrone Barabba comparisonem, atq; Barabbæ præ Christo electionem: quod ô quantum dolorem Christo attulit! cum vidit se adeò contemptum ab illo populo, quem tot beneficiis cumulauit. Sed tu quoque an non præfers Barabbam Christo? Quando magis adhæres suggestioni Dæmonis,

monis, quam inspirationi Diuinæ: quando pluris æstimas mundi voluptatem, diuitias, honores, quàm Christi gratiam & vitam æternam: quando Christi voluntatem postponis tuæ voluntati, rationem sensui, spiritum carni, æternitatem bonis temporalibus. Deplora ergo istam cœcitatē tuam, deprecare Christum, & ex nunc illum eiūsq; gratiam æstima super omnia, supra diuitias, supra amicos, supra famam, supra voluptates, &c.

2. Considera vociferationem Iudæorum clamantium: Tolle, tolle, crucifige; hos plausus retulit summa Sapientia, summa Sanctitas, summa Beneficentia Christi, & tu tantoperè ambis laudem humanam, & plausus, adeo affligeris, cum illis cares, quibus tamen vndiq; indignus es. Confundere & hinc disce contemnere laudem humanam, & gloriam à solo DEO quærere, apud quem solum vera est laus, & quidem æterna.

Christus Flagellatur.

I.

EXpende Christi in conspectu tot hominum probrosam nuditatem, ante flagellationem. Quanta ibi fuit Christi verecundia, de qua dicit ad Patrem in Psalmo: *Tu scis confusionem & reverentiam meam!* Quantum verò te amavit! qui amore tui vestibis etiam spoliari voluit, ut te veste gratiæ, & virtutum, ac stolâ gloriæ indueret. Propter te eò devenit DEVS, qui cœ-

E 4

lum

lum stellis, terram floribus, aues plumis, Angelos gloria vestit, vt amore tui factus sit nudus. Tu iam vide, quid te par sit facere, amore huius Domini. An non expedit, vt te spolies omnibus affectibus inordinatis, omnibus solatiis, omnibus commoditatibus, vt Christum Duce[m] tuum nudum, miles nudus sequaris.

2. Vide Christum ad columnam atrociter funibus ligari, non reluctan[te]m, non resistentem, sed vltro manus ligandas offerentem. Admirare hanc Christi obedientiam, eumq[ue] imitari stude, vt propter DEVM non satellitibus sed superioribus tuis promptè obedias, & præsertim vt obedias DEO, dum tuam libertatem vult ligare, & te sibi adstringere nexu amoris.

3. Considera diram Christi flagellationem. Diram fuit ex parte temporis, quia iuxta aliquos durauit vnâ horâ & mediâ. Diram ex parte flagellorum, quæ constabant ex neruis, catenis ferreis, virgis spinosis. Diram ex numero plagarum, quarum numerantur 6666, à planta pedis vsq[ue] ad verticem Christi. Diram ex rabie carnificum, qui partim pecunijs conducti à Iudæis, partim à Dæmone incitati, crudelissimè sauebant in Christum, alij alijs succedendo. Deniq[ue] diram fuit ex parte carnis & complexionis Christi delicatissimæ. Vide ergo in carne Christi sulcos, vide sanguinem defluentem in terram, vide totam carnem laceratam, vide ossa transparentia: & te ipsum huius lanienæ reum agnosce. Hæc enim patitur Christus propter tuam
libi.

libidinem, propter tuas carnis delicias. De his igitur dole, Christo compatere, & firmiter propone fugam omnis voluptatis carnalis, & carnis mortificationem. Deniq; in sanguine Christi in hac flagellatione effuso, animam tuam, contaminatam laua, dicendo cum Psalmista; Amplius laua me Domine ab iniquitate mea, & à peccato meo munda me, &c.

Christus spinis coronatur.

1.

EXpende amorem Christi erga te. Non satis fuit ipsi tam copiosum pro te sanguinem effudisse in flagellatione: vna adhuc pars corporis, nempe caput, superfuit à vulnere libera: & hanc etiam voluit pro te lacerari spinis. Vide ergo quare milites imponunt Christo coronam spineam, eamq; capiti sacrosancto baculis crudelissime infigunt. Vide spinas, quarum plures numerantur quam mille, usq; ad cerebrum pertinentes, iuxta S. Bernardum. Vide sacrum cruorem copiosissime primò in faciem, deinde in corpus ex facie defluentem. Tu verò Christiane, ah quam Christo difformis es! qui caput tuum coronas cogitationibus lascivis, superbis, ambitiosis, quæ in has spinas conversæ, Christi caput laniarunt. Itane decet sub spinoso capite membrum esse delicatum? Itane Regis ad exemplum tui componeris? Ah depone aliquando amore Christi istas rosas euandas ex capite tuo, & impone tibi coronam.

E s

Christi

Christi spineam, quæ in auream in coelo conuertatur.

2. Christo sic coronato ad ludibrium traditur in manus arundo, loco sceptri. Vide quid Christo mundus offerat, & quid tibi etiam offerre possit. Nil nisi arundineum, nisi bona vacua, inania, fragilia. O quantum hoc dono tibi illudit! Cur ergo potius non amas aureum Christi sceptrum, Regni cœlestis insigne? Cur tibi illudi permittis? Redi aliquando ad mentem, & solida præfer caducis, temporalia æternis.

3. Vide quomodo Christo illudunt milites, vno genu flectunt ante ipsum, & manu caput feriunt ac vulnerant. Regem appellant, sed regem dolorum faciunt. Regem adorant, sed arundine donatum. O quoties & tu ita Christo illudis, cum eum adoras orando, sed contemnis malè operando, cum ipsum vno genu adoras, altero Diabolum: cum ipsi offers illa arundinea & fragilia proposita, illam arundineam omni spiritu vacuum pietatem. Erubescere hanc impietatem, & statue, Christum solida virtute adorare, hasq; illusiones compensa, dicendo cum Psalte: *Tu es ipse rex meus & DEVS meus, ô Domine ego servus tuus & filius ancillæ tuæ.*

Christus damnatur ad crucem eamque baiulat.

I.

CONSIDERA pusillanimitatem Pilati: Is enim agno-

agnouit Innocentiam Christi, dicendo: *Ego nullam in eo causam mortis inuenio*: & tamen propter respectus humanos, propter gratiam conseruandam apud Cæsarem, propter vitanda odia Iudæorum; Christum iniustissime damnauit ad Crucem. O Respectus humani infelices, an vnum ad hoc impulistis, vt Christum eiusq; imitationem, vt vocationem respueret, vt virtutem defereret, vt damnaret Christi consilia & præcepta? Ego ipse an talis non sum? Nolo deinceps esse ò Domine, da mihi generosum animum omnes respectus humanos contemnendi, tibi que magis adhærendi, & virtuti, quàm amicis, quàm mundo, quàm carni, omnibusque alijs, me à te avocantibus.

2. Vide Christum damnatum ad mortem, cruce onustum per vias publicas procedere, atque montem Caluariæ conscendere, vide quàm sæpe iam sanguine exhausto debilitatus, sub pondere crucis labitur, nec vllus adest qui illum in cruce ferenda iuuare velit. A te igitur hoc solatium petit, illis Euangelij verbis: *Qui vult venire post me, tollat crucem suam, & sequatur me.* Non vult, vt tantam, tamque grauem crucem feras, quantam ipse tulit, sed tantum vult, vt feras crucem tuam, id est crucem paruum, crucem tuis viribus accommodatam, crucem tuis peccatis debitam. Cur ego renuis? Cur te excusas? Cur humeros cruci Christi non submittis? Resolue te aliquando generose, & offer Christo ad portandam cum illo crucem,

& discce, non esse aliam ad cœlum viam, nisi hanc, quâ Christus iuit, crucem ferens.

Christus Crucifigitur.

I.

CONsidera, Christo ante Crucifixionem in monte Caluario, cum iam vix spiraret præ debilitate, oblatum esse vinum felle mistum. Quanta ista crudelitas fuit! Quam acerbum Christo tormentum! Quanta porro Christi erga nos Charitas, qui amore nostri, nullum sensum suum, etiam gustum, voluit esse à dolore immunem. Et tu an Christo vinum felle mistum non propinas? Cum illi offers illas deuotiones tepidas, illa bona opera, tot imperfecti- onibus mista, cum in potu temperantiam debitam non obseruas. Dole de istis defectibus, atque hic & nunc offer aliquem actum heroicum, maximæ alicuius tuæ repugnantix victorem, quo gustum Christi felle exasperatum recrees.

2. Vide Christum vestibus ad carnem concreto sanguine adhærentibus, non minus ignominiose, quàm crudeliter nudatum, ac plane excorticatum, prosterni in trabem crucis. Vide cum quanta charitate extendit manus & pedes, vt cruci affigantur. Vide quo furore carnificum, membra sacrosancta extendantur, & clauis perforentur. Vide quomodo se Christus offert in hoc altari pro peccatis tuis, in sacrificium DEO Patri. Hinc verò discce amore Christi, te spoliare commoditatibus in vestitu, in lecto,

to, & alijs, vt nudus, nudo Christo Crucifixo te adstringas. Disce crucifigere carnem tuam, manus, ne quid mali operentur; pedes, ne per viam iniquitatis ad occasionem peccati ambulent, ac denique totum corpus tuum, vt dicere possis cum Apostolo, *Christi confixus sum cruci.* Itaque ad hoc te Christo Crucifixo promptè offer, dicendo: ò IESV pro me Crucifixe, volo tecum crucifigi, vt tecum viuam in æternum.

3. Vide inauditum spectaculum, pendentem in cruce, medium inter latrones, qui in throno gloriæ est medius inter personas Diuinas, nudum, liuidum, vndique cruentatum. Vide rivus sanguinis è manibus & pedibus, ac toto corpore in terram defluentes. Considera totum corpus, caput, oculos, faciem, manus, latus, & vide an aliqua pars à planta pedis vsque ad verticem vacet dolore. Vide an aliquod solatium habeat à Patre, à Matre, ab amicis. Et hæc considerans, compatere ei toto cordis affectu, osculare omnia & singula vulnera ipsius, suppone cor tuum immundum & sterile, sanguini ex vulneribus mananti. Offer hoc sacrificium cruentum Patri pro peccatis tuis. Pete à Christo, vt tanti cruciatus pro te non sint frustra suscepti.

Christus Moritur.

I.

EXpende quod Christus moribundus, Ioanni propter eius castitatem eximiam, Beatam Virginem pro matre testamento legauit. illis

ver-

verbis: *Ecce Mater tua.* Tu quoque accede ad crucem tanquam ad lectulum Patris tui morientis, & valedicendo ipsi cum lacrymis, pete ab eo supremam benedictionem. Pete etiam, ut aliquid tibi testamento relinquat. Et si amator castitatis es, audies ab ipso tibi tradi B. Virginem pro Matre tua, atque de illa ad te dici: *Ecce Mater tua.* Vide ergo, ut affectu Ioannis illam deinceps ames illique seruias.

1. Expende suprema illa verba Christi morientis. *Pater in manus tuas commendo spiritum meum.* Merito hoc dixit Christus, non enim habuit diuitias, non honores, ipsum corpus iam per tot vulnera penè amiserat. Solus restabat spiritus, hunc ergo in manus Patris æterni reponit, quia dignus fuit complexu Patris, utpote spiritus purissimus, sanctissimus, Patri obedientissimus, eiusque amantissimus. Tu verò in illo extremo mortis agone, poterisne merito spiritum tuum in manus DEI reddere? Vide qualis sit tuus spiritus, vide cui seruias, an DEO, an mundo, an carni; ab illo enim in fine vitæ præmium sperare debebis, cui tota vita seruies.

2. Christus inclinato capite tradit spiritum. Inclinat caput, in signum obedientiæ, ex qua moriebat. Inclinat caput, ut tibi suum spiritum inspiret. Inclinat caput, ut tibi det supremum osculum benignissimus Pater filio prodigo. Et sic tandem paulatim deficientibus viribus color vultus mutatur, oculi clauduntur, ac deni-

denique DEUS Homo moritur. Moritur Dominus tuus, Pater tuus, Magister tuus, Pastor tuus &c. &c. Et adhuc lacrymas continens, petris scissis durius cor meum? Eliqueſce tandem aliquando in lacrymas, & deſſe tua peccata, quæ fuerunt cauſa mortis Filio DEI. Age gratias pro tam copioſa redemptione tui, & per mortem crudeliſſimam Chriſti, pete felicem mortem tuam, ut in manibus Chriſti, in præſentia DEI Matris moriaris, cum Chriſto in æternum victurus.

C A P V T XVII.

De modis colendi DEI-
ram Virginem, præſertim in
Festis Ipius.

Centum Exercitia Pietatis proponit erga DEI Matrem Paradifus Hagiophili, totidemque alia Diarium Marianum. Nos aliqua, quæ magis uſui eſſe poſſunt, afferemus.

Exercitium I.

HAbere in promptu, & frequenter per diem uſurpare aſpirationes iaculatorias ad DEI Matrem, qualis poteſt eſſe hæc S. Franciſci Xaverij: *Mater DEI memento mei, Domina opi-*

opitulare. Vel hæc B. Stanislai: O MARIA si mihi propitia. Vel hæc: Mater DEI, monstra te esse Matrem. Hanc aspirationem consuetam Patri Gabrieli, varia in suis angustijs repetere oblito, adstetit B. Virgo, dixitque: Es tu mei iam oblitus? Talis etiam hæc est aspiratio: Mater amabilis amo te. Et: uiuat MARIA, O MARIA quando te uidebo!

Exercitium II.

Singulis diebus se deuouere B. Virgini in filium & mancipium, repetendo illam formulam Congregationi consuetam, *Sancta MARIA Mater DEI &c.*

Ita Marinus, frater B. Petri Damiani, supplex coram ara DEI Matris, cingulum suo collo pro fune iniecit, & se non solum loco serui, sed etiam vt mancipium eidem dedicauit, quod vt re ipsa profiteretur, illo ipso loco se ipsum loco mancipij diuerberauit, & loco tributi argenteum numerum ad cornu altaris DEIPARÆ deposuit. Alij deligunt & acceptant B. Virginem pro sua sponsa, exemplo S. Edmundi Archiepiscopi Cantuariensis, qui adhuc Philosophiæ studens, votum Virginitatis emisit, ante imaginem DEI Matris, cuiusq; digito, pro arrha suæ fidei, anulum aureum inseruit, cui insculptum erat, *Aue MARIA*. Similiter desponsauit sibi B. Virginem Pater Brunus à sancta Cruce S. I. cui DEIPARA anulum in digitum inseruit.

Exer.

Exercitium III.

HAbere consuetas orationes ad B. Virginem, quas Ipsi singulis diebus ceu vestigal constanter persoluas. Pater Bernardinus Realinus Soc: IESV, recitabat quotidie Rosaria 12. Pater Balthasar Moralez 20. Ioannes de la Febure 30. S. Ludouicus Galliarum Rex, Sanctus Carolus Borromæus, Sanctus Vincentius Ferrariensis, recitabant quotidie maius B. Virginis Officium, compositum à Petro Damiano Cardinali, ante annos 603. Alij cum Alphonso Rodriguez quotidie recitant Officium de Immaculata Conceptione, quod B. Virgini plurimum placere, multis exemplis comprobatum est. Alij recitant Canticum B. Virginis cum 4. Psalmis, ex quorum literis initialibus componitur sacrosanctum nomen MARIA, vti faciebat Pater Ioannes à Campis S. I. Alij Litanias Lauretanæ, quæ habent annexas Indulgentias 200. annorum, & iuvant pro felici morte impetranda.

Exercitium IV.

Defendere honorem B. Virginis, & cultum ipsius promouere. Ita Angelicus adolescens Ioannes Berchmans Soc: IESV, votum edidit, defendendi Immaculatam B. Virginis Conceptionem, nisi aliter Ecclesia definiret, quod votum suo sanguine subscripsit. Ita Carolus S. Brigittæ filius, optabat æterna potius supplicia pati, quàm permittere vt culpâ suâ quid.

quidquam gloriæ Marianæ decederet, ob quem affectum meruit in Iudicio Particulari à B. Virgine defendi, & Dæmonum faucibus eripi. Ita Reges ac Principes pro honore DEIPARÆ ingentes fecere sumptus. Iacobus I. Aragoniæ Rex ultra duo millia sacrarum ædium, nomini Eius dedicauit. Pulcheria Imperatrix aram Ipsi ex auro elaboratam consecrauit, gemmis vndique distinctam.

Ioannes I. Lusitaniæ Rex templum propè Vllissiponam extruxit, vbi tantum argenti dono reliquit, quod quater centena nummum aureorum millia excederet.

Exercitium V.

Laudes B. Virginis siue voce, siue scripto celebrare.

Ita Sanctus Casimirus Poloniæ Princeps laudes ipsius cecinit. Ioannes Berchmans voto se obstrinxit, primum quem editurus esset librum, fore Apologiam Immaculatæ Conceptionis. Pater Iosephus Ancheta Soc: IESV apud Barbaros obiens, 2806. disticha de B. Virgine, solà memoriâ pro chartâ & calamo vsus, composuit. Alij Alphabetum Elogiorum B. Virginis conficiunt, & sæpius recolunt, vti fecit Pater Aluarus Arias Soc. I E S V. Alij de ipsius Excellentijs ex condito colloquuntur crebrius, quod ipsum præscribit Lex I. Congregationis his verbis: *Sæpius inter se agentes, mutuo se ad eius amorem & cultum, studeant impellere,*
& ar.

ardentem quandam cupiditatem Sanctissimi nominis eius extollendi.

Exercitium VI.

Legere vel meditati de Excellentijs, Virtutibus, Beneficijs DEIPARÆ, præsertim diebus Sabbathi, & in festis ipsius. Ita Pater Francisc⁹ Suarez nostrorum Theologorum Princeps, singulis festis B. Virginis in meditatione circa eius virtutes, duas horas infumebat. Hoc nimirum est, ex memoria propria & intellectu, facere sacellum B. Virginis, imaginibus Ipsius ornatissimum, ut nullæ aliæ prophanæ locum habeant.

Exercitium VII.

An te Actiones benedictionem, à DEI Matre petere.

Ita B. Stanislaus Kostka, Romæ in Tyrocinio Societatis degens, manè & vespere, se versus templum S. Mariæ Maioris obvertebat, & flexo utroque genu, ab Ea precabatur benedictionem, oblato illi inuicem suo corde.

Ita etiam S. Catharina Suetica, ad initium cuiuslibet actionis præmittebat *Aue MARIA*. Et Pater Gonsalvus Gomez Soc. IESV, priusquam loqueretur, nomine MARIE decies prolato, linguam suam consecrabat.

Exercitium VIII.

Amore Beatissimæ Virginis vincere tentationes, & heroïca opera exercere. Ita quidam

dam infamis lasciuix consuetudine liberatus est, cum se ex consilio Sancti Bernardi, primo per triduum amore SS. Trinitatis, deinde per aliud triduum amore Beatissimæ Virginis à flagitio continuisset.

Ita plurimi amore DEIPARÆ, visum, gustum, linguam, mortificant, vimque sibi faciunt, vt rapiant Regnum DEI.

Exercitium IX.

Virtutes B. Virginis imitari.

Hoc genus colendi B. Virginem est præstantissimum, illique gratissimum, & præscribitur in prima lege Congregationis, his verbis : *Vite morumque integritate, virtutum illius præstantissimarum exempla imitari conentur.* Nam vt ait S. Ambrosius lib. 2. *de Virg. Quicumque sibi MARIÆ optat premium, imitetur exemplum.*

Præcipua verò cultorum DEIPARÆ cura esse debet, imitari ipsius Angelicam mentis & corporis puritatem, quâ virtute nihil est ipsi gratius, cum eam ipsa fundauerit in mundo, quæ prima Votum Virginitatis emisit. Ita B. Aloysius, ita Alexander Bertius adhuc nouennes, voto se Virginitatis obstrinxerunt.

Exercitium X.

Varias mortificationes assumere in honorem DEI Matris, præsertim diebus Sabbathi, & in peruigilijs festorum Ipsius.

Ita se tanquam seruum inutilem flagellis cedebat quotidie Pater Franciscus Suarez Soc:

IESV;

IESV; bis quotidie Pater Hieronymus de Mercado; ter Pater Ioannes Sebastianus; quater Pater Sertorius Caputus; terquaterue Pater Augustinus Espinosa, infligens sibi quot vicibus duo imò & quinque ictuum millia; duodecies intra vnum diem & noctem Pater Gaspar Druzbecki. Alij in honorem eiusdem Pretiosissimæ Parentis arcta instituunt ieiunia, quorum Franciscus Cardinalis Toletus, etiam in vltima ætate, Quadragesimam Marianam celebrabat ante eius Assumptionem. Alij cilicio se amore illius affligunt, e quorum numero Pater Ioannes Neronus quotidie per annos 40. Alij cum S. Francisco Xauerio in peruigilio eiusdem somno se fraudant. Alij abiecta & humilia opera, in honorem humilitatis Marianæ exercent, vti exercebat Pater Martinus Alberro septuagenarius, cui sabbatho domus sordes colligenti, B. Virgo blandè faciem mulcens dixit: *Martine, scis sordes domus colligere: Fili mi, vult de mihi hoc placet.*

Exercitium XI.

HAbere in conclaui imaginem B. Virginis, eamque sæpè venerari. Ita Pater Ignatius Plancus S. I. nunquam e cubiculo prodibat, nisi petita benedictione à DEIPARA, coram Eius imagine. Alij oculos in imaginem Eiusdem defigunt, ad imitationem S. Alexij, degentis sub porticu Edeseni templi. Alij Eandem in obuijs ipsius imaginibus salutant, vicissimq; ab Ea sa-
luta-
ntur.

tutantur, cum Sancto Bernardo, & cum Patre Ioanne Castillo S. I. qui imaginem B. Virginis osculatus, osculum vicissim accepit ex imagine. Alij imaginem Eiusdem secum propè cor circumferunt cum S. Patre nostro Ignatio.

Exercitium XII.

Nomini Sacro Mariæ reuerentiam exhibere Ita P. Franciscus Binantius ex ordine Minorum nomen IESV & MARIÆ scriptoriò cultello pectori insculpsit: sed hoc admirandum potius, quàm imitandum: satis est, digito id facere. Alij sæpe hoc nomen pronuntiant, qualis fuit illa Fœmina Iaponica circa annum 1621. quæ ad fidem conuersa, Angelo custode excitante, per diem 140000. vicibus nomen IESV & MARIÆ pronuntiabat, sicut olim, Dæmone eam noctu excitante, pronuntiare nomen solebat Amidæ Iaponum DEI.

Alij nihil negant, quidquid nomine MARIÆ petitur. Alij caput inclinant, aut genu flectunt, audito hoc nomine Sacro Sancto. Alij initium scribendi ab hoc nomine sumunt, vt ei laborem suum inscribant. Omittis breuitatis studio alijs Exercitijs Pietatis erga B. Virginem, subiiciemus pios affectus erga Eandem.

Affectus erga B. Virginem.

Qui disponi possunt per Decades Coronæ.

I. *Adoratio.* Eminentissima DEI Mater & Vir-

go, adoro Te cultu Hyperdulix, cum tota Ecclesia, tanquam Matrem DEI & Dominam mundi.

2. *Laus.* Gloriosissima DEI Mater, Te laudo, & glorifico, & post DEVM ab omnibus laudari & glorificari desidero.

3. *Gratulatio.* Gaudeo cum tota Ecclesia, & gratulor Tibi de omnibus donis naturæ, gratiæ & gloriæ, super omnes Sanctos Tibi à DEO collatis.

4. *Gratiarum actio.* Beneficentissima Mater DEI, ago Tibi gratias, pro omnibus obsequijs & affectibus Christo Domino exhibitis, & pro omnibus beneficijs toti Ecclesiæ impetratis.

5. *Amor.* Pretiosissima Mater DEI, Te summe post DEVM æstimo, & amo propter Dignitatem Tuam.

6. *Oblatio sui.* Dignissima DEI Mater, agnosco te & recipio in Matrem, & Dominam meam, meque Tibi in filium & mancipium perpetuum offero.

7. *Fiducia.* Potentissima DEI Mater, in Tua intercessione spem meam maximam post Christum, de bonis temporalibus & æternis repono.

8. *Peritio.* Benignissima Mater DEI, monstra Te mihi esse Matrem in vita & in morte mea.

Ultra hos affectus in festis B. Virginis, alij eliciendi sunt accomodati festo, quod celebratur. Itaque

In Fe.

In Feflo Conceptionis & Natiuitatis

B. Virginis.

1. **S**alutabis cum Ss. Angelis Reginam mundi, prodeuntem in hunc mundum.

2. Profiteberis, te firmiter affentiri, quod B. Virgo fit concepta sine labe, quam diu Ecclesia contrarium non definiuerit, quod vtiq; non speratur futurum.

3. Gratulaberis ipsi de Immaculata Conceptione, de confirmatione in gratia, de vfu perfecto rationis, aliisque gratijs, quibus in instanti suæ Conceptionis fuit supra omnes Sanctos à DEO cumulata.

4. Pro ijsdem fauoribus erga B. Virginem gratias ages SS. Trinitati, simul gratulando ipsi de illo gustu & complacencia, quam habuit de hoc singulari opere suo, in eo instanti, quo illud creauit.

5. Adorabis in B. Virgine concepta & nata, relucenem DEI Puritatem, Sanctitatem, Sapientiam, Misericordiam, &c.

6. Offeres tanquam subditus huic Reginx supremæ in mundum ingredientis, aliquod vestigal, V. G. aliquod firmum propositum.

7. Per Immaculatam eiusdem Conceptionem & confirmationem in gratia petes puritatem, virque DEVM grauitè nunquam offendas.

Tessera huius diei erit: Vnat Maria immaculatè concepta.

In An-

In Annuntiatione.

1. **A** Dorabis B. Virginem tanquam vivum tunc tabernaculum Filij DEI incarnati.

2. Gratulaberis ei de summa inter creaturas dignitate Maternitatis Filij DEI.

3. Cum tota Ecclesia ages gratias, quod Filium DEI in vterum suum suscepit, quod eidem sanguinem suum purissimum ad formandum corpus præbuerit, & pro omnibus obsequijs & affectibus, quibus Verbum incarnatum in suo vtero profecuta est novem mensium spatio.

4. In honorem istorum 9. mensium, recitabis novies salutationem Angelicam, assumendo alium Chorum Angelorum, ad singulas salutationes, & ab eis petendo, vt pro te laudent Matrem DEI, ac in ea Verbum incarnatum. Ita faciebat Angelicæ virtutis adolescens Ioannes Berchmans Soc. IESV.

5. Petes per Maternitatem ipsius, vt tibi monstret Se esse Matrem.

Deinde per diem frequenter dices; *Beata viscera Mariæ Virginis, quæ portauerunt æterni Patris filium. Beata Mater munere, cuius supernus artifex, mundum pugillo continens, ventris sub arca clausus est.*

In Purificatione.

1. **G**ratias ages Beatæ Virgini, & simul gratulaberis, quod prima Filium DEI in manibus suis SS. Trinitati, in sacrificium hodie

obtulerit, ei que tantum gustum & complacenciam dederit.

2. Egenti B. Virgini offeres pro turture gemitus tuos pro peccatis, pro columba, candorem & simplicitatem.

3. *Petes* à B. Virgine, ut sicut hodie præsentat DEO Filium suum, ita te etiam præsentare dignetur SS. Trinitati. Deinde sicut deposuit Dominum IESVM in vlnis Simeonis, ita etiam eundem in corde tuo reponat & custodiat.

In Planctu B. Virginis.

1. **C**ompatieris omnibus doloribus & afflictionibus B. Virginis.

2. Ages gratias pro affectibus & obsequijs, quæ Christo patienti & mortuo exhibuit.

3. Ad solatium ipsi dandum, diuides ipsius dolorem tecum, subeundo voluntarie amictiones & dolores siue animi siue corporis.

4. *Petes* ab ipsa per dolores, quos in passione Filij sui sustinuit, ut tibi morienti assistat, inquit adititit morienti in Cruce Filio suo.

In Assumptione.

1. **S**upplex valedices discedenti in Cœlum B. Virgini, & petes ab illa cum Apostolis maternam benedictionem.

2. Gratias ages ipsi, quod viuendo in hoc mundo, tot exempla virtutum Ecclesiæ reliquerit.

3. Gratulaberis illi, quod illius animam è corpore exeuntem Christus complexus fuerit,
super

super Angelos exaltarit, & coronauerit. Gratulaberis item ipsi de gloria corporis, & de laureolis.

4. Recognosces illam sic coronatam, Regnam coeli & terræ, & cum singulis seorsim sanctorum ordinibus illam adorabis.

5. *Petēs* ut in coelo sit tua apud DEVM aduocata in omnibus tuis indigentijs.

Tessera huius diei, Vivat Regina calorum. Vivat Domina Angelorum.

C A P V T XVIII.

Praxis colendi Sanctos Patronos.

PRAXIS PRIMA.

Diem S. Patroni deuotè transigere.

IMprimis præmissà lectione, vel meditatione vitæ Sancti Patroni, eliges aliquam virtutem ex vita ipsius, Sancto familiarem, in cuius virtutis actibus, aliquoties te per diem exercebis, in honorem eiusdem Sancti. Vnde mane assignabis tibi occasionem, numerum, & modum exercendi tales actus, & in examine a te exigēs huius rationem. Deinde quamcunq; actionem non honestam facies, non aliter facies, nisi affectu Sancti Patroni, similem actionem exercentis, &

in vnione similium actionum ipsius. Itaq; die S. Ignatii, orabis affectu Sancti Ignatii, communicabis in vnione communioneum S. Ignatii, actum amoris DEI elicies, affectu Sancti Ignatii, & sic de similibus.

Postremò sæpius de die inuocabis S. Patronum per breues ad illum aspirationes, V. G. SS. Patroni assumite me ad vos. Estote custodes cordis mei, nunc & in hora mortis meæ. Benedicti vos à Domino, qui fecit cælum & terram.

PRAXIS SECVNDA.

Varios affectus elicere erga Sanctum Patronum per modum Coronæ.

1. **S**ANCTE Casimire, adoro te cultu dulci, tanquam amicum & Filium DEI adoptivum.
2. Gaudeo de omnibus donis naturæ, gratiæ & gloriæ, quibus à DEO ornatus es, & præsertim de Angelica tua puritate.
3. Confundor & erubesco, quod vitiis meis sim adeò tibi dissimilis, & præsertim tuæ puritati.
4. Ago tibi gratias pro omnibus affectibus & obsequiis erga DEVM, & Mariam, & pro tutela, quam hætenus mihi indigno præstitisti.
5. Recipio te in Patrouum & Aduocatum meum, ac me tibi trado in servum & clientem, in vita & in morte.
6. Per amorem IESV, & MARIÆ, te rogo, sis protector meus in vita & in morte, & impetra mihi à DEO tuam puritatem.

PRA-

P R A X I S T E R T I A.

*Affectus ad DEVM circa Sanctos
Patrenos.*

1. **A** Dorabo Diuinas perfectiones specialiter relucens in Sanctis. V.G. puritatem in Angelis, sapientiam in Doctoribus, sanctitatem in Confessoribus, &c.
2. Gaudebo & gratulabor DEO de omni honore & amore, quem habet, & habebit v.g. à B. Aloysio.
3. Desiderabo DEVM amare & laudare corde B. Aloysij, in hac vita, morte, & in æternitate.
4. Gratias agam DEO pro donis naturæ, gratiæ, & gloriæ, B. Aloysio concessis.
5. Offeram DEO omnia B. Aloysij obsequia, merita, & affectus, siue huius vitæ, siue æternitatis.
6. Petam à DEO per Intercessionem B. Aloysij, virtutem, in qua ipse excelluit, v.g. castitatem.

C A P V T X I X.

Modus Sanctè moriendi.

HÆc est Conclusio, quæ ex hætenus præmissis sequi debet, Mors sancta. Specialiter

ter autem vt concludas vitam in bona forma, hæc dum viuus præmittenda sunt. 1. Nullum graue peccatum, etiam ad breue tempus, patiare in anima, sed quam primum illud per confessionem dele. Nec v. quam te ad somnium confessionem dele. Nec vnquam te ad somnum conferas, non præmisso actu contritionis. Quis enim scit, an hac nocte non repetent a te animam tuam? Hæc verò, si in statu peccati mortalis e corpore discesserit, vbi erit?

2. Assuesce viuendo resistere tentationibus, & sæpe elicere actus, fidei, spei, & charitatis, vt sic habitu contracto, facilius eos elicias in illa debilitate corporis, ac doloribus morbi lethalis.

3. Nulli rei in hoc mundo nimis afficiare, sed potius ad Patriam cœlestem sapius aspira- sic enim iuuauit. & sine dolore animi morieris, quia vt ait Sanctus Gregorius: *Cum dolore amittitur, quidquid cum amore possidetur.* De anima sic in affectibus suis mortificata dicit Sapiens, quod ridebis in die nouissimo. Talis fuit Maria Oegniacensis, quæ ingeminando Alleluia Alleluia, exspirauit. Tales illi Angelici Adolescentes e Soc. nostra, B. Aloysius Conzaga, & Ioannes Berchmans, qui nuntio mortis accepto, lætissimi decantarunt: *Te DEVM laudamus. Letatus sum in his quæ dicta sunt mihi, in domum Domini ibimus.*

4. Cum præuisa iacula minus feriant, frequenter mortis recordare, eiusque successum

DEO

DEO sapè commenda. Hoc autem fieri potest imprimis in Sacro, dum per sacræ Hostiæ fractionem repræsentatur mors Christi Domini, ubi petes ab ipso, ne te in tua morte permittat à se in æternum separari. Deinde in meridie, cum signum datur ad orandum: tunc enim, in vnione mortis Christi, quæ eo tempore contigit, in manus Domini spiritum tuum in suo egressu è corpore, commendabis. Postremo dum te ad lectum conferes, recordaberis sepulchi, in quo requies tua erit.

5. Beatissimæ Virgini, ac SS. Patronis supplica sæpius, vt tibi in illo supremo conflictu, suppetias ferant. Sunt qui singulis diebus invocant SS. Patronos, singulis mensibus in Congregatione dari solitos, quorum nomina ad hunc finem habent conscripta ad instar Litaniarum. Alij pro singulis diei horis, cum Alphonso Rodriguez, distribuunt Patronos; quamlibet horam, ex quibus aliqua erit suprema, hoc facio præsidio, tempestiue muniendo. Et hæc præparatio ad mortem remota.

Obseruanda, morte iam instante.

1. **I**ntellec'to mortis periculo, quam primum pete sacramenta poenitentiae, Eucharistiæ, ac etiam, si tantum est periculum, Extremæ vnctionis, nec non applicationem Indulgentiarum. Cum maiori enim fructu sumuntur Sacramenta ab homine, rationis vsu, & integris viribus adhuc pollente. Iuvat verò, cum Sa-

cerdote pactum facere, vt te sensibus destitutum, in supremo articulo vitæ absoluat.

2. Si cui facienda est restitutio famæ, honoris, pecuniæ, fiat adhuc te viuente, si fieri potest: alioquin vt quam primum post mortem tuam fiat, efficaciter prouide.

3. Condona ex amore Christi mansuetissimi omnes iniurias & offensas, tuis inimicis, vt DEVS tibi peccata condonet.

4. Pete veniam publicè pro defectibus, à tuis superioribus, imò etiam æqualibus.

5. Si dispositio bonorum facienda est, fiat, vt monet S. Augustinus, dum sapiens es, dum tuus es. Deinde stat in statu gratiæ, vt sic tuæ elemosynæ sint meritoria vitæ æternæ; vel si facta est in statu peccati mortalis, post confessionem ratificetur. Fiat verò ad DEI gloriam maiorem, & secundum ipsius voluntatem, ita vt etiam Christus in suis pauperibus instituatur heres à te, qui tibi suam transcripsit hereditatem in cœlo.

6. Si Superior es, monitum aliquod pium tuis subditis relinque, quod tunc cordi audientium altius infigi solet. Ita S. Ludouicus Rex Galliæ, moribundus filio suo dicebat, apud Surium: Fili mi, in eam rem ante omnia incumbe, ne vnquam peccatum mortiferum committas. S. Antonius Magnus apud eundem Surium, hæc verba suprema ad fratres dixit: Ad IESVM suspirare, & hoc sanctissimum nomen vestris figite mentibus.

7. Cu-

7. Cūret sibi infirmus, prælegi passionem Domini nostri, item Historiam mortis B. Virginis, & aliquorum sanctorum, præsertim B. Alyosij & Ioannis Berchmans, ut exemplo pretiosæ in conspectu domini mortis, Sanctorum, discat mori. Plurimorum autem ad hoc conducet Liber, cui titulus *Pretiosæ morientium occupationes*, à Patre Ioanne Nadasi Soc. IESV editus.

8. Suadet ibidem hic author cap. 8. ut moribundus faciat has intentiones, pro sua morte. *Volo mori, quia amo DEVM, & ideo volo illi ita statuenti obedire. Volo mori, ut nunquam DEVM deinceps offendam. Volo mori, ut DEVM coram videam & perfectius amem, cum B. Virgine, & SS. Patronis, ad quos aspiro. Volo mori, ut imiter IESVM & MARIAM morientes. Volo mori, ut mortem stipendium peccati accipiam, pœnasque dem pro peccatis meis. Volo mori, ut immoler DEO, cui me tot modis debeo. Volo mori, ut vivā in Cælo in æternum.*

9. Armetur æger in hoc supremo conflictu instrumentis pietatis, imaginē crucifixi, sacris Reliquijs, & imaginibus Sanctorum, quas identidem adoret & osculetur. Item cereo benedicto, quem manibus tenens, agat DEO grâcias, quod se vocauerit in admirabile lumen suum, dicatque: *Tu illuminas lucernam meam, Domine illumina tenebras meas. Illumina oculos meos, ne unquam obdormiam in morte, ne quando dicat inimicus meus, prævalui adversus eum. Dum aqua lustrali aspergitur, dicatur; Exurgat DEVS, & dissipentur inimici eius, & fugiant qui oderunt eum*

eum à facie eius. Ita Ioannes Berchmans moribundus, Crucifixum, Coronam, & regulas, manu tenens dicebat; Hæc sunt arma mea, & his armatus obiit Romæ 13. Augusti, 1621. ætatis suæ 22. cum magna opinione sanctitatis.

10. Faciat moribundus has vel similes protestationes. *Protestor, quod morior versus Catholicus, in Fide, Spe, & Charitate in DEVM. Protestor, quod volo mori mancipium IESU, & MARIAE. Protestor, quod ex nunc & pro reliquo vitæ tempore nolo consentire ulli tentationi Demonis. Confirmo fidem datam DEO in Baptismo, & abrenuncio mundo, carni, Sathanae, meque tibi coniungo Christe in tempore & æternitate. Protestor quod libenter accepto omnem diuinam dispositionem, tam circa animam meam, quam circa corpus, post mortem.*

11. Breuiter eliciat actus virtutum, præsertim Fidei, Spei, Charitatis, Contritionis, Desiderij videndi DEVM, iuxta dicta in Corde Sancto, vltra quæ, hæc iuvabunt.

Credo Domine, spero Domine, Amo Domine.

Credo & spero videre bona Domini in terra viventium.

DEVS meus misericordia mea.

In medio umbræ mortis non timebo mala, quoniam tu mecum es.

Cupio dissolui & esse cum Christo.

Mihi vivere Christus est, & mori lucrum.

Educ de custodia animam meam, ad confitendum tibi, me expectant iusti, donec retribuas mihi. Ita dicebat moribundus Sanctus Franciscus.

Quan-

Quando veniam & apparebo ante faciem Domini?

Huc spectat, quæ sequuntur ex soliloquijs S. Augustini. *Ostende mihi consolator meus. Videam te. lumen oculorum meorum. Veni gaudium spiritus mei. Videam te letitia cordis mei. Amplectar te, bonum, sine quo nihil bonum. Fruar te optimo, sine quo nihil optimum. c. I.*

O vita cui omnia viuunt, vita, quæ es mea vita. per quam uiuo, sine qua morior, vita vitalis, dulcis & amabilis, ubi quæso es? ubi te inueniam, ut in me deficiam & in te subsistam. (riar.

Eia Domine, moriar, ut te videam, videam ut hic mori desidero, ut videam Christum, viuere renuo, ut uiuam cum Christo. ibidem.

O Lux sine qua tenebræ, illuminare huic cæcos, qui in tenebris, & in umbra mortis sedet, & dirige pedes eius in viam pacis, per quam ingrediar in domum. cap. 4

O clavis David, aperi mihi ostium luminis tui, ut ingrediar & videam te. cap. 7.

Adiuua Domine creaturam tuam. Non percat in malitia, quod operata est bonitas tua. cap. II.

Scio Domine, & confiteor me indignum, ut intrem sub tectum tuum, sed fac propter honorem tuum, & ne confundas in te sperantem seruum tuum. cap. 23.

O Fons vitæ, vena aquarum viuentium, quando veniam ad aquas dulcedinis tuæ de terra deserta, in viam, & in æquosa. cap. 30.

O Dies præclara & pulchra nesciens vesperrum, non habens occasum, in qua audiam: Intra in gaudium

dium Domini tui, ubi erit omne bonum, & non erit aliquod malum, ubi erit, quidquid voles, & non erit, quidquid noles.

Veni Domine & noli tardare, veni Domine IESV, & visita me in pace. Veni & educ vincitum è carcere, &c. Vide plura cap. 35. & 36.

Ultimo colloquatur itidem moribundus, cum IESV. & MARIA, per breues orationes iaculatorias.

IESV MARIA amores mei, patiar, moriar amore vesti. O IESV, esto mihi IESVS & Salvator. IESV agonisans, morti tua mortem meam unio. IESV pro me mortue, mors tua sit vita mea. O bone IESV exaudi me, intra vulnera tua absconde me, & ne permittas me separari à te. Domine IESV suscipe spiritum meum. Tu es Christus Filius DEI vivi, Dominus meus & DEVS meus.

MARIA MATER gratia, *MATER* misericordiae.

Monstra te esse *MATREM*.

Eia Advocata nostra illos tuos misericordes oculos, ad nos conuertere, & IESVM benedictum fructum ventris tui, nobis post hoc exilium ostende.

MATER DEI MEMENTO MEI.
O MARIA SIS MIHI PROPITIA.

CAPVT

CAPVT XX.

Exemplis quorundam Illustrium sodalium, traditur ars, sanctè viuendi & moriendi.

Quia semper Exemplo melius docetur, iuvabit postremò Sodalibus Marianis in hac Palastra nobiles Athletas proponere, qui in variis B. Virginis Congregationibus pietate floruerunt. Horum Princeps est.

B. ALOYSIUS GONZAGA.

IS, Patre Imperij Principe & Castilionis Marchione natus, septimum ætatis annum, suæ ad DEVM conversionis tempus appellabat, eà constantia tunc iam feliciter inchoatæ, vt deinceps, (prout quatuor fide digni eius Confessarii affirmarunt,) nunquam se à DEO per mortale peccatum auerterit. Nouennis adhuc, Florentiæ ante imaginem Virginis ab Angelo salutatæ, perpetuò Virginitatis voto se obstrinxit, tam perfecte semper obseruato, vt illud testari potuerit Sacra Romana Rota: *Aloysius nunquam stimulum carnis passus est, nec cogitationem ullam impuram in mente habuit.*

Tem. ---

Temperantia plane fuit admirabilis. Nam præter alia extraordinaria ieiunia, singulis hebdomadis, feria sexta & sabbatho, ac etiam sæpè feria quarta, solo pane & aqua contentus vivebat. Ter imprimis per hebdomadam: ac einde in yltimis in sæculo annis, die quolibet semel: postremo ter de die, seu flagellis, seu loris, seu ferrea catenula, se ipsum cædendo crucentabat. Sæpè asserem sibi dormienti supponebat. Sæpè loco cilicij acutis calcaribus tenerum corpus stringebat.

De studio orandi quid dicam? Mane quolibet ultra prolixas vocales orationes, rerum sacrarum meditationi, vnam horam dabat; vespèri autem quandoque duas. Nec his contentus, nocte media alijs quiescentibus, è lecto surgebat, & solo indusio etiam inter hyemis rigores tectus, ac præ frigore tremens, per aliquot horas, genibus flexis meditationi vacabat: vt quandoque præ corporis debilitate, in terram prolapsus, iacensq; orationem finiret. Ab hac porro consuetudine orandi, non destitit Aloysius, etiam in Aula Regis Hispaniarum biennio degens: vbi in abditos recessus fugiendo, quinque horas Cœlestium rerum contemplationi impendebat. Modum ac frequentiam sacrae communionis à S. Carolo Borromæo edoctus, ea teneritudine animi, diebus festis vsurpabat, vt in in lacrymas vberimas sæpè solueretur, à quibus etiam, diebus profestis, sacrum audiens, post eleuatam Sacram Hostiam, sibi temperare

non

non poterat. Hæc verò pietate insignem illum promeruit DEI MATRIS fauorem, cum de statu vitæ deliberans, die Assumptionis Deiparæ, sacra peracta ad hanc intentionem Communionem, illam Madriti, à pretiosissima Parente audivit vocem: *Ingredere Societatem filij mei.* Quam ut ingrederetur, incredibile dictum est, quantas Patris iras, quot obstacula toto triennio fortissimè superavit. Qualem verò in Societate virum egerit, quam pretiosa morte breui coronatam, non est propositi mei referre, qui Aloysium nondum Religiosum, sed adolescentem adhuc in tenera ætate, in aulis Regum, inter Principum delicias, Sodalibus propono. *Ex Virgilio Cepario.*

B. STANISLAVS KOSTKA, Polonus.

Planè materno adhuc ex utero in Societatem IESV vocatus esse videtur, dum splendidibus Nominis IESV radijs in utero circumfusus, antequam in lucem prodisset, Matri suæ apparuit, teste *Guagnino.* Illibatum Virginitatis florem & innocentiam, nullâ gravi labe contaminatam, secum ad Religionem, ac inde breui ad cælum tulit, prout eiusdem in spiritu Magistri, Ruizius & Iulius Fatus affirmarunt. Hanc eius innocentiam honoravit cælum, cum bis Angelos misit, qui Stanislaum, Pare Angelorum reficerent. Honorarunt etiam elementa, cum
ignis

ignis aliquando cervicalia Stanislai decumbentis capiti subiecta aggressus, caput tamen non attigit. Solus exhorruit infernus, atque ille Erebi canis, qui ægrotantem Stanislauum ter frustra infilijt, ter ab eodem crucis signo fugatus.

Angelica eius puritas, nec verbum audire potuit honestati aduersum. Itaque ad paternam mensam, si quid liberius ab aliquo hospitum proponeretur, illicò versis in cœlum oculis Stanislaus, veluti exanimis, sub mensam delabi, à fratre suo Paulo non semel obseruatus est. Modestia, & omnium affectuum moderatio singularis in eo fuit, vt nihil in eo puerile, signum iracundiæ nullum compertum sit.

Amor Orationis quantus! quam non interdiu tantum in abditis ædium recessibus, sed noctu etiam in alto rerum omnium silentio, positus humi genibus, aut prono stratus corpore, prolixam faciebat. Mensæ quin assidens, sæpe cibi penè immemor, rerum Diuinarum gustu mentem pascebat. Quotidiè binis, ternisue sacris; festo autem die, pluribus intererat, & quidem nixus genibus, corpore immotus, oculis decore demissis, manibus ante pectus compositis, non rarò etiam à sensibus abstractus. Diuinissimum Sacramentum quotidie ante initium, & post finem scholarum inuisebat, idemq; sumebat Viennæ studens, quâvis hebdomadâ, pridie coenâ abstinendo.

In DEI Matrem quanta fuit pietas Stanislai! eam Matrem suam appellabat: ab ea benedictionem

onem conuersus ad templum, quidquid agendum erat, postulabat: Eius encomia inter scholasticas exercitationes sibi tractanda assuebat, omnesque scriptiōnis suæ paginas illa oratione implebat: *O MARIA sis mihi propitia*; & nouos semper & magnificos inueniebat titulos; eius Rosarium aut pios libellos, extra tempus studendi, perpetuo versabat manibus, demum in longo illo ac molesto itinere, sicubi imaginem Deiparæ conspexisset, nusquam reliquit insalutatam. Itaque ipso die Virginis Assumptæ, cum paucis ante diebus, per suum Patronum Laurentium, literas ad eam scripisset. quibus postulabat. vt sibi spectatorem triumphi ipsius in cælo adesse liceret, mille osculis imagini Deiparæ impressis, Rosarium manu tenens, in honorem, vt dicebat, suæ Matris, Eandemq; tunc (vt aliqui putârunt) præsentem intuitus, ad eius complexum feliciter abiit. Romæ in domo probationis Soc. IESU, 1568. ætatis suæ 18. decem mensibus in Societate transactis, quam tam ardentem expetijt, ac etiam per tot viarum spatia Viennâ vsq; Dilingam, hinc deinde Romam quæsiuit; à qua denique paternis literis, minarum probrorumque plenis, avocari non potuit. Vt proinde immane mendacium sit, à quibusdam malevolis in hoc Regno contumeliosè confictum, B. Stanislaum extra Societatem dimissum, in aliquo Xenodochio Romæ obiisse, cum tamen de hoc Romæ, nulla suspicio fuerit, vt ipse ibi exploratum habui: & nuper

Cle-

Clemens X. in Bulla, qua huic Beato Sacrum concessit, Pontificio Oraculo testetur, cum esse Societatis IESU, ac proinde è Societate non dimissum.

ALEXANDER BERTIVS

Italus, Sodalis Collegij Florentini.

ADhuc quinquennis Christi patientis cruciatus, sæpè meditari, ac de illis suaues habere sermones consueuerat. A septimo ætatis suæ anno, cepit gestare cilicium quoddam ex funiculis elaboratum, quod quia asperum ei minus videbatur, petijt à Confessario, & obtinuit catenulam, qua infantiles adhuc stringebat artus. Vix nouennis, non in alienam iurauit perniciem, sed maior Annibale Alexander, in suæ vtilitatem animæ, maturum ineundæ Religionis fecit propositum, eiusdemque, ab ijs quibus intererat dilatam executionem, multis lacrymis deleuit. Decimum agebat annum, quo miris rerum Diuinarum delicijs affluere capit. Aliquando enim inter duos Angelos consistere sibi videbatur, quibus à DEI para, suæ integritatis seruandæ, cura demandabatur. Quandoq; ipsa pretiosissima Parens, eidem studenti, assistere visa est, librorumq; pagellas euoluere; semel etiam ægrotanti adstare prope lectum, & osculos ad temperandos febris ardores admo-
vere.

vere. Die eiuidem Virginis purificatæ, cum primum Sacrosanctæ Eucharistiæ pabulo reficeretur, videbatur sibi habere cor in duas partes diuisum, ac IESVM in medio ipsius collocatum, quem exinde ea deuotione in Sacramento latentem profecutus est, vt a maiori altari, pœnè auelli nunquam potuerit, vulgo Ephebus SS. Sacramenti appellatus.

Nihil illi gratius vnquam fuit, quàm de MARIA loqui, audire, cogitare. Domum ex Oratorio redux, congregatis in aula famulis ac domesticis, primò ipsis libellum aliquem pium prælegebat; mox de rebus Diuinis differebat, cum eo affectu, vt audientibus lacrymas moueret, eisdemque ibidem, ad corporis flagellationem suo exemplo duceret. Morbo siquæmo correptus, frequenter de Christi passionibus, aut legere, aut differebant audire gebiebat: & si quid amaræ medicinæ sumendum fuit, in illas prorumpere voces, *O Bone IESV, quàm acerbior fuit Calix tuus!* Interim coelestibus non carebat delicijs animus. Die quodam, cum ex pia lectione, quasi in somnium se vultu hilari composuisset, à matre quæsitus, quid ageret, Delicias, inquit, animæ meæ IESVM & MARIAM, inter innumera Beatorum agmina loco celsissimo intuitus sum. Die altero repentè ex contemplatione quadam experrectus: An non, inquit, coram intuemini Mariam. DEI MATREM Dominam meam, meumque custodem Angelum, & Mariam Magdalenam de Pazzis

(erat

(erat huic Beata, adhuc viuens, gratus admodum Alexander, & ab eadem Angelus terrestris appellatus) tum ad hos conuersus hospites, multa cum illis loqui visus est. Cum verò in illo temporis puncto, Dæmon se illi formâ horrendâ spectandum obieciſſet: Quid quæris, inquit, Bestia? faceſſe, testimonium conſcientiæ meæ, DEO fauente, bonum eſt. Demùm præ nimia deliciarum cœleſtium affluentia, quaſi moræ impatiens, fractis iam viribus, è lecto ſe proripiendo, atq; ingeminando: In cœlum, in cœlum: ac fixis in cœlum oculis, ſæpè IE-SV ac MARIÆ nomina Sacro Sancta inuocans, ex hac vitâ deceſſit, Florentiæ, virtute florentiſſimus, in Aprili, Anno Chriſti 1608. ætatis ſuæ 15. Hæc tum ex libro Italico Bononiæ impreſſo, cui titulus, *Corona duona duodecim florum*, tum ex P. Lechnero lib. 1. cap. 10.

ANTONIUS VBALDINI, COMES

Montis vicini Italus,

Sodalis Seminarij Romani.

PLANè adhuc puer, præter coronæ ac Pſalmorum pœnitentialium aliarumque orationum vocalium penſum quotidianum, diebus profeſtis meditationem per ſemihoræ ſpatium, feſtis verò diebus, per horam integram protrahabat.

hebat, cō sensu pietatis, vt totus accendi, ac in lacrymas solui videretur, præsertim cum Christi Saluatoris cruciatus recoleret. Quoties sacræ mensæ accumbebat, (id quod post annum ætatis duodecimum, octauo quoq; die facere solebat) lacrymas non poterat continere, vltro ex oculis iam asuetis erumpentes. Ad eam vero ita se præparabat, vt vnā horam meditationi, alijs adhuc dormientibus, aliam in Oratorio pijs impenderet exercitijs, nec nisi post longam gratiarum actionem, inde recederet, & quidem ad sacram lectionem in suo conclauī continuandam. Præcipue suum affectum DEIPARÆ colendæ consecrauerat. Ergo ad eius amorem Sodales inflammare, laudes ipsius celebrare, vigilijs omnes festorum, ac dies Sabbathi, in pane & aqua, ab anno ætatis suæ octauo ieiunare, diebus singulis eiusdem Virginis officium recitare, familiare Antonino fuit. Post DEIPARAM singulari, per orationes quotidianas, cultu venerabatur Sanctum Ignatium, Sanctum Franciscum Xauerium, & Beatum Aloysium, quorum festo imminente die, in nudo asserere & quidam duabus duntaxat per noctem horis, somnum capiebat, reliquum noctis partim flagellationi, partim lectioni sacræ, partim Orationi, diem vero poenæ integrum in Sacello D. Tutellaris, orationi impendens. Corporis mortificatio plane admirabilis in eo fuit. Adhuc in domo paterna puer, diebus communionis, ac DEIPARÆ peruigilijs, nihil prætor pānem

nem

nem fumebat. In Seminario autem manens, singulis ferijs sextis vix aliquid obsonij. Ter in hebdomada supra nudos asserses dormiebat, alias ligno capiti, aut libro aliquo prægrandi supposito. Præter cilicia frequentia, & ferreas puncturas, alternis diebus corpus suum catenula; vel intertextis inter funiculos ferri fragmentis dirè lacerabat, quæ laniena plerumque vno horæ quadrante, quandoq; media horâ, aliquando etiam horâ integrâ durabat. In morbo supremo decumbens, nulla penitus sociorum colloquia, quæ de rebus pijs non essent, admittere voluit. Vbi verò nuntium de morte imminente accepisset, nihil sibi dolori esse dixit, nisi quod sine sanguinis effusione, extra Iaponicos carceres & flammâs moreretur. Tum a suo Confessario instanter petijt, vt saltem sibi liceret nouitium Societatis IESV mori. Ergo ita annuente Præposito eiusdem Societatis Generali Mutio Vitellescho, veste Religiosa indutus, & votis Societatis simplicibus, obstrictus DEO, vestem illam osculatus dicebat: Benedicimus DEVM Coeli, & terræ, quia fecit nobiscum misericordiam suam. Postremò inter continua IESV Crucifixi oscula & amplexus, inter crebram MATRIS gratiæ invocationem, sancte obiit, 11. Julij, Anno 1629. ætatis suæ decimo septimo. Ex libello cui titulus *Corona quoddecim Florum.*

STANISLAVS ZBOROWSKI, Polonus.

Sodalis Collegij Ingolstadiensis.

DE hoc Adolescente, non minus Natalium splendoribus in Polonia Illustrissimo, quam virtutibus Ingolstadij, vbi studijs operam dabat, eximio, ita scribit Pater Gaspar Lechnerus in *Sodali Parthenio*, lib. 1. cap. 9. Modestia morum, animique submissione ea vixit, vt cum omnes in oculis atque animis ferrent. Amabat familiaritatem inire cum ijs, quos fortuna inferior, a reliquorum consuetudine reiciebat. Veste obsoletiore libenter utebatur, & a Confessario sæpe adigi debebat, vt pretiosiores vestes pro familiæ honore tuendo, subinde indueret. Orandi studio & conscientie puritati impense studebat, vt singulis hebdomadis culpas certo expiaret. Vnde factum, vt pridie quam è vita discederet, monitus, vt si quid animum sollicitum haberet, foras proderet, vix leuam culpam repererit. Corporis edomandi multum studiosus fuit, vt ferè nihil in eo genere ab aliquo gereretur, cui non se socium præberet; ac multo iam tempore, singulis Sabbathis a coena abstineret. Denique cum & genus, & opes, & præclara indoles, in maximam spem eum ducerent; ille magnanimo iuvene dignissimum facinus aggressus est, coepitque supra humana

re.

ire. Iamque in eo erat, ut abdicatis ijs, quæ nos imbelles animæ miramur, DEO se penitus in Religione emanciparet, cum à DEO Optimo ad stipendia potius accipienda, quam promerenda evocatus, relicto magno sui desiderio, variolis suffocatus, è vita abiit, Ingolstadij, Anno mortalis DEI hominis 1619.

STANISLAUS BRUDZINSKI, Polonus.

Sodalis Collegij Califfiensis, & Posnaniensis.

Illustri ac pervetusta in Regno Polonia, Paterna quidem Brudziniorum, Materna verò Russociorum, utraque Senatoria ortus ex Familia Stanislaus, anno salutis nostræ 1601. tenerioris cursum ætatis, non domi tantum, sed in Aula etiam Regia exegit: ubi Familiares nonnisi probatissimos admittens, prauaque exempla deuitans, innocentiam vitæ, morumque integritatem retinuit. Studiorum causa Posnaniam, ac deinde Califfium missus, tam in ludo literario, quam in cœtu Mariano, omnibus suis commilitonibus fuit exemplar modestiæ, speculum probitatis, lux & antesignanus diligentæ. Verrere solitus Oratorium Marianum, dixisse aliquando fertur: Se id non modo libenter facere, sed etiam non aliud munus perpetuum in Sodalitate ambire, quam eijciendi

di fordes è loco Oratorij. Elucebat in eo vltra
 ætatem singularis morum maturitas, & animi
 semper in qualicunq; offensa placidissimi man-
 suetudo, qua & aliorum impetus retardabat, &
 omnibus summè amabilis erat. Quinto ante
 morbum supremum die, in pervigilio SS. omni-
 um, præmisso prius diligenti examine, consci-
 entiam generali totius vitæ confessione expia-
 uit, ita puram ac innocentem, vt post eius obi-
 tum, testatus sit sacri fori iudex, se nullum in
 Stanislao noxam mortalem reperijſſe. Morbo
 deinde breui post correptus, inter atroces cal-
 culi, aliosque plures cruciatus, ita quietus vul-
 tu ac mente decubuit, nullum vt ei impatiens
 animi indicium, nulla vox eruperit, nisi illa,
 quæ à suo Pædagogo frequenter vrgebat, vt pro
 se Eleemosynam pauperibus erogaret. Cre-
 ſcente in dies abſq; ſpe ſanitatis morbo, trina
 confessione innoxiam adornans potius, quam
 emundans animam, hospitem ad ſe in viatici
 ſpecie DEVM hominem, tanto ardore ac reue-
 rentia ſuſcepit, vt vix etiam ſpirans, demiffis
 tamen in terram genibus, abſq; vlllo fulcro per
 horæ ferme dimidium, eum ſit præſtolatus, ac
 præſentem continuatis per horam integram ve-
 neratus obſequijs. Tum ad Matrem eius Virgi-
 nem conuerſus, conſueta Sodalitati forma, ſe
 ipſum eidem in ſervum perpetuum, etiam in
 ſupremo vitæ ſuæ termino deuouit. Et ſane
 expertus eſt ſingularem Matris Miſericordiæ
 opem, in periculoſo illo agone, bonus filius,

G

cum

cum proximus morti sæpius similis respondenti ingeminaret : *Qui ego ista merui, Virgo Beatissima ? Non ego his dignus sum . . . Virgo Beatissima. Ora pro me piissima Mater .* Pridiè mortis à quodam quæsitus, quidnam cogitaret ? conuersis ad Christi Crucifixi imaginem oculis, respondit : *DEVM meum cogito : DEVM meum cogito .* Tum iterum interrogatus, an mortem DEO ita volente libenter obiret ? placidissime dixit : *Libenter mortem de manu DEI accipio .* Erga sui quoque nominis Tutelarem B. Stanislauum Kostkam religiosus, sæpe imaginem eius osculatus dicebat : *B. Stanislæ, tuum Stanislauum non desere.* Atq; ita post vnus mensis infirmitatem, sacro perunctus oleo , applicata etiam à Sacerdote sibi præsentè, plenaria Indulgentia, & SS. nomine IESV invocato, defixis in obiectam sibi sacram imaginem oculis, nobile Polonarum Sodalitatum sidus, corpore & spiritu, in terris ardere, & lucere desiit, Anno ætatis suæ 14. *Ira restantur Annales Sodalitatis Calissiensis.*

Plures Athletas, illustria vel huius cœtus vestri Posnaniensis, sub Titulo sine labe Conceptæ Virginis Matris, decora, in Palæstram hanc deducerem, Sodales Mariani . Ex vestro enim Albo ab anno 1602. prodiere ad purpuram tres Romani Imperij Principes, ad Antistitem in Regno nostro Infulas 19, ad Palatinorum latit-clauia 40 totidemq; ad subsellia Castellanorum, ad Abbatiale Pedum 8. ad Cathedralium Ecclesiarum Canonicatus 30. ad diuersas Religiosorum

rum familias ducenti prope, præter alios, quorum statum ac dignitates iniuria temporum in Album non retulit. Verum coronidis instar sit coronatus in Iaponia Victor.

ALBERTVS MECINSKI. Sodalis Lublinensis & Posnaniensis.

Ingens enimverò in Palæstra hac vestra virtutis nomen, cuius Albo inscribi postulauit Anno 1614. dum exterum lustraturus solum ac solem, ex Polonia abiret. De quo hæc strictim. Illustrissimis Rosinis oriundus ille, primâ statim ætate virtutibus vernare cæpit in Sodalitate Lublinensi, ac præsertim amore in magnam DEI Matrem, quam vnicum suarum necessitatum Asylum appellabat. Ultra consueta sodalibus pietatis opera, solenne illi erat, simulat à somni quiete, lectoque tacite relicto, horas rerum cœlestium meditationi tribuere, ac moderatorum vigilantiam sancte fallere. Hinc vultum eiusdem perpetuus virtutis comes colorabat verecundia, totum verò corpus modesta compositio. Inter sermones promebat sæpè æstus illos votorum, quos altero nonnisi in orbe limphis restringendos, accenderant illustres Martyrum Iaponensium triumphus, in cœtu sodalitatis celebrati. Deliberabat iam de proposito vitæ, cum subito mendiculi in platea vo-

cem accipit, illud Dauidicum octinentis, *Nolite confidere in Principibus, in filiis hominum, in quibus non est salus.* Quo velut œstro percitus, Societati IESV nomen dare in animum induxit sed enim mentem hanc varia eripiebant illi lenocinia mundi, furores Orci, per ædes, quas inhabitabat, toties obstrepentes, imò & matris, quæ alapa impressa, constantiam adolescentis expugnare volebat, ad primum de pio vitæ proposito nuntium. Verum omnia hæc, loriceatus seipso, ille virili superauit animo. Ergo Romam tandem à morte parentis aduolat ad Tyrocinium Societatis IESV, vbi laxatis pietatis in cœlorum Reginam habenis, inter paucos eximius apparuit. Nouis ijsque perangustis exornare Eam titulis, iconem Illius ad ædes D. **MARIÆ** Maioris, eminens de genu venerari, Festa Mariana, quotidiana corporis afflictione præuenire ac subsequi, in emaceratos frequentibus ieiunijs artus sæuire, omnibus virtutibus excolere, capacissimam omnium mentem, primæ tum Mæcinij erant curæ. Ergo tanto virtutum pabulo auctæ, veteres Iaponici martyrij flammæ, in apertum erupere incendium. Impetrata magno votorum ambitu à Præposito Societatis Generali Iaponica Missio, enauigata longissima maria, tolerati apud Hollandos durissimi carceres, immensi labores viarum exantlati, tandem adita votorum apex Iaponia, ipsumque Nangazachium, terminalis limes vitæ ac laborum. Centies ibi & amplius, magna vn-

de copia, in os supinatum, atque viscera, Heroi Europæo ingesta, iterumque admotis tabulis medullitis expressa. Septem deinde diebus, omnibus vitæ præsidijis destitutum, imò o a nibus enectum Iaponicæ crudelitatis pœnis, furca ac fouea aquis putidis stagnans præfocabat, donec tandem victorem spiritum exprimeret expromeretque cœlo. Sic Mecinius è vitæ naufrâgio, æternitatis fortunatas insulas attigit. cœlumque in vndis, relucens per suam imaginem, re ipsa beatus comprehensor obtinuit, magnus Heros Palestræ Marianæ.

*Ad Maiorem Dei Gloriam,
B. V. M. H.*




Pro-




Protestatio Authoris.

QUæ narrantur in hoc libello de vitâ & virtutibus quorundam B. Virginis Sodalium, & Miracula, Prophetias, Reuelationes, aliaque huiusmodi sapiunt: humana duntaxat autoritate, non autem Diuina Catholicæ Romanæ Ecclesiæ, & Apostolicæ Sedis nituntur, atq; ita fides sit penes Authores, iuxta Decretum Urbani VIII. 9. Junij. u 1631.



SYL-



SYLLABVS.

CAPITVM.

- Caput 1. Proponuntur quedam Principia practica, sanctè viuendi. pag. 1.*
- Caput 2. Remedia ad fugienda & extirpanda vitia. 19.*
- Caput 3. Praxis exercitij matutini. 27.*
- Caput 4. Examen Vespertinum. 30.*
- Caput 5. Obseruanda circa quamcunque actionem, vt perfectè fiat. 32.*
- Caput 6. Orationes eiaculatoriæ per diem vsurpandæ. 34.*
- Caput 7. Praxes visitandi SS. Sacramentum. 40.*
- Caput 8. Modus audiendi Sacrum. 44.*
- Caput 9. Praxis recitandi Coronam B. Virginis. 47.*
- Caput 10. Variæ Coronæ per hebdomadam dicendæ. 54.*

Caput



- Caput 11. *Observanda circa Confessionem.* 55.
Caput 12. *Praxis sacrae cōmunionis.* 64.
Caput 13. *Actus virtutum Theologicarum & moralium remissive.* 70.
Caput 14. *Praxis laudandi DEVM* 71.
Caput 15. *De modo colendi Christum, & festa eius celebrandi.* 72.
Caput 16. *Breues meditationes de Passione Christi.* 85.
Caput 17. *Modi colendi B. Virginem praesertim in festis ipsius.* 103.
Caput 18. *Praxis colendi Sanctos Patronos.* 115.
Caput 19. *Modus Sancte moriendi.* 117.
Caput 20. *Exemplis quorundam illustrium sodalium.* 125.

Concluditur ars, Sanctè vivendi
& moriendi.





8-1



